

**NATIONAL ASSEMBLY OF
SEYCHELLES**

Tuesday 09th December 2025

The Assembly met at 9am

National Anthem

Moment of Reflection

Madam Speaker in the Chair

MADAM SPEAKER

Mon a dir bonzour tou Manm. Tou bann dimoun ki pe swiv nou. E bann ki pe swiv nou osi *live*. Mon swete ki tou dimoun in ganny en sans pou byen repoze, apre sa gran *weekend*. E nou pare pou nou pran nou travay.

Nou ava al direk lo nou *Order Paper*. E mon a demann Clerk pou komans avek *Presentation of Papers, please*.

MADAM CLERK

Mersi Madanm Speaker. Bonzour Madanm Speaker. Bonzour tou bann Manm. Tou bann dimoun ki a lekout. Bann papye ki pe ganny prezante i; *S.I. 91 of 2025 – 4.6% Seven Year Treasury Bond Debt, 2025. S.I. 92 of 2025 – 5.6% Seven Year Treasury Bond Debt Order, 2025.*

S.I. 93 of 2025 – International Bank of Reconstruction and Development Loan Agreement Debt Order, 2025.

S.I. 94 of 2025 – Court of Appeal of Seychelles (Amendment) Rules, 2025.

MADAM SPEAKER

Mersi Clerk. Nou ava prezan pas lo lot ki *Public Bills. First Reading* silvouple Clerk pou *Cybercrime and Other Related Crimes Bill*.

MADAM CLERK

Mersi Madam Speaker. *This Act maybe cited as the Cybercrime and Other Related Crimes (Amendment) Act, 2025.* Mersi Speaker.

MADAM SPEAKER

Mersi. Nou aprezan pran *Second Reading. Employment (Amendment) Bill*. Nou ava demann Onorab LGB?

HON SYLVANNE LEMIEL

Bonzour Madanm Speaker. Tou mon bann koleg Manm Onorab. E tou dimoun a lekout. Madanm Speaker, anba *Order 69 (2)* mon pe demande ki *Bill 23 of 2025* i ganny lir pou en Dezyenm Fwa. Mersi.

MADAM SPEAKER

Okenn Manm ki segonn Mosyon? Onorab Gill.

HON CHURCHILL GILL

Mosyon i ganny segonde. Mersi.

MADAM SPEAKER

Mersi. Mon a demann Sekretarya pou fer Minis antre silvouple, avek son tim. Bonzour Minis. Mon ava demann ou pou prezant *Bill* silvouple.

MINISTER IDITH ALEXANDER

Madanm Speaker, *Leader of the Opposition, Leader of the Government Business*, tou Manm Onorab, e tou piblik a lekout bonzour.

Madanm Speaker, ozordi mon vin devan Lasanble tre fyer pou delivre lo sa premye 100 zour sa kontra sosyal ki Lepep Seselwa in fer avek nou presizeman pwen limero 3 ki koz lo lapey 13enm mwan.

Koman Minis pou Lanplwa ek Planifikasyon Resours imen, mon pe prezant devan zot en Lamannman Lanplwa pou zot laprouvasyon. Lamannman ki nou pe propoze se pou retir evalyasyon performans lo sa 50 poursan lapey 13enm mwan.

Nou pe propoze ki lapey 13enm mwan i vin 100poursan

obligatwar apartir lannen 2025. Ki nou pe dir par sa? Madanm Speaker, nou pe dir ki napa evalyasyon performans lo lapey 13enm mwan.

Andotmo nou pe retourn lapey 13enm mwan lo 100poursan saler debaz parey nou ti donn zot an 2016. Savedir travayer pou resevwar son 13enm mwan lapey an antye. Madanm Speaker, i enportan pou nou rekonnet e aksepte kontribisyon travayer dan nou lekonomi.

E travayer i en resours pli enportan dan en lorganizasyon. Se pou sa rezon ki nou'n vin ek sa lamannman dan Lalwa Lanplwa, pou demann Lasanble pou retir sa sistenm entrodwir par ladministrasyon avan, Gouvernman LDS kot 50poursan lapey 13enm mwan i baze lo performans.

Madanm Speaker, i enportan ki nou eksplike ki nou pe dir par en 13enm mwan lapey e rasyonnal pou tir sa konponan evalyasyon performans. En lapey 13enm mwan i ekivalan en 1 mwan saler debaz, sa ki nou dir an Angle *basic salary*.

I pa enkli okenn *allowance* oubyen lezot benefis larzan ki en travayer i gannyen ansanm avek son saler. I osi enportan pou note ki pou nou Sesel

13enm mwan lapey i endepandan avek bonous. Parey mon'n site o komansman, sa konseps 13enm mwan lapey ti vin aplikab pou sekter prive an 2016 par nou Gouvernman.

Son prensip pa ti pou relye li avek evalyasyon performans. 13enm mwan lapey in touzour ganny regarde koman en drwa. Desizyon Gouvernman pou retir evalyasyon performans lo 13enm mwan lapey pa vadir ki nou pa rekonnèt lenportans evalyasyon kapasite en travayer pandan en lannen travay.

O kontrè Madanm Speaker, evalyasyon performans i primordyal pou nenport ki lorganizasyon. Madanm Speaker, i enportan ki nou konpran sa 2 konseps byen 13enm mwan lapey e evalyasyon performans. 13enm mwan lapey i drwa en travayer.

Evalyasyon performans li i en sistenm ki servi pou evalye e mezir performans travayer. Lorganizasyon i servi sa pratik pou ki i kapab ofer lezot benefis pou travayer tel koman promosyon, ogmantasyon saler, formasyon pou travayer. Dan sa konteks, 13enm lapey li i en drwa en travayer. Alor i pa aplikab pou relye li avek evalyasyon performans. Madanm Speaker, sa

lamannman Lalwa ki devan Lasanble se pou zisteman tir sa konponan evalyasyon performans. Larestan provizyon pe reste parey.

Sa i premyerman lekel ki kalifye pou 13enm mwan lapey. Lapey 13enm mwan i reste aplikab zis pou travayer Seselwa. Kategori travayer ki pa kalifye, en travayer etranze, en *trainee* lo kontra pou *Skills Development*. E en travayer ki son lapey i par la R45mil 450.

Dat peyman pou 13enm mwan ;

Dat peyman i reste parey. Savedir en anplwayer i ganny li ziska le 31 Zanvyè son lannen answit pou pey son travayer ki ti dan son lanplwa le 31 Desanm.

Savedir pou 2025, fodre ki tou anplwayer i pey travayer zot 13enm mwan lapey apartir le 31 Zanvyè 2026. Peyman *pro rata*, sa i vadir ki ou ganny peye proporsyonnelman avek kantite letan ki ou'n travay.

E i ganny peye par bann sirkonstans swivan ;

Travayer ki'n komans en lanplwa apre mwan Zanvyè. Savedir si en travayer pa'n dan lanplwa depi komansman lannen i pou ganny en proporsyon son 13enm mwan.

Madanm Speaker, permet mwan pou eksplike. Par egzanz

en travayer ki komans travay le 01 Mars, e ki ti lo probasyon pou 3 mwan ziska lafen Me e ki ankor dan son travay le 31 Desanm, dan sa ka sa travayer pou ganny li en porsyon son 13enm mwan ki reprezant 10 mwan olye 12 mwan. Savedir, Mars ziska Desanm.

Travayer ki termin son lanplwa pandan lannen ;

Pareyman en travayer ki termin son lanplwa par *resignation* pandan lannen, savedir i pa pou dan sa travay le 31 Desanm, li osi i pou ganny peye en proporsyon son lapey 13enm mwan.

Sa ki i pou ganny peye i selman pou bann mwan ki in travay. Par egzanp si in travay depi Zanyve ziska Oktob, e i pa'n lo probasyon pandan sa letan, i pou ganny son 13enm mwan lapey ki pou reprezant 10 mwan travay.

Lezot sironstans kot en travayer pou ganny peye *pro rata*, i konm swivan; travayer ki pe swiv formasyon pou plis ki 14 semenn. Savedir si en travayer ki dan lanplwa e pe swiv en formasyon, e in bezwen absan dan son travay pou plis ki 14 semenn, sa travayer pou ganny peye son 13enm mwan proporsyonnel. Letan ki in absan pou ganny kalkile e dedwir i pou ganny peye selman

pou bann mwan ki in la pe travay.

Ler travayer in al lo konze san lapey ;

Par egzanp si en travayer i napa konze, e in deside pran konze san lapey pou plis ki 1 mwan, li osi i pou ganny peye proporsyonnel. Savedir i pou ganny peye selman pou bann mwan ki in la pe travay. Sa letan ki in absan pou ganny kalkile e dedwir.

Travayer ki ganny met an detansyon lapolis oubyen al lo rimann ;

Menm parey sa ki mon fek eksplike. Pou travayer ki absan pou rezon formasyon, oubyen konze san lapey - si en travayer i ganny met an detansyon lapolis oubyen lo rimann, sa letan ki i pa'n dan travay aköz i ti dan detansyon lapolis oubyen lo rimann pou ganny ekskli. Zot osi zot pou ganny peye selman pou bann mwan kot zot in la pe travay.

Lalwa i osi kler konsernan taks lo 13enm mwan lapey. Napa taks lo 13enm mwan lapey en travayer ki kalifye pou ganny sa benefis. Sa i vedir ki en travayer ki kalifye i devret pe ganny en mwan saler debaz an plen san okenn dediksyon taks ganny fer lo la.

Madanm Speaker, i enportan ki mon eksplik sa

byen. Sa 13enm mwan lapey i dan Lalwa. Sa i vedir ki lorganizasyon i oblize pey sa 13enm mwan lapey. Anplwayer ki deside pou pa respekte Lalwa, refize pey travayer i pou pe komet en lofans. E son konsekans i pou kapab ganny kondannen pou en lanmann ziska R20mil.

Madanm Speaker, Lalwa Lanplwa i enportan. I donn proteksyon travayer. I fer sir ki travayer i ganny trete avek lazistis ek dinyite dan landrwa travay. I defini responsabilite anplwayer. I klarifye ki keksoz en anplwayer i bezwen fer pou respekte Lalwa, par egzant konze, peyman, kondisyon travay, sekirite eksetera.

I regle relasyon ant anplwayer ek travayer, dan en kad legal ki gid fason pou travay ansanm e rezourd konfli. Dan en lot mo, Lalwa Lanplwa i fer ki i annan standar minimonm kot benefis pou en travayer i konsernen.

Me sa pa anpese pou en anplwayer volonterman donn an plis pou ankouraz son travayer. Mon konnen ki annan ki deza pe fer. E nou ankouraz sa bann bon pratik. E Lalwa i fer provizyon pou sa group.

Savedir lorganizasyon ki pou pey travayer ki saler ki pli o ki 45mil 450, dan sa ka

dediksyon taks pou aplikab lo selman sa sonm ki par lao sa kap 45mil 450.

Wi, nou'n dir en travayer ki ankor lo probasyon le 31 Desanm oubyen en zenn ki lo lantrennman *Skills Development* pa kalifye pou 13enm mwan lapey.

Me nou'n vwar dan lepase kot in annan anplwayer ki'n volonterman deside pey en 13enm mwan lapey en travayer Seselwa ki ankor lo probasyon le 31 Desanm, oubyen en zenn ki lo lantrennman *Skills Development*. Pou sa bann ka napa taks ki ganny tire lo zot lapey.

Madanm Speaker, nou'n osi pran konsiderasyon ki pou annan pti biznes ki pou war li difisil pou pey sa 13enm mwan. Pou sa en sonm 5milyon ki Minister Finans in mete pou kapab donn lasistans sa bann pti biznes, pou zot osi kapab pey zot travayer sa bann benefis.

Pou sa i annan en komite ki pou konpri reprezantan sorti kot sa 3 Minister Lanplwa, Finans, e Lendistri. Plis detay lo sa *mechanism* ava ganny anonse byento. Madanm Speaker, pou terminen mon repete - apartir lannen 2025, pou napa evalyasyon

performans lo lapey 13enm mwan.

E sa lamannman Lalwa Lanplwa ki mon pe prezant devan zot, se pou re entrodwir sa 13enm mwan lapey san okenn dediksyon baze lo performans. Sa i prensip ki nouvo ladministrasyon pou swiv pou demontre nou komitman e langazman anver nou pep.

Alor, lo lapar travayer Seselwa mon pe demann tou Onorab pou vot an faver sa Prozedlwa ki mon pe prezant avek zot. Mersi.

MADAM SPEAKER

Mersi Minis. Deba i aprezan ouver lo *general merit and principles of the Bill*. Okenn Onorab? Onorab Gill.

HON CHURCHILL GILL

Mersi Madanm Speaker. Bonzour Minister ek ou *panel*. Bonzour tou Manm ek tou dimoun ki pe ekout nou. Mersi Minister pou sa leksplikasyon tre detaye.

E mon lentervansyon i pou koumsa, kot mon osi mon pou sey donn leksplikasyon pou asire ki nou bann dimoun deor i konpran byen ki mannyer pou bouze, ki mannyer keksoz pe ganny fer.

Devan nou Madanm Speaker, i annan *Employment (Amendment) Bill, 2025*. Lobzektif sa *Bill*, se pou retir sa bout ki demande ki en *appraisal* i ganny fer pou kapab fer kalkilasyon peyman trezyenm mwan saler.

E osi pou fer bann lezot lamannman nesaser pou ankadre lamannman prensipal. Amannman dan seksyon 46(c) *Employment Act cap 69* dan *principal Act*. Dan seksyon (1) pou *repeal* sa mo *and section 46(d) by repealing section 7*.

En travayer ki'n travay ki ti dan lanplwa pandan lannen in aret travay avan le 31 Desanm, i pou ganny selman en porsyon son trezyenm mwan saler lo en baz *pro rata*.

E sa i pou bann rezon swivan; Si en travayer i lo probasyon, e i deside pou li termin son lanplwa pandan ki i lo probasyon.

Si sa travayer i lo probasyon, e lanplwa i ganny terminen, son lanplwa in ganny terminen lo rezon *unsatisfactory performance*.

Si sa travayer son lanplwa i ganny terminen lo rezon lofans disiplin serye.

Pou fer antre apre seksyon 10/11 san izol provizyon dan *Act*, en anplwayer i kapab pey trezyenm mwan saler travayer

Seselwa, ki saler i tonm swa 45mil 450 oubyen pli ba.

En anplwayer ki pey en travayer Seselwa par lao R45 mil 450, sa diferans pou bezwen ganny pey *income tax* lo la parey i spesifye anba *income tax* e *Non-Monetary Benefit Act 273*.

San ignor sa provizyon dan paragraf b' lo seksyon 11, trezyenm mwan saler ki ganny peye anba sa seksyon i pou ganny *exempt* anba *income tax* and *Non-Monetary Benefits Act 273*. *Repeal Section 46 (d) of the principal Act. Amend Section 36 of the principal Act* dan paragraf D(d) *repealing after letters 46 (c) words and figures, letters or Section 46 (d)*.

Madanm Speaker, sa Lalwa pe adres en size enportan pou tou sitwayen Seselwa ki kapab sa dernyen 5an zot in vwar zot pa ganny ekoute, menm si pri lavi ti pe pet plafon.

Anliny avek *Manifesto United Seychelles*, ek enn parmi bann promes 10 zour ki pe ganny delivre la ozordi e dan son letan ki ti ganny promet pou ganny fer.

Sa Ladministrasyon *United Seychelles*, anba direksyon Dokter Herminie pa zis fer promes me i delivre. E i delivre dan lespas letan ki ti ganny promet.

Zanvye *2006, nou lafors travayer Seselwa a kapab benefisye ek sa ki zot merite. Nou konnen ki parmi bann prosedir lanplwa ant travayer ek anplwayer i annan sa rekour *grievance* ki deza an plas, ki a dispozisyon tou lede parti prenan.

I osi annan sa bann komitman kot bann pti biznes ki pa kapab pey zot 13enm Mwan parey Lalwa pe demande, ki pou annan en sipor finansyel ki Gouvernman pou met a zot dispozisyon. Bann kalite biznes ki tonm dan sa kategori.

Petet panel dan *reply* a donn serten leksplikasyon pou piblik la deor ki pe ekout nou. Nou lenformasyon ki zot annan konsernan sa sipor finansyel. E ki *mechanism* ki sipoze vin an plas. E kote sa bann kategori biznes pou ale.

Dan lepase Gouvernman ti pey serten sonm larzan pou travayer Seselwa ki travay kot *IOT*. Eski lannen prosenn sa group Seselwa zot ekspekte ganny zot trezyenm mwan saler zot osi parey tou lezot Seselwa ?

Sa osi nou ti a kontan si *panel* i annan lenformasyon la ozordi pou nou. Si non apre si sa bann detay i kapab ganny eksplike pou sa bann group travayer kot *IOT* konnen ki zot sityasyon pou ete an 2026

konsernan zot trezyenm mwan saler. Mersi Madanm Speaker.

(APPLAUSE)

MADAM SPEAKER

Mersi Onorab Gill. Onorab Lepathy.

HON NELSIA LEPATHY

Mersi Madanm Speaker.

MADAM SPEAKER

Mon ava bouz lo lot Manm. Onorab Larsen.

HON CECILE LARSEN

Mersi Madanm Speaker. Bonzour a tous spesyalman zabitan Au Cap ki a lekout. Madanm Speaker, letan Lasanble ti vot pou entrodwir trezyenm mwan saler, sa ti ganny fer avek en bi kler pou donn travayer en soulazman finansyel. E en rekonpans pou zot travay pandan lannen antye.

Me apre sa avek lentrodiksyon *appraisal* par ansyen Gouvernman, sa kondisyon ti vin en sours konfizyon, fristrasyon e menm konfli. Travayer pa ti konpran kriter, anplwayer ti aplik li diferan. E bokou fwa 13enm mwan ti vin en lentansyon plito ki en drwa.

Me Prezidan Herminie in retourn lespwar dan leker Seselwa. E i pe *practice* sa ki in *preach*. E sa lamannman ozordi i retir tou konfizyon. I dir kler, travayer i ganny son 13enm Mwan dapre Lalwa san okenn kondisyon *appraisal*.

Madanm Speaker, nou tou nou konnen ki *appraisal* i en bon pratik dan HR. Me i pa sipoze determin peyman 13enm mwan. E dan Sesel kot bokou ti deza pe lite avek lavi ser, servi *appraisal* pou determin trezyenm mwan saler ti en lenzistis.

Sa lamannman i fer li kler ki *appraisal* i kontinyen annan son plas, me pa pou deside si travayer i merit son 13enm mwan plen. Madanm Speaker, sa lamannman i anmenn en balans kot travayer i konnen zot pou resevwar zot 13enm mwan san konfizyon e zot drwa i ganny proteze anba Lalwa. An konklizyon sa lamannman i senp me son lenpak i gran. I tir konfizyon, i tir lenzistis e i anmenn plis proteksyon pou travayer. E i en bon lamannman e i en bon direksyon, e i an norm avek promes Gouvernman US. Pli bokou sekirite pou travayer e plis senplisite pou anplwayer.

Alors Madanm Speaker, mon pou donn mon sipor

Employment (Amendment) Bill, 2025 san okenn ezitasyon. Mersi Madanm Speaker.

(APPLAUSE)

MADAM SPEAKER

Mersi Onorab. Onorab Lepathy, ou'n pare? Onorab Lepathy.

HON NELSIA LEPATHY

Mersi Madanm Speaker. Mon demann en leskiz. Mon ti'n ganny en pti problemm avek *laptop*. Me avan mon komanse, si ou permet mwan ozordi bomaten mon oule pas mon senser kondoleans ansanm avek Kominote Grand Anse Mahe.

Mon oule pas kondoleans avek lafanmir Benstrong, Talma, bann staff e zanfan Lekol Grand Anse Mahe Primer. E osi lafanmir Moses e Allisop ki'n perdi zot pros. E ki Bondye i ava donn zot kouraz pou fer fas avek sa moman douloure ki zot ladan.

Madanm Speaker, mwan koman en Manm Lasanble Nasyonal ki'n ganny elekte. E ki pe fyerman reprezant zabitan Grand Anse Mahe e Lepep Seselwa, mon pou donn mon sipor sa lamannman ki'n ganny prezante pou kapab re entrodwir enn parmi bann

benefis pli enportan pou nou bann travayer Seselwa.

Sa lamannman i en re afirmasyon nou langazman koman en Gouvernman ki responsab. E ki annan tou travayer Seselwa a ker. I langazman nou Gouvernman pou rekonnet travay dir ki nou pep i asire ki zot kontribisyon dan lekonomi i osi ganny rekonpanse.

Madanm Speaker, nou bezwen rekonnet ki depi ler nou pei in ganny son lendepandans an 1976, nou lekonomi in ganny transformen. Prodiktivite in ogmante kot nou prodwir nasyonal brit in agrandi lannen apre lannen, e sa i fer li nesesser ki byennet endividyel travayer i osi ganny amelyore. Nou osi rekonnet Madanm Speaker, ki pou nou tou benefisye plis, nou bezwen travay pli dir. Travayer i bezwen vin pli konsyan e pli disiplin.

Nou annan en lafors travayer ki relativman zenn dan nou pei, e merit pare pou zot aprann pou ganny bann nouvo *skills*, bann nouvo konpetans pandan bann lannen ki devan nou. Sa pou permet ki nou pei Sesel i zourir en nivo konfortab devlopman ekonomik. Nou bann zenn travayer, zot devret travay avek dedikasyon, e avek lafyerte profesyonnel dan sa ki

zot fer. E sa pou anmenn plis rekonpans finansyel pou zot.

Nou bann sef dan Gouvènmman, e dan bann biznes prive zot osi zot annan en gran rol pou zwe pou garanti en meyer servis, e plis prodiktivite dan landrwa travay.

Madanm Speaker, mon napa okenn dout ki responsabilite pou amelyor prodiktivite i depan bokou lo bann sef oubyen bann anplwayer dan bann landrwa travay osi.

I bezwen kler ki prodiktivite i depan lo ki mannyer ki meyer fason bann resours i ganny servi dan en landrwa travay, swa kapital, lafors travay, materyo oubyen bann masin pou prodwir servis.

Madanm Speaker, sa ki kler ozordi dan bann servis e prodiksyon, nou kapab ganny plis prodiktivite avek mwens resours. Se pou sa rezon ki i reste touzour neser ki nou fason dirize e nou fason fer e amelyore, e fason ki nou servi teknolozi, i osi vin pli efisyan. E ki san dout sa pou anmenn plis prodiktivite.

Permet mwan donn en legzanp vi ki mon distrik Grand Anse Mahe i en distrik kot i annan prodiksyon agrikol mon

a donn en legzanp dan sa domenn.

Si demen bomaten par egzant lo en laferm, ou kontinyelman donn en travayer en pyos ek en lapel pou li fouy trou, definitivman ou prodiksyon pou reste parey oubyen i riske avek demann i tant pou li abese.

Me si ou deside ki ou donn ou travayer en masin - par egzant, en mason *excavator* pou li fouy trou, pou li kapab plante. E definitivman la i pou fouy plis trou definitivman, e nivo prodiksyon pou ogmante. Sa ti zis en legzanp.

Madanm Speaker, annou retourn en pti pa an aryer e tras larout trezyenm mwan saler. An 2016, anba ladministrasyon ansyen Prezidan Faure trezyenm mwan saler ti ganny entrodwir. E sa ti en gran pa ki Gouvènmman sa letan ti pran pou amelyor byennet travayer.

I domaz ki an 2020, Ladministrasyon LDS ti deside sispann sa lapey. E zot ti dir ki sa i rezon akòz lepidemi COVID-19 nou lekonomi ti dan en kriz. E Gouvènmman sa letan ti dir ki sa ti en sakrifis neser. Me pou plizyer travayer sa ti en dezapwentman total.

An Oktob 2021, desizyon ti repete pou en dezyenm lannen. Travayer ti kontinyen

travay pandan pandemi. Me zot ti ganny dir ki lekonomi i ankor tro frazil. Menm si bann travayer ti proteste, ki lavwa travayer pa pe ganny tande. E ki zot ti merit omwen ganny 50poursan zot trezyenm mwan saler pou soulaz zot.

Me sa lapel ti antre dan en kote zorey, e i ti sorti par lot kote definitivman. Apre plizyer lager, e deba dan Lasanble Nasyonal kot Lopozisyon sa letan ti pe met devan Gouvernman pou re entrodwir trezyenm mwan saler.

An 2022, nou ti war sa menm ladministrasyon ti deside re entrodwir li. Me saler ti lo en lot lanpler, kot sa ti avek en sistenm peyman trezyenm mwan ki ti pou ganny fer avek en kondisyon ki ti baze lo performans travayer kot 50 poursan zot saler ti garanti. E sa lot 50poursan ti baze lo zot performans.

Plizyer travayer pandan sa letan ti santi zot ganny pini, malgre zot ti sey zot mye dan zot landrwa travay. E bann anplwayer zot, zot ti ep fer fas avek bann fardo administratif kot ti annan sitan bokou *paperwork*. E an total lespri par deryer sa benefis mon vwar li ti perdi.

Madanm Speaker, mon oule profite osi pou eksplor en

pti pe lezot pei ki mannyer zot tret trezyenm mwan saler. Bann pei *Scandinavian* par egzant zot pa'n zanmen bezwen fer trezyenm mwan vin legal.

Me sa in plito en zafer kiltirel e endistriyel ant bann travayer, linyon travayer ek bann anplwayer. Madanm Speaker, i enportan not stati sa bann pei e zot pep osi. Bann pei tel ki *Norway*, *Sweden*, zot parmi bann pei ki annan larisés. E zot bann pei ki lendeks devlopman imen i enn pli o dan lemonn, san oubliy nou pei vwazen Moris ki li trezyenm mwan saler i enn ki legal.

E nou isi Sesel, Parti *United Seychelles* koman sa parti progresis, e ki krwar dan byennet travayer Seselwa, e dan filozofi prosperite pou tou, nou krwar ki trezyenm mwan saler i merit en rekonpans pou tou travayer Seselwa.

Sa i ava vin en siny apresyasyon pou bann anplwayer Gouvernman e prive, pou travay dir e devlopman ki bann travayer Seselwa i mete dan zot travay. E la bomaten, mon bann koleg ansenyan, mon bann ansyen koleg ansenyan ki pandan sa bann letan zot ti pe santi zot pa pe ganny valorize dan zot profesyon ;

Ou sa zabitan dan mon distrik, ki ti vwar li difisil pandan sa bann moman festivite sirtou pou fer ou zanzan zwaye avek en pti kado, akòz ou ti pe mazin en ou ti pou bezwen anmas ou larzan pou ou kapab donn sa zanzan son sak lekol, e son bezwen pou al lekol larantre, Vwala en lespwar pou zot tou.

Sa i zis en komansman me pli tar mon konnen i pou annan ankor benefis ki zot koman bann travayer Seselwa zot pou benefisye anba la. Byensir Madanm Speaker, trezyenm mwan saler pa zis li ki ankouraz travayer pou performen. Kondisyon travayer osi dan letablisman travay i osi enportan.

Mon ti vremen enpresyonnen pou vwar kondisyon travay e lenfrastruktir ki'n met an plas pou byennet travayer dan enn nou lotel, Lotel *Avani Hotel* Barbarons ki dan distrik Grand Anse Mahe. Ki mon'n ganny sans vizite semenn pase.

Son lanvironnman travay ti enn ki ekselan, definitivman i enn ki mon konnen i ankourazan pou son bann travayer. Alors, mon bann koleg Manm Onorab sa i moman pou nou azir pou pas en Lalwa ki

koz lo valoriz nou travayer Seselwa.

E pou donn nou travayer rekonesans ki zot merite. E mwan Madanm Speaker, mon pou donn tou mon sipor sa lamannman. E mon demann tou mon bann lezot koleg Onorab ki annan nou bann travayer Seselwa a ker. E ki apresye zot devouman e kontribisyon ki zot anmennen dan nou lekonomi pou osi donn zot sipor. Mersi Madanm Speaker.

(APPLAUSE)

MADAM SPEAKER

Mersi Onorab. Onorab Toussaint.

HON JEAN TOUSSAINT

Bonzour Madanm Speaker. Bonzour Minis. Bonzour tou Manm Lasanble. Bonzour tou bann dimoun ki pe swiv Lasanble Nasyonal, spesyalman bann zabitan distrik Anse Boileau. Madanm Speaker, sa lamannman ki nou'n trouv anmennen ozordi pou nou koz lo la or debat lo la, pou donn nou pwennvi lo la i enn ki ou a krwar i vremen enportan e vremen nesaser.

E san dout i en soulazman pou si pa tou me mazorite nou pep ouswa nou bann travayer

Seselwa. Parey in ganny fer sorti o paravan lentrodiksyon sa Lalwa 9an pase ti enn ki ti anmenn en souf parmi nou bann travayer. E apre ki i ti'n ganny *repeal* parey nou kapab dir, ganny re entrodwir ankor an 2022, avek zisteman provizyon pou selman 50 poursan bann travayer Seselwa ganny peye trezyenm mwan saler. Nou Gouvernman US dan kontra sosyal e promes ki in fer pou konpanyan relasyon avek trezyenm mwan saler pou fer li retournen in ganny delivre.

E ozordi sa Lalwa se pou fer ki sa 50 poursan ki ti *compulsory* sa 50 poursan ti bezwen baze lo *appraisal* aprezan pe ganny retire. So, 100 poursan trezyenm mwan saler pou ganny peye avek nou bann travayer ki pe fer par anba R45 mil 450.

E sa pou napa okenn taks ki pou ganny mete lo la. I pou ganny regarde pa koman zis en faver, nou konnen. Nou tou nou konnen ki ki poudir i annan travayer Seselwa deor la ki vreman travay, ki vreman donn en kantite dan zot landrwa travay. E parfwa pa neseserman ki zot dan pe travay dan meyer kondisyon posibil, me zot fer li avek devouman. Mon pou donn petet serten legzanp. I annan dan mon distrik i annan

lenfrastruktir Gouvernman ki pe *operate* an se moman kot pa neseserman dan en lanvironnman ki *conducive* ouswa ki ankourazan pou travay ladan.

Me sa bann travayer par egzanp lo kote lasante e bann travayer ki devoue, e zot donn tou zot letan lakominote, pou zot kapab donn en servis ki satisfezan e alaoter pou nou manm piblik dan distrik. Lapresyasyon osi i bezwen ganny rekonnet si mon met li koumsa par nou bann pti biznes.

Menm bann dimoun ki pe angaze dan bann loperasyon pti biznes, ki in vreman pandan sa bann dernyerman lannen lamazorite zot tou zot pe trimouse, pe sibir pou zot kapab fer progrese ouswa fer marse zot pti biznes.

E la nou vwar osi ki Gouvernman in fer provizyon, mazin zot met en sonm larzan pou zot kapab ankouraz sa bann travayer ki pe ed zot fer marse, e fer devlope zot pti biznes. Sa i bann linisyativ ki mwan, mon vreman salye. San dout i bann linisyativ ki osi ganny sa e fortman par mon bann kolegi isi dan Lasanble.

So, an dizan sa mon ti a osi fer referans avek linisyativ ki'n ganny pran par ki lepase in

ganny pran par bann biznesmenn, pou fer antre osi sa provizyon pou kouper bann zenn *trainee*, bann ki pa ankor vreman antre ouswa ganny anploye formelman avek zot pou osi pey zot ouswa donn zot en trezyenm mwan saler.

Sa i bann linisyativ ki mon ti a swete. E mon demann bann lezot biznesmenn la deor, pou zot osi ankouraze e pran menm direksyon. Akoz parfwa i annan sa bann zenn ki vreman menm si zot napa sa gro kalifikasyon, ouswa sa *expertise*, me selman zot devouman avek rannman ki zot anmennen dan travay, zot egalman fer diferans dan pos bann biznesmenn a lafen dizour.

So, avek sa 2 mo mon ti a kontan osi dir mersi nou Gouvernman pou sa linisyativ, akoz byensir lafen lannen i annan bann zanfan ki pou en pe pli zwaye.

E komansman lannen osi i pou en presyon ki pou ganny tire lo bann paran sirtou avek bann zanfan ki pe al lekòl. Ki swa i pou nouvo, ki se swa i pou kontinyen. E i toultan annan en demann pou fer provizyon avek bann keksoz materyo lekòl pou lannen prosenn.

E i a osi soulaz bann ki pe vwar li difisil pou fer 2 bout zwenn, sirtou nou bann

dimoun ki en pe pli vilnerab. Avek sa 2 mo Madanm Speaker, mon pou donn tou mon sipor amannman sa Mosyon. Mersi bokou.

(APPLAUSE)

MADAM SPEAKER

Mersi Onorab. Onorab Athanase.

HON KENETH ATHANASE

Bonzour Madanm Speaker. Bonzour tou Manm Onorab. Bonzour Minis avek ou delegasyon. Madanm Speaker, mwan koman en Manm Elekte pou distrik Ile Perseverance. E mon annan travayer dan nou distrik e dan Sesel a ker, ki apresye zot devouman ki zot annan anver zot travay.

Mon pou donn mon sipor total sa lamannman lo trez mwan saler. Apre tou Madanm Speaker, nou Gouvernman i enn pou tou me pa zis pou en bann. Nou krwar dan montre lapresyasyon nou bann travayer Seselwa, swa dan Gouvernman ouswa dan prive.

Madanm Speaker, wi, ozordi nou pe vin anmenn en lespwar pou nou bann travayer. Me sa i osi en moman pou nou travayer reflexir e asire ki pandan lannen nou pe travay e delivre. Alor Madanm Speaker,

mwan mon pe siport lamannman. E demann mon bann koleg Onorab osi pou donn zot sipor. Mersi.

(APPLAUSE)

MADAM SPEAKER

Mersi Onorab. Onorab Trevor Louise.

HON TREVOR LOUISE

Bonzour Madanm Speaker. Bonzour Minis ek ou delegasyon. Bonzour tou Manm koleg Onorab, e tou dimoun ki a lekout. Madanm Speaker, mon pou komans mon lentervansyon avek en pti kotasyon en. Ki dir ou koumsa e mon site, “*When we honor the thirteenth month, we honor the people who bult this nation everyday*” fen sitasyon.

Sa lamannman lo sa Lalwa Madanm Speaker, i enn ki’n vin dan en moman ki tre agreab parske i anliny avek manifesto *United Seychelles*. E i anliny avek konpany ki’n ganny fer pandan sa dernyen 5an si oule, ki Dr Herminie atraver son *wisdom*, son lasazes, son leksperyans osi koman en dimoun ki’n dan politik a sa letan, tou sa letan in kapab vin avek en manifesto ki reprezant lavwa Seselwa.

Sesel an se moman pandan sa bann dernyen 5an, ou’n tann en kantite konplent si oule par bokou travayer Seselwa ki’n dir ou koumsa ki trezyenm mwan ler ti’n ganny fer sa lamannman lo la pandan sa bann dernyen letan ki zot pe donn trezyenm mwan zot bann dalon.

Si ou sef pa kontan ou, ou pa ganny trezyenm mwan ou ganny zis sa bout ki Gouvernman i donn ou. Ou pa ganny sa lot bout ki ou sipoze gannyen, aköz zot dir ou koumsa i ganny redwir baze lo *appraisal*. So, i annan ki ti pe servi sa koman en zouti pou sey pini lezot dimoun.

E atraver sa lamannman nou pe onor komitman, devouman e travay nou bann Seselwa otour Mahe, Praslin, La Digue e lezot zil osi.

Avek sa lamannman petet ti a bon osi koman Minis i la, i donn nou serten leklersisman lo serten keksoz, i pou enportan pou konnen ki atraver *Seychelles International Trade Zone (SITZ)* ki byensir *IOT* i tonm ladan. E mon konnen ki vi ki Gouvernman i en *shareholder* ladan posibleman zot pou antre pou pey sa bann *staff*. Mwan mon ti kontan petet anvi konnen ki bann lezot biznes ki tonm anba *SITZ* ki

annan Seselwa, ki bann mezir ki pou ganny pran pou zot ?

E osi an term *succession plan*, koman en Minister i pou enportan ki letan nou pe koz lo donn trezyenm mwan saler dimoun, i pou enportan ki nou met osi lanfaz lo en *succession plan* dan sekter prive ki pou asire ki Seselwa osi pli tar i kapab pran serten pozisyon kle dan nou pei.

E mon konnen osi ki Minister lanplwa i annan sa *HR Forum*, petet sa i ava en zouti osi ki zot a kapab servi pou *empower* nou bann *HR* pou zot kapab *empower* nou bann *staff*, nou bann travayer Seselwa.

Me selman kot i konsern sa trezyenm mwan, i pou enportan osi pou nou konnen vi ki i annan biznes dan en sans, ki pa pou forseman malgre i en keksoz legal ki pa pou forseman dan en pozisyon pou zot kapab pey sa bann dimoun toudswit sa trezyenm mwan saler, ki zot an konfli an defo avek Lalwa.

Si Minis en letan donner i kapab petet dir avek sa Lasanble ki bann mezir ki Minister pou vin avek, pou asire ki sa Lalwa pa zis enpoze, e kot i ava annan pinisyon pli tar. E bann businessman i ava kapab ganny en rekour. E par ki fason sa i kapab ganny fer.

So, i pou enportan osi pou nou koman en nasyon konpran poudir nou pe ganny en trezyenm mwan wi, me selman nou osi annan responsabilite ki vin avek. So, koman bann travayer Seselwa nou bezwen asire ki nou donn en servis ki o nivo avek nou Seselwa.

Nou bezwen asire ki nou delivre baze lo *scope* travay ki nou ganny donner. E nou bezwen asire ki *at least* nou fer *the bare minimum* ki ganny *required of us as* travayer. Parske bokou fwa, ou vwar ki malgre i annan ki pe ofer servis zot pa forseman annan sa lanvi pou travay.

E mon swete ki atraver sa mezir ki'n ganny pran pou fer - sa lamannman zot a kapab en pti pe pli motive. Parski la nou pa pou kapab dir ki nou pe ganny pini. Nou pa pou kapab dir ki nou sef pa kontan nou, pa'n donn nou, nou lot bout larzan ki vin avek. So, nou bezwen asire ki nou pe delivre. E mon swe i se ki ler sa lamannman i ava pase, i ava annan osi bokou ledikasyon ki ava ganny fer atraver Minister, bann Minister partner kle ki pou dan sa proses pou asire ki tou dimoun i konn zot responsabilite parey zot konn zot drwa. Mersi.

(APPLAUSE)

MADAM SPEAKER

Mersi. Onorab Sandra Sultan.

HON SANDRA SULTAN

Madanm Speaker, Minis avek ou lekip, bann Manm Onorab, zabitan Anse Aux Pins bonzour. Madanm Speaker, sa *Employment (Amendment) Bill, 2025* i baze lo en reform enportan dan Lalwa Lanplwa Sesel.

I fer referans avek tir kondisyon evalyasyon performans dan kalkil, e peyman trezyenm mwan saler ki pa ti pe ganny servi avan pou determinen si en travayer i ganny son bonous oubyen non. Lobzektif prensipal se pou soulaz travayer ki ti pe ganny viktimize anba sistenm *LDS*.

E osi fer konpansasyon vin pli ekitab. Bokou travayer ti pe depan lo sa 50 pousan ki Gouvènmman ti pe ofer, akòz sa lot 50pousan ti vin en form lesklav modern. Si ou sef pa ti satisfè menm si ou ti pe donn tou dan travay, ou ti ganny penalize.

Madanm Speaker, mon'n menm *witness* kot *outstanding performance* ti ganny tire dan evalyasyon akòz sef i dir napa personn ki parfe. Sa i fer mwan mazin bann manman ki bezwen

esper *day care* ouver avan pran bis pou al travay.

E pa bliy sa trafik dan bomaten ki ti pe afekte zot *appraisal*. Menm si zot plenmyen zot sef pa ti tande. E sa ti demoraliz moral travayer. I ti kre lenzistis akòz bann ki pa ti pe fer fas avek sa bann sityasyon, par egzanp bann ki pa ti rankontre problem trafik.

E bann ki zanfan ti pli gran ti pe benefisye anba sa sistenm *appraisal*. Mon krwar sa nouvo lamannman i anmenn plis lazistis e senplisite dan travay. I pou ede amelyor moral travayer, e for konformite pli fasil pou anplwayer.

Mon antyerman pare pou aprouv sa *Bill* koman parti Reform Sosyal ek Lanplwa pou byennet travayer e konpansasyon ekitab. Mersi.

(APPLAUSE)

MADAM SPEAKER

Mersi Onorab Sultan. Nou ava pran en pti *health break*, akòz Minis pa pe santi li tro byen. Nou ava retournen 10er edmi. Mersi.

(BREAK)

MADAM SPEAKER

Bon, nou ava rebran nou travay, nou ankor lo deba. Nou lot enterven an Onorab Georges.

HON BERNARD GEORGES

Mersi Speaker. Bonzour Speaker. Bonzour Minis avek ou delegasyon. Bonzour tou bann koleg Onorab, e tou dimoun ki pe swiv nou.

Madanm Speaker, sa size ki devan nou la i en size sansib, e en size ki nou devret apros li avek bokou konpetans.

I en size ki i annan en potansyel pou diviz nou popilasyon, me i annan osi en pour nou kapab servi sa loportinite parey enn zot Manm in fer li bomaten pour nou elarzi sa deba.

Akoz ou vwar Madanm Speaker, sa i pa en keston politik sa zafer 13enm mwan, e mon regrete ki apart enn zot Manm ki'n koze bomaten, tou larestan in prefere fer politik avek sa size 13enm mwan. Akoz ou war 13enm mwan i pa provens en serten kategori dimoun, i en keksoz ki tous tou dimoun, tou travayer ki ganny mwens ki R45 ekek mil, i ganny afekte.

E nou bezwen regard sa size avek sa perspektiv, e non pa e mon tris pou dir, non pa koman en size pirman politik. E i regretab, i regretab ki nou'n

atann depi bomaten litani sa ki devan nou ozordi i montre lasizes Prezidan Herminie ; i en lakonplisman promes 100 zour, i en keksoz ki en parti progresis i fer ki annan travayer a ker e ki onor travayer Seselwa.

Nou'n al menm ziska proklanm ki size 13enm mwan i ganny servi koman en size lesklavaz modern, bezwen tousala Madanm Speaker, nou bann dimoun nou bann lezislater, nou bann politisyen e nou konnen ki sa size i en size ki tous tou popilasyon travayer e i nou devwar pour nou regard avek en lobzektif ki pa neserman politik partizan.

E Onorab Trevor Louise, bomaten ler in koze atraver ou Madanm Speaker, in konpran sa tre byen, akoz li in realize ki sa size 13enm mwan i annan de kote. I annan kote ed travayer ki ti son bi, me i annan kote osi obliz travayer desarz zot responsabilite ki lot kote, e ki apard Onorab Louise, personnn ki'n koze lo lot kote pa'n touse.

Sa i pa en *reward*, sa ki nou pe fer la i pa en *reward* ki Parti US pe vin donn Seselwa. I en sanzman dan lafason, dan filozofi dan de *policy* Gouvernman dan lafason ki 13enm mwan i ganny aplike, e nou devret vwar li dan sa loptik

mon bann zanmi, mon bann koleg Onorab.

E mon salye Onorab Louise, ki'n war sa li e ki'n, e fotespere ki'n donn en direksyon pour bann Manm ki pou koz apre mwan lo lot kote labab.

War - si nou repet en fraz ki'n ganny repete bokou fwa depi bomaten, Parti US pe fer 13enm mwan retournen. Nou pe anbet Lepep, nou pe anbet Lepep aköz 13enm mwan in la toultan li, apard sa lan dan COVID ler i pa ti la, me in la toultan li.

Napa personn ki pe fer li retournen, aköz sa ki personn pa ankor dir depi bomaten, se ki 13enm mwan tou travayer ti ganny drwa ganny son 13enm mwan *full* 100poursan, zot tou.

Sa lide ki performans ti ganny servi koman en lesklavaz modern i napa fonnman. Si enn de anplwayer ti servi sa koman en pinisyon i pa oule dir ki nou bezwen tir tou sa Lalwa aköz enn de travayer in servi sa koman pinisyon.

Tel parey, nou pa kapab dir ki aköz enn de anplwayer e mwan mon enn ki zanmen in demann en *performance*, aköz mon satisfè avek travay mon bann travayer, e mon donn zot 13enm mwan, nou pa kapab, nou pa kapab polariz sa deba

mannyer in ganny polarize, nou bezwen konpran li dan son lanpler e admet filozofi deryer 13enm mwan e lafason ki 13enm mwan pou ganny servi pou ogmant lo en kote performans travayer, me lo lot kote pou *reward* zot pour en lannen travay dir.

Alor Madanm Speaker, mon krwar ki nou bezwen re met sa deba lo en bon *track*, aköz sansan nou pe anvoy en move mesaz deor laba.

13enm mwan pa en keksoz ki devret diviz anplwayer avek anplwayer. Anplwayer avek anplwayer dan tou landrwa *travay is one and the same*. Anplwayer i bezwen anplwayer, anplwayer i bezwen anplwayer. Nou pa kapab fer krwar ki bann anplwayer an zeneral se en bann dimoun ki pe zis sis lasyer anplwaye, e ki anplwaye lo lot kote zot sa ki zot fer byen mal *whatever* zot bezwen ganny proteze a tou pri.

It's a wrong message, e mon pa swete ki sa se mesaz ki nou anvoy deor ozordi. E Minis i konn sa tre byen kontan ki Minis Lanplwa, ki ou bezwen sa sinerzi ant anplwayer avek anplwaye, ou bezwen promot sa sinerzi.

Ou pa kapab vin devan e sey diviz sa ki egziste, an dizan nou lo nou kote nou protez

anplwaye akòz nou bezwen met anplwaye o sant devlopman nou'n en parti progresis nou pou fer tou keksoz pou siport nou anplwaye. E bliye ki sa anplwaye son devwar, oubyen son fason son travay i depan lo kreasyon biznes ki bann anplwayer i fer.

E *at the same time* nou pa kapab zis protez anplwayer pour zot sis lo lasyer anplwaye. Tou lede i move, e tou lede pa akseptab, se pour sa rezon ki nou devret vwar sa deba ozordi dan en fason bokou pli larz ki en deba politik ki zot, zot in tire nou, nou pe re mete.

It's much more than that Madanm Speaker, e si nou pa realiz sa nou pa pe fer nou devwar koman lezislater bomaten, e nou pa pe fer nou devwar koman bann reprezantan Lepep ki enkli anplwayer ek anplwaye, e ki nou, nou isi bezwen vin koz pour zot.

Mon komans koumsa Madanm Speaker, akòz i annan en keksoz ki personn pa'n dir, i annan en keksoz ki bokou zot, zot pa konnen. Sa se ki sa lide 13enm mwan la se pa zot lenvansyon 13enm mwan se nou lenvansyon, se nou lo sa kote latab se Parti *SNP* ek *LDS* ki'n entrodwir lide 13enm mwan pour la premye fwa.

E mon a dir zot akòz mon dir sa, akòz mwan Bernard Georges, Manm Elekte pour Les Mamelles Manm Egzekitiv *SNP at the time* mwan mon ti la ler sa desizyon ti ganny pran pou entrodwi lide konsepsyon en 13enm mwan dan lasosyete Seselwa.

E mon rapel tre byen ki ti arive, koman nou ti fer sa e nou ti fer sa dan lepok 2015-2016 akòz ler ti'n annan en *upheaval* dan- ou ti pou annan en *upheaval* dan lafason ki fer politik isi Sesel kot an 2016 nou ti *end up* mazorite an koabitasyon avek Gouvernman, e ki Prezidan Michel pe apre in demisyonnen in ale.

Ler nou ti, ler nou ti entrodwir sa lide 13enm mwan e rikord i montre ki se nou ki ti fer, konnen ki ti arive? Gouvernman Mr Michel, in taye e in akiz nou konmkwa nou pe vol son lide, akòz zot lide zot ti pe ganny diskite dan zot Komite Santral *or whatever*. Pa ti ankor sorti, nou ler nou'n fer sorti sa lide zot in vin akiz nou konmkwa nou nou'n vin vol zot lide.

Annou dir keksoz mannyer i ete, 13enm mwan pour Lepep Seselwa laba deor ki pe swiv 13enm mwan se en lide ki sorti kot *SNP* kot *LDS*, i pa sorti Parti *US*, annou konpran sa tre byen.

E zot konnen Madanm Speaker, akòz ki nou ti vin avek sa lide? Akòz nou ti rekonnet tou sa ki zot in dir bomaten la, ki travayer i bezwen annan en konpansasyon pour zot travay.

Me filozofi sete pa nou a vin lo drwa taler, filozofi sete pa pou annan en 13enm mwan pou en rezon politik. Filozofi sete akòz nou ti realize a sa lepok parey ozordi Seselwa an zeneral bann ki ganny saler mwens ti napa sifizaman *saving*, ti napa posibilite, ti napa posibilite fer en *saving*.

E Onorab Ramkalawan, ler i ti asiz dan sa sez koman Leader Lopozisyon ti toultan dir, e i ti annan parfetman rezon, e se enn bann rezon akòz nou'n anmenn sa Lalwa.

I ti dir, "tro Seselwa sel larzan ki zot annan se larzan ki dan zot portfey." E nou ti bezwen fer en keksoz pou soulaz sa bann dimoun, akòz zot ti'n seye zot menm nou tou nou konnen bann Seselwa, mon apel zot bann Seselwa ordiner, bann ki pa tous bokou larzan e ki pa kapab met en larzan lo en kont labank en *saving* tou le mwan, zot zwe sit.

Nou tou nou war sa, zot zwe sit dan en fason pou fer en lekonomi pou fer en fason ki zot pou fer en *saving* ki zot pa pou kapab tous sa larzan akòz si zot

kit li dan zot lanmen dan zot pers oubyen dann zot kont labank zot pou al tire.

Alors, sa ki zot fer? Zot zwe sit nou fer sir ki sa larzan i ganny proteze kont zot menm. E nou, nou ti krwar nou bezwen al pli lwen ki sa, nou bezwen soulaz bann travayer Seselwa. E se pour sa rezon ki nou'n anmenn sa lide 13enm mwan. Me in ganny pran, e in ganny anmenn isi, e nou satisfè akòz sete nou lide, e se pour sa rezon ki ler Lalwa ti vini nou pa ti opoz sa Lalwa nou.

Nou ti byen fyer kantmenm ti nou lide en lot dimoun pe anmenn devan Lasanble, nou ti an mazorite se nou ki'n permet ki sa Lalwa i pase, si pa ti nou Lalwa pa ti pou'n pase.

Alor, avan ki zot pran sa koman zot pti baba, mazine ki i pa zot pti baba. Se nou ki'n donn nesans sa lide, e se nou ozordi ki annan drwa koz labous plen lo 13enm mwan e ki manner 13enm mwan i devret antre dan *policy* Gouvernman e dan filozofi travay isi Sesel.

Madanm Speaker, mon ti dir taler ki enn bann largiman ki'n ganny anmenn, nou'n tann sa depi dan kanpanny US ki 13enm mwan i en drwa.

Minis in repet sa ozordi ankor enn fwa. 13enm mwan i en drwa ki tou dimoun i annan, alor i pa kapab size en performans, size en *performance indicator*.

Nou pa kapab fer sa, aköz i en drwa tou dimoun i bezwen ganny li. *False*, sa se en keksoz ki Prezidan Herminie, in mansyonnen dan en *rally* politik e ki zot tou zot in tay avek.

Kestyon a rezon mon dir sa i pa vre Madanm Speaker, se, me si i ti en drwa, si i ti en drwa aköz ki in vin en drwa la? In vin en drwa la depi kanpanny 2025 ?

E si i ti en drwa ki en parti progresis ki zot, zot in defini zot lekör ti anvi fer pour Lepep Seselwa, aköz ki zot pa'n fer li depi le 5 Zen 1977 ler zot ti'n vol pei?

Aküz si ti en drwa e ki zot, zot ti en parti progresis ki ti pe travay pour Lepep Seselwa, aköz ki zot pa'n anmenn li an 1977? Aköz zot in esper nou an 2015?

Me *worse than that*, si i en drwa aköz i pa dan Lartik 35 nou Konstitisyon ki mansyonn bann drwa *including the right to work*? Aköz i pa la? Aköz i pa la? Aköz bann dimoun ki ti drafte Konstitisyon, nou pa ti la nou ti *SPPF* avek *DP* ki ti drafte

Konstitisyon, e Prezidan Herminie, ti en manm lo sa Komisyon.

I ti la ler Konstitisyon ti ganny drafte. Aköz zot pa ti met li dan Lartik 35? I fek vin en drwa la? Se prezan ki, se prezan ki zot in leve dir, “bon zafer la la en taktik ki nou pou al bat *LDS* avek. Nou pou dir i en drwa e se pour sa rezon ki i bezwen ganny aplike a 100poursan.”

La la zot largiman, en largiman eski mwan pou dir, me i en largiman fay. Aköz si i ti en drwa, zot ti pou'n fer li antan ki sa parti progresis ki annan Lepep Seselwa o sant devlopman zot ti pou'n fer li depi sa lepök.

Madanm. Madanm Speaker, nou ganny dir ki 13enm mwan pa kapab, pa kapab vin size performans travayer aköz i en drwa. Performans travayer sa i ava e Minis in dir nou bomaten i ava edik promosyon, logmantasyon saler, ek *training*. La la sa trwa rezon aköz ki ou pou annan en *performance indicator* oubyen en *performance review*.

Prodiktivite pa antre ladan li, li 13enm mwan ki ou prodwir ki ou pa prodwir, ki ou absan ki ou pa absan, ki ou travay ki ou pa travay, ki ou reste apre ler oubyen ki ou trenn lipye tou

dimoun i ganny drwa annan akoz i en drwa.

E se la kot zot, kot zot in pran en *wrong turning*. Akoz si li i en drwa, si 13enm mwan i en drwa akoz ki, akoz ki tou bann lezot keksoz *training*, ogmantasyon saler eksetera i pou vin atraver en performans? Akoz nou pa dir, “*ok fine*, 13enm Mwan i en drwa, alor tou bann lezot keksoz nou a fer li vin en 14enm mwan. Akoz nou pa fer sa? Akoz zot, zot pa fer sa? Akoz zot konnen i en trou san fon. Akoz si 14enm mwan i vin en drwa nou pou bezwen rod en 15enm mwan.

Zot konnen ki sa pa pou marse, akoz pei pa pou kapab *afford*. Alor, sa ki zot fer zot le kay lo 13enm mwan, e anvoy tou bann lezot keksoz lo *training*, lo logmantasyon saler, lo promosyon.

Be tou mannyer sa i marse, ki ou annan 13enm mwan ki ou napa 13enm mwan Madanm Speaker, mon bann koleg Onorab, tou mannyer.

Nou performans i pou edik, i pou fer arive en promosyon oubyen en logmantasyon saler oubyen en *training*, pa bezwen 13enm mwan pour sa, *it's there it's built into the system*.

Alor, akoz nou pe akfer nou pe fer sa diferans ant en

13enm mwan avek en avek en *bonus*? I en lide artifisyel ki'n ganny servi zis pou fer politik e zis pou anmenn zot o pouvwar ozordi.

Me en keksoz ki zot pa'n dir nou, e ki mwan mon ti ava enterese konnen, en keksoz ki zot pa'n dir nou ditou se ki kantite dimoun, ki kantite anplwaye, ki poursantaz anplwaye ki pa'n ganny 100poursan? Akoz zot tou zot in ganny 50poursan.

Ler zot dir zot pe fer retourn 13enm mwan, zot bliye dir ki 50poursan 13enm mwan in la toulant sa, si zot pe fer retourn en keksoz zot pe fer retourn 50poursan zot pa fer retourn 13enm mwan, 13enm mwan i la li.

Me menm lo sa 50poursan, akoz ki Minis pa'n dir nou ozordi ki poursantaz travayer isi Sesel ki ti pe ganny mwens ki 100poursan? E dan sa poursantaz ki kantite ki ti pe ganny zis 50poursan? Akoz bann ki ti pe ganny 75 oubyen 80 oubyen 85poursan zot logmantasyon ki zot pou gannnen la apre sa 13enm mwan i fay i zis kekfw a en R1,000-R2,000 i pa fer okenn sans.

Zot pa dir sa avek Lepep, fer kalkil zot menm, pran en saler mwayenn R15,000. 7,500

in fini ganny peye li i garanti i reste zis R7,500. Si ou'n ganny 75poursan dizon, i pou vin zis 3,700 e diviz sa par 12 konbyen i vini R300 par mwan. Setou ki zot pe, setou ki zot pe koz labous plen ?

Because basically that's the reality. War ler ou fer politik, e ou pa'n anmenn statistik e ou zis vin koz drwa ek performans se sa problem ki ou pou gannnen. Akoz ki zot pa'n anmenn sa statistik pou dir nou isi e pou fer zot largiman vin pli for?

Akoz zot konnen Madanm Speaker, ki zot napa en largiman - zot largiman i enn ki pirman politik, nou pe lager pour Seselwa nou pe lager pour travayer alor nou pe fer retourn 13enm mwan. *False, false, false.*

Nou Madanm Speaker, nou, nou ki asiz lo sa kote latab e ki'n anmenn sa lespri 13enm mwan se nou menm nou ki ti realize, e ki'n ekout travayer deor ki ankor pe dir sa menm zafer ozordi la, akoz se pa nou ki pe dir sa ki mon pe dir la ozordi, se travayer deor laba se zot bann travayer zot menm ki konsyansye, ki travay, ki reste apre ler, ki vin Sanmdi ki pe dir, “be akoz mwan mon devret ganny menm kantite saler ki sa enn ki trenn lipye.”

Sa nou pa mazine zot sa? Nou pa mazine sa kategori travayer ki nou sipoze pe defann? Bliy anplwayer, me bann travayer zot menm, eski mesaz ki nou pe anvoye atraver sa lamannman la ozordi se pa fer nanryen?

Trenn zot lipye si zot anvi, les produktivite desann, 13enm mwan i garanti. I en mesaz ki nou anvoye sa dan 2025? Parti progresis, se sa mesaz ki zot anvi anvoye? Oubyen zot anvi anvoy en mesaz ki Onorab Trevor Louise, in anvoye bomaten?

Annou fer sir la ki Gouvernman pe donn zot, zot 13enm mwan fer sir ki zot merite sa 13enm mwan, fer sir ki zot travay konsyansyezman ki zot prodwi ki zot fer keksoz pou pour zot ganny 13enm Mwan.

Sa se mesaz ki Minis devret pe anvoye la bomaten, olye vin dir nou sa se en *pledge* 100 zour limero trwa lo lalis alor fyer ki pe anmenn sa. Eskiz mwan Minis mon kontan ou, me selman sa largiman i en largiman en pe fay mon sir ou ava reponn mwan pli tar.

Me ou vwar Madanm Speaker, dimoun, travayer laba deor nou bezwen valoriz zot. Nou bezwen lev zot, pa servi zot koman en bann dimoun ki nou,

nou pli konn zot ki zot menm. Ki se nou ki pou vin koz pour zot ler zot konn tre byen zot menm ki mannyer pou koz pour zot.

Ou vwar, ler nou'n entrodwi 13enm mwan aköz ki nou ti sanze? Aköz ki nou parti ti sanze, e ki ti anmenn sa konponan ki ti anmenn sa konponan responsabilite, ki ti anmenn sa konponan performans? Se prezizeman aköz en fwa ki nou ti'n entrodwi li nou ti ekout dimoun laba deor, nou ti ekout bann travayer ki ti dir n ou be i pa *fair*, i pa *fair* annan en system kot tou dimoun i ganny parey sa enn ki travay ek sa enn ki pa travay pou ganny parey, *it's not fair*!

Nou bezwen ankouraz en serten responsabilite dan travay, e lafason ki nou nou'n fer kontan pa kontan kekfwä i pa ti meyer fason zot, zot pe sanze la ozordi. Fason ki nou, nou ti fer se pou dir *ok*, en poursantaz i garanti aköz i merite aköz sete sa lespri pou donn zot en pti *saving* aköz lafen ler ou'n ariv lafen lannen, e se sa problemin ki nou, nou ti persevwar.

Ler ou'n ariv lafen lannen *at least*, prezan ou a ganny ou 13enm mwan ou a kapab, e mwan mon ti dir sa dan sa

Lasanble ler sa Lalwa ti pase, ou a kapab prezan dir, "ar mon ti anvi aste en nouvo *fridge* oubyen mon ti anvi aste en nouvo *washing machine* oubyen nou anvi al fer en pti vire *Dubai* oubyen Moris, sa larzan ava permet nou fer sa." Se pour sa rezon in vin *at the end*.

E sa largiman ki i en drwa parey Prezidan Herminie, ti servi lot zour i en drwa aköz si nou kont tou bann zour dan en lannen i pou ariv egzaktaman en 13enm mwan.

Eskiz mwan Madanm Speaker, i en lot largiman fay. Aköz si ou pe konpans en dimoun pour bann zour ki'n travay an plis dan sak mwan, ou pa donn li en 13enm mwan ou ogmant son saler tou le Mwan pou konpans li pou sa bann zour ki ou pe travay. *I mean come on it's i senp non ?*

I annan en pe letan depi ler mon'n al lekol, me mon ankor rapel serten keksoz ki lozik, mon pa donn en 13enm mwan; en 13enm mwan se egzaktaman sa ki mon fek dir ler nou ti komanse.

Nou'n donn sa *as an enforced saving* pou fer ki bann travayer i konnen ki ler zot ariv lafen lannen zot a ganny sa larzan. Se pour sa rezon ki nou dan sa Lasanble nou ganny gratwite menm rezon, menm

rezon akoz i en *enforced saving*, akoz nou konnen ki si ou donn sa larzan tou le mwan tantasyon i pou servi li.

La la filozofi, e si nou konpran sa filozofi nou ava konpran akoz nou ti sanz li ler i ti neseler, e permet ki i ti ava annan en konponan *saving* avek en konponan ki ou bezwen *perform*.

Me en keksoz zot pa'n dir nou ozordi, e ki mon krwar ki Seselwa laba deor i bezwen rekonnet, se ki tou Seselwa tou travayer Seselwa ti annan drwa ganny en 13enm mwan plen 100poursan. *Everybody*, napa en Seselwa ki'n ganny viktimize pou li pa ganny 13enm mwan, sel keksoz i ti bezwen se travay dan en fason konsyansye, e *perform*.

Si tou travayer ti fer sa, tou travayer ti pou ganny 13enm mwan. Me zot pa dir nou sa zot. Non akoz i pa antre dan zot *system*, dan zot *system* kot ou bezwen *reward failure as much as you reward success*. Sa se zot sistenm.

Se pour sa rezon ki ler nou pou ariv 2030, nou pou war pei pou faid ankor en kou, e nou bezwen re anmenn *LDS* pou releve nou lekonomi pou fer sir ki nou kapab *perform* ankor.

Se sa sirk, se sa *cycle* ki zot fer nou, nou kree zot, zot

depanse. Alor Madanm Speaker, an termin an les mwan dir avek Minis, ou premis pou servi en mo ki Onorab, ki Vis- Prezidan Sebastien Pilay, tri kontan servi ler i ti asiz dan sa sez premis - *the premise* pou ou lamannman i mal fonde.

Lamannman pa en move lamannman, me i mal fonde akoz son baz lo lekel ki pe vin devan ki sa i en drwa eksetera i napa fondman, i en fiksyon.

Plito, ti a'n vini e ou ti a eksplik tou sa bann keksoz ki mon fek eksplike la, e ou ti ava dir ki filozofi zot parti se sa, me zot rekonnet parey Onorab Trevor Louise, in rekonnet tou sa bann sa dyalite ki annan dan en *policy* parey 13enm mwan ki annan son bon kote, me annan son move kote ki annan son lavantaz, me ki annan son dezavantaz ki siport en pe, me ki pa siport en pe e sey *manage* sa tansyon ki annan dan sa keksoz.

Nou pa kont 13enm mwan, zanmen nou'n kont annefe parey mon'n dir e ti nou lide, e nou siport sa lide. Sa ki nou pa siporte se sa filozofi deryer sa lamannman ki zot pe anmenn ki nou krwar i pa dan benefis nou travayer, i pa dan benefis bann travayer konsyansye i plito vin en

reward pour bann dimoun ki pa enterese *perform* alaoter.

E si sa i le ka, nou pou war en drop dan performans *right across the board*, e sa i pa antre dan nou filozofi. Mon ava enterese pou vwar ki mannyer ou pou reponn mwan, e mon konnen ki en bon pe, si pa tou bann Manm lo lot kote ki pa ankor koze ava deside prezan pou pa koz lo sa ki zot ti'n prepare, me plito vin reponn mwan e mon ava enterese ekout zot sa ki zot annan pou dir.

Me mon ava dir ou la ozordi parey mon fek dir, *the idea is not bad, the basis is wrong*, e se pour sa rezon ki nou ava ekout zot avan nou deside ki nou pou fer avek ou propozisyon lamannman. Mersi Madanm Speaker.

(APPLAUSE)

MADAM SPEAKER

Onorab Lemiel. Onorab Lemiel.

HON SYLVANNE LEMIEL

Mersi Madanm Speaker. Bonzour Minis avek ou delegasyon, e bonzour tou dimoun ki a lekout, tou travayer Seselwa ki a lekout.

Madanm Speaker, mon fek tann mon koleg *Leader* Lopozisyon, in koze in dir ki sa

nide 13enm mwan saler pou donn travayer ti nide *SNP, LDS*.

E in menm dir ki *LDS* in fer pti baba, konmsi sa nide 13enm mwan saler ti pti baba *LDS* sa. Me i domaz zot in fer pti baba zot pa'n sonnyen, zot in fer pti baba zot in kit pti baba dan semen pou grandi tousel, e apre nou vwar ki mannyer ki sa in arive ziska ozordi.

Si nou mazin byen, ler nou ti pas lo sa dernyen amannman dan *Employment Act* pour 13enm mwan saler dan serten diskisyon ti'n menm ganny dir or in annan serten *circular memo* apre sa dernyen diskisyon si mon pa tronpe *panel* a koriz mon, ki ti'n ganny fer resorti ki mon krwar sa ti *early 2020*, or non ti *early maybe 2022 or 2023* mon pe mazin en ler nou ti pas sa dernyen amannman.

Zot ti'n dir ki *LDS* ki ti dir sa, zot ti'n dir ki 13enm mwan saler pou depan pirman lo evalyasyon performans an 2026. Sa ti'n ganny dir *quelque part*.

Ki fer ou war pou dir 2026 lannen prosen mazorite pa ti pe al gannyen 13enm mwan zot ti pou fini touy sa pti baba. E sa ki mwan mon pe regarde ozordi, sa ki *the feeling* ki ou pe gannyen la ozordi i se ki tou travayer i kontan ki zot pe al

ganny zot 13enm mwan saler zot tou.

Mon pou annan en lapel apre mon lentervansyon pour tou travayer. Madanm Speaker, nou lo sa kote latab isi dan *United Seychelles* nou toultan dir ek travayer ou bezwen travay dir, ou bezwen performen dan ou travay, ou bezwen donn ou tou dan ou travay.

Kontrer avek sa ki Onorab Georges, in vin dir nou ki nou, nou soutir bann dimoun ki pa le travay, nou pou donn 13enm mwan menm dimoun ki vin retar en lalis in donner, i pa le ka Onorab.

Mwan lo mon kote mon siport e mon pou lans en lapel avek tou travayer Seselwa, pou double zot zefor dan zot travay, travay pli dir e performen dan zot louvraz aköz nou tou nou bezwen travay pou saler ki nou pe gannyen.

Alors, debourye bann travayer la deor, travay dir annou fer Onorab *LOTO*, war pou dir sa ki'n dir nou ozordi ki *United Seychelles* pe al rekonpans or pe al donn 13enm mwan saler bann dimoun ki absan bokou dan louvraz, ki vin tar, ki trenn lipye nou a fer zot war ki i pa le ka.

E mon sir e serten ki tou travayer Seselwa la deor i pe

debourye, e zot pe al deboury plis aköz zot pe al ganny zot 13enm mwan saler osi plen ki sa i enn zot drwa.

Madanm Speaker, prezan mon pou al lo mon ladres konsernan sa Lalwa ki devan nou. Bon Madanm Speaker, ozordi letan mon pe regarde nou trouv nou devan en krwaze semen lezislatif.

Pa aköz Lalwa in evolue avek klarite oubyen avek bi. Me aköz in ganny trennen dan plizyer lannen konfizyon, distorsyon, eksperimantasyon *policy* ki ti ganny enpoze par ansyen ladministrasyon.

Bill 23, pa zis en amannman i en koreksyon lezislatif, en restorasyon prensip, klarite ek lazistis pour travayer Seselwa.

Annou komans par lapel en laverite senp. En lannen travay ki Onorab Georges, in sey eksplike i osi in dir nou in fer kalkil, mon osi mon'n fer en pti pe kalkil, en lannen i annan 52 semenn, i vedir 12 mwan travay in kouver, savedir zis 48 semenn 12 mwan travay 48 semenn.

Be ler nou pe get saler 13 mwan i pa en *leak* sa, e i pa ni menm en zenerozite anplwayer. I sa 4 semenn travay ki'n fini ganny fer, e travayer i devret ganny peye.

Se pour sa rezon ki an 2016, nou Gouvernman anba direksyon Prezidan Danny Faure, ti vote pou met seksyon 46(c) isi dan sa Lasanble nou ti vote, pou met sa seksyon 46(c) dan Lalwa Lanplwa, pa koman en garanti opsyonnel or pa koman en gratwite opsyonnel sa pa ni menm koman en bonous, koman en drwa legal nou ti met sa.

Me Madanm Speaker, sa drwa in ganny sistematikman ganny redwi oubyen ganny konpromize depi 2020, ansyen Gouvernman ti sispann peyman 13enm mwan anba Lalwa 28, 2020.

Dan Lalwa 54, 2021 zot ti fer li ankor, en lot sispannyon, en lot vyolasyon drwa travayer ki'n kit travayer a la mersi bann volonte olye proteze par Lalwa.

Zot pa'n satisfè avek sa sispannyon, ansyen administrasyon ti al pli lwen. Dan Lalwa 22, 2022 zot ti deform natir 13enm mwan, zot ti entrodwi sa *system* evalyasyon oubyen *appraisal* fer en drwa legal vin en drwa rekonpans avek kondisyon.

Troun en kou, pou en travay Seselwa ganny son larzan ki ti pou li ti bezwen depan lo zizman sibzektif, *system* evalyasyon oubyen *appraisal* ki pa ni ti konsistan

ek diskresyon son anplwayer en drwa ti'n vin en zouti negosyasyon.

Annou ganny sa kler Madanm Speaker, okenn travayer Seselwa pa'n zanmen dakor pou negosye zot 13enm mwan saler atraver evalyasyon performans dan travay ki anplwayer li menm ti enpoze lo travayer, mon pou dir.

Madanm Speaker, apre ti vin Lalwa 19, 2023 kot olye Gouvernman LDS koriz domaz, zot ti kontinyen al pli lwen. Zot ti retir mekanizm aplikasyon pour egzansyon anba seksyon 46(c).

Zot ti re ekri definisyon, zve avek bann term, e kree en lareg taks telman konplike ki travayer ek anplwayer ti bezwen avoka parfwa pou konpran ki Lalwa ti pe dir.

Ansyen administrasyon pa ti fer 13enm mwan vin senp. Zot ti sabotaz li bout par bout mon kapab dir, ziska travayer pa ti kapab rekonnet zot drwa.

Bill 2023, i termin sa dezord legal Madanm Speaker, i remet tou keksoz dan son plas. En Saler 13enm mwan ki enn, i pou konplet i pa pou an morso, enn ki pou merite me pa donnen, enn ki garanti par baze ki pa baze lo evalyasyon zot performans, e enn ki en drwa me pa en bonous.

Madanm Speaker, sa *Bill* pe retir seksyon 46(2) i retir model evalyasyon performans, en model ki pli adapte pour bonous, *incentive* ek target korperativ, pa pou en drwa legal.

Sa *Bill* pe permet tou keksoz, e i pe remet tou keksoz nou kapab dir kot i ti ete, dan seksyon 46(c) i fer ki sa seksyon inifye, i kler e san konfizyon, i re etabli 13enm mwan saler koman en konponan prediktab, prediktib nou kapab dir dan saler legal, pa en mekanizm pou kontrol oubyen *reward based* baze lo performans.

E par amann sa seksyon 76(2) *D(d)* i asire ki mekanizm ranforsman i ava anliny avek sa klerte legal ki'n ganny restore.

Madanm Speaker, fodre nou kler ki *Bill* 23, 2025 ki nou pe diskite la ozordi pa kre en nouvo benefis pour travayer Seselwa sa, i repran en benefis ki ti'n ganny vole, mon kapab dir.

I onor lentansyon lezislatif 2016, i koriz leksperimantasyon ideolojik ansyen administrasyon, e i re afirm sa ki tou travayer Seselwa i konnen ki si ou travay 52 semenn ou devret ganny peye pour 52 semenn, 12 saler pour 12 mwan ek ankou enn pour sa

4 semenn final. Sa se lazistis, pa zenerozite.

Madanm Speaker, sa *Bill* pa konsern re ekrir listwar sa, i konsern aret abiz li. Responsabilite pa kapab ganny fer par servis saler koman en zouti oubyen en zarm kont travayer.

Si ansyen ladministrasyon ti anvi ankouraz responsabilite, zot ti devret investir dan mekanizm travay transparan ek sipervizyon, pa fer saler travayer vin en zouti presyon.

Mon pou demann sa Lasanble Nasyonal, pou aprouv *Bill* 23, 2025 pa koman partizan, pa koman okenn *technocrat* osi. Me koman defander travayer Seselwa. Annou remet saler 13enm mwan dan son plas legal, san kondisyon, san leskiz, e san okenn posibilite pou retir li.

Avan mon terminen, mon ti a lans en lapel avek tou travayer Seselwa, mazin ki travay i ou drwa e i ou devwar, alors met tou ou zefor posib dan ou travay, travay avek konsyans pou toultan amelyor zot performans e fer touzour pli meyer, i osi byen pour zot konnen ki evalyasyon performans oubyen *appraisal* i vremen enportan dan tou lorganizasyon travay pou determinen si ou pe byen travay

e kote ki ou bezwen amelyore pour ou fer pli byen.

So, nou re dir ankor avek travayer i enportan ki *appraisal* i ganny fer pour sa rezon ki mwan mon'n site, me pa pour 13enm mwan. En evalyasyon i osi pou ed ou koman en travayer dan ka en promosyon parey Minis in nonmen, menm si *Leader* Lopozisyon in dir ki sa i fer son rezon vin fay, i pa fay li.

Nou bezwen edik dimoun la deor, sirtou nou bann travayer ki pe al benefisye avek sa 13enm mwan.

Alors, travayer fodre pa per pou fer *appraisal*. Me parey nou dir sa *appraisal* pa pou ganny servi pou determin ou 13enm mwan saler. Avek sa Madanm Speaker, mon dir ou mersi.

(APPLAUSE)

MADAM SPEAKER

Mersi Onorab. Onorab John Hoareau.

HON JOHN HOAREAU

Mersi Madanm Speaker. Bonzour Madanm Speaker, bonzour tou dimoun a lekout. E mon pou komans mon lentervansyon an regard an en keksoz ki nou'n deza koman en

pei dakor, tonm dakor lo la e sa se konvansyon *ILO*.

Sesel parey konnen in siny 9 dan sa 10 konvansyon fondamantal *ILO*, enn parmi se *Equal Renumeration Convention*.

E sa ti fer donn soule nesans Lartik 35 nou Konstitisyon '*right to work*', e 35(2) klerman i fer resorti '*fair work equals to fair wages*.' Sorry '*fair work* avek *equal wages*' pour tou travayer, ok?

Seta dir nenport ki travay ki en dimoun i fer Sesel anba Konstitisyon i ganny drwa ganny menm parey menm lapey avek en lot ki pe fer menm louveraz san okenn distenksyon, swa ras swa sex, swa lezot.

Alor mon pe demann mon lekor si vreman nou pe al dapre nou Konstitisyon, oubyen si nou pa pe *deviate* en pti pe avek sa provizyon nou Konstitisyon, aköz ozordi ler nou pe get sa Lalwa ki devan nou sa lamannman i koz lo *Seychellois worker*.

Me selman an menm tan, kontradiksyon ki leve se ki nou'n vwar en sirkiler ki'n sorti e sa sirkiler i pa'n distenge ant *Seychellois ek non Seychellois employees* dan sekter servis piblik ki pou ganny sa 13enm mwan saler.

Alor, ler nou pe gete nou vwar en pti pe en fason koman ou kapab dir sa? En pti pe *ambiguity* ki mon ti a kontan petet ler Minis i fer son *summing up* i kapab eksplik nou byen lekel ki *eligible* pour sa 13enm mwan saler.

Eski *expatriate* i *eligible* ki dan servis piblik? Eski *expatriate* ki dan servis prive ki dizon travayer ki dan sekter prive i kapab gannnen en 13enm mwan saler? Eski Gouvènmman dan sa mekanizim ki pe ganny propoze eski i pou kapab i pou kouver osi sa bann keksoz koumsa oubyen i pa pou kouver pour *expatriate* ganny en 13enm mwan saler?

Dabor si nou pe koz lo sa provizyon nou Konstitisyon *equal work equal pay*, i vreman egzize ki nenport ki travayer ki swa etranze koi swa Seselwa i bezwen si i pe travay i pe fer *equal work* anba nou Konstitisyon i devret ganny *equal pay*.

Madanm Speaker, mon le osi abòrd lo en pti size ki mon'n tann Minis koz lo la, lo lofans si sa anplwaye pa pey sa 13enm mwan saler, i kapab kondann ziska R20 mil.

Ankor mon pe demann mon lekòr en kesyon lo en pwennvi legal, eski sa penalti i *fit the crime*? Akòz si par

egzanp, en dimoun i annan li senk travayer ki *on the average* kekfwa i pe pey R10mil i fer li en kont R50mil pou li pey sa 13enm mwan saler. Me si pou kondann li zis pour R20mil i pou annan swa pou li pa pey sa senk dimoun son 13enm mwan apre i kondann son R20mil i fini.

Me eski sa i fason ki nou pe devret pe get sa Lalwa, oubyen eski sa i fason ki nou bezwen aranz en pti pe lo la pou fer ki sa Lalwa i pli morde si vreman i pe vin en Lalwa?

Mon ti osi fer en remark ki serten Manm lo lot kote latab in koz lo travay ki devret ganny byen fer, ki devret isi laba, ki devret ganny byen rekonpanse ensi deswit.

Me selman an menm tan, zot in servi sa mo *bare minimum*, *bare minimum* se senpleman zis pou vini pou *clock in*, *clock out*. Eski se sa vreman ki nou anvi? Se sa kalite standar ki nou anvi vwar annan dan pei? Eski nou le vwar en servis piblik ki pli efikas, ki pli prodiktiv? Nou le vwar en servis piblik kot *attendance* i ganny gete de pre, e fer sir ki tou dimoun ki travay dan servis piblik i delivre a en ot nivo konpetans.

Alor sa i bann kesyon pertinan ki nou devret pe

demande, e osi nou devret pe gete osi si napa lezot *incentives* ki pou ganny afekte si nou pe *compel* servis plito prive bann sektè prive pou osi donn sa 13enm mwan saler.

I pa vèdir mon kont ki en lot dimoun i ganny son 13enm mwan saler, me selman nou bezwen get keksoz dan en fason global, gete si ler nou pe fer aranz en kote lot kote pa pe deranze.

Par egzanp, i annan serten sektè prive ki osi par egzanp donn bann *loans* son travayer a en to tre ba, i annan bann lezot laranzman osi ki zot fer monneter pour sa bann travayer. Eski ler nou pe *compel* zot pou donn sa, eski sa bann lezot *incentive* ki zot pe donn travayer pa pou ganny konpromize? Tousala i form parti sa fason global nou get sa size.

Madanm Speaker, mon le osi dir ki mwan mon tou dan kote travayer, mon tou dan kote en travayer ganny sa ki merit gannye, me selman nou bezwen fer sir ki ler nou pe fer en keksoz koumsa, nou pe fer li dan en fason kot nou pa pe kas en kote pou nou aranz en lot kote.

Nou bezwen fer sir ki nou get tou keksoz dan en fason balanse, dan en fason global ki

ler nou pe anmenn en sanzman ki deza dimoun ki'n komans abitye avek, sirtou lo kote *attendance* ki mon'n ganny dir poudir *attendance* dan servis piblik in bokou amelyore, akòz in enn sa bann kriter ki'n ganny gete de pre pour sa pti 50poursan ki ti ganny donnen atraver evalyasyon.

Si osi nou pe kapab kit sa bann keksoz dan en lot fason oubyen anmenn lezot mekanizm pou kapab kit sa bann keksoz an plas, sa bann gidans lo *attendance*, lo prodiktivite, e lo efikasite.

Madanm Speaker, mon le osi profite dir ki ozordi dan mon distrik in annan en vizit Minis Gouvernman Lokal, me mwan mon'n konn sa selman yer 5er apre midi atraver en *email* sorti kot mon DA.

Mon ti ava petet osi profit sa loportinite la kot nou pe koz lo travay, nou pe koz lo lefikasite, nou pe koz lo 13enm mwan saler, lo prodiktivite, demande ki si nou le travay dan linite, si nou le travay byen ek kanmarad se ki en *email* formel i ganny anvoye i dir ki, "petet i annan en vizit dan ou distrik par Gouvernman Lokal, e nou ti ava kontan ou prezans la."

Alor, tou sa bann keksoz i montre ki annan de ler nou koz en keksoz, me selman nou fer

en lot keksoz dan en diferan fason.

Me avek sa Madanm Speaker, parey mon'n dir mon osi mon pou ekoute ki direksyon deba i pran avan ki mon donn mon vot pour sa lamannman. Avek sa mon a dir zot, mersi.

MADAM SPEAKER

Onorab Audrey Vidot.

HON AUDREY VIDOT

Mersi Madanm Speaker. Bonzour Madanm Speaker. Minis ek ou delegasyon. Tou Manm Onorab. Tou dimoun ki a lekout. E en bonzour spesyal pour zabitan Roche Caiman.

Mr Speaker – Madanm Speaker, eskiz mwan, Lalwa ki devan nou ki'n ganny anmennen pou amande, mon war li i anlany avek nou Konstitisyon. Byensir i mars byen avek Lartik 33. 35, eskize, 35 nou Konstitisyon kot nou koz lo drwa travay.

E parti dan sa seksyon dan sa drwa kot i dir fer e enplimant bann provizyon legal pour bann kondisyon travay ki sen e sof, e zis.

Enkli repo rezonnab, lwazir, konze peye, reminerasyon ki garanti o *minimum*, kondisyon lavi ki dir e desan pour bann travayer ek

zot fanmir. Saler ki zis e egal pour travay valer egal san distenksyon e stabilite lanplwa.

Mon war li i marye ladan, akoz letan nou pe koz drwa kot travayer Seselwa espesyalman i konsernen, i zot drwa pour zot leve debourye, kapab soutenir zot lekor. E byensir zot travay i bezwen ganny serten lapresyasyon e rekonpans.

E ler en travayer in donn tou, i annan tou son drwa pour li kapab benefisye, zouir zefor ki in gannyen atraver byensir Lalwa ki devan nou ozordi, en trezyenm mwan an plen.

Mon'n ekout lentervansyon depi bomaten. Mon'n tann dir kot i annan divizyon. In anmenn divizyon letan nou pe koz lo sa amannman dan Lalwa ozordi.

Me nou bezwen fer byen en pti moman refleksyon, espesyalman bann ki pe koz divizyon, lekel ki'n konmans anmenn divizyon dan sa pei. Espesyalman kot i konsern ler en travayer in travay. Espesyalman en travayer Seselwa in travay e merit tou son bann benefis, son bann drwa.

Si i annan en group dimoun, en pti group dimoun sa letan dan sa Lasanble dan 7enm kot tou bann benefis ki nou ti vwar bann travayer

Seselwa ti merit gannyen, ti zot bezwen dan bann moman difisil osi, apre zefor e kouraz ki zot in donnen zot lorganizasyon travay ki ansyen Ladministrasyon LDS ti retire e menm met serten kondisyon, parey nou ti vwar de leka avek trezyenm mwan, sete *United Seychelles* ki ti akote travayer Seselwa.

E mon'n tann Onorab Georges, atraver ou Madanm Speaker, kot letan pe dir si – byensir, i dir mwan pe pran kredi pe dir poudir ti zot nide, ti zot pti baba.

Mon le met lo rikord, mwan mon pa'n zanmen en Manm lo Komite Santral Prezidan Michel. Mon pa'n osi zanmen – mon pa'n zanmen osi pou war mwan dan okenn lo kote *SNP*, *LDS* lo zot striktir.

Me sa ki mon konnen se ki byensir si i annan en nide pou kree trezyenm mwan pour Seselwa gannyen, e in annan koze fortman lo la. Bann Manm dan tou lede kote latib in donn zot pwennvi, zot lopinyon.

Mon rapel en serten lepok osi kot ansyen Prezidan Wavel Ramkalawan a sa letan, letan i ti dan Lopozisyon, kot i ti dir kot tou Seselwa, travayer Seselwa i merit annan en gratwite lafen lannen. Mon mazin en i ti pe met anlany avek sa nide trezyenm

mwan ki Onorab Georges pe koz lo la.

Be letan *COVID*, apre *COVID* ziske manda fini, tou – Mr Ramkalawan koman Prezidan a sa letan ek tou son bann Manm Onorab zot ti ganny tou zot bann benefis zot lafen lannen.

Me par kont, travayer Seselwa ti bezwen ganny morso. Zot ti ganny koupe. Plito apre ki ti ganny re entrodwir apre ki *Untied Seychelles* in anvoy lavwa a plizyer repriz, finalman in retournen.

Me ler in retournen ankore, in met kondisyon ki pou donn par lanmwatye oubien fodre i perform. Me i annan travayer Seselwa parey mon bann koleg in dir, zot in doue, zot in donn tou dan travay.

Me letan in ariv ler pour zot kapab ganny zot *full* trezyenm mwan, i konmans vin serten difikilte pour zot e zot pa'n ganny zot *full*. Zot in ganny swa en bout. Sa ki'n ganny zis lanmwatye. Sa ki'n ganny trwa kar.

Me mon'n tann menm Onorab pli boner dir poudir i ti pe rod statistik. Statistik si zot ti vreman anvise – mon pa krwar Minis Alexander la ki i ti merit donn zot.

Be, tou sa letan dan sa 5an, zot pa'n fer *door to door*

pou war, pou koz ek dimoun pour zot konnen ki kantite travayer Seselwa, menm zot prop siporter ki'n travay ki'n donn son kontribisyon dan son lorganizasyon travay?

Me ler in ariv ler pou *appraise* li, i pa'n gannye son *full* trezyenm mwan. O kontrer, i pa'n leka. In ganny zis trwa kar. I pa'n ganny son *full*. E nou lo sa kote latab nou ti ganny tou sa ki apel pour nou. Lo tou. Tou lede kote. *LDS* avek *United Seychelles*. Prezidan Egzekitiv antye. Be travayer Seselwa malerezman pa ti gannye.

Be la nou'n dir i bezwen annan lazistis. Si travayer in travay en lannen antye oubyen in ariv son kantite mwan ki Minis in eksplike bomaten, kantmenm i ganny lo baz pro-rata, i merit ganny son benefis.

Akoz ki nou bezwen met kondisyon avek? Kontinyen met kondisyon? Se pour sa rezon ki nou bezwen amann Lalwa ki devan nou.

E i en langazman ki mon apresye Prezidan Herminie avek son lekip e byensir avek Minis Idith Alexander koman Minister kot lanplwa pou vini pou onor en promes en langazman ki in fer avek Lepep Seselwa, kontrerman avek sa enn ki ti avan ki ti avan ki ti donn nou en lalis promes.

I annan ki ti dir nou dan 100 zour, pa'n zanmen arive ziske ozordi. E nou, nou pe montre poudir nou en Ladministrasyon ki serye. Nou annan en lekip ki pare pou travay, pou ekout lavwa Lepep Seselwa.

I en kontra sosyal ki Parti *United Seychelles* in vin avek e i pe onor son langazman, son komitman. E nou lo sa kote latab nou pou siporte. Akoz ler nou ti pas devan laport dimoun, ler nou ti ekout sa bann travayer Seselwa, nou pa ti rode ki son afilyasyon politik. Nou ti ekout son konsern.

Son bann pwen ki ti valid pou montre aköz ki mannyer zot ti war ti napa lazistis lo lafason trezyenm mwan ti pe ganny donner apre dernyen amannman ki ti ganny fer.

Nou pe koz responsabilite. Wi, travayer i bezwen responsab. Nou leve nou al travay, nou delivre dan nou lorganizasyon travay. Pe enport ou dan servis piblik dan Gouvernman, oubyen ou dan prive.

Akoz nou bezwen travay pour nou kapab ganny nou bann benefis, pour nou zourir nou bann benefis. *United Seychelles* pa'n zanmen soutir pares li. Nou'n ankouraz dimoun pou leve debourye. Si i

annan en parti politik ki annan leksperyans dan fer tou posib pou kree loportinite pour Seselwa travay, se pa lot ki dan Parti *United Seychelles*.

Pour bann ki pe sey fer nou krwar. Non, Seselwa i ase entelizan, i kapab al regard byen *back* dan lepase atraver lenformasyon ki nou annan, rikord ki montre poudir nou'n kree loportinite pour Seselwa leve debourye pou kapab ganny son dipen e pour li sonny son fanmir, viv en saler ki stab.

Menm si nou'n ganny kritike poudir nou okip Seselwa depi son nesans ziska son lanmor. Wi, nou okipe aköz nou krwar poudir en manman de moman ki in tonm son lansentman, i merit ganny son swen neser ziska ler son baba in ne san bezwen trakase kote i pou ganny larzan pour li pey son lasante.

Ler son baba in ne i grandi, nou donn li son ledikasyon, son sipor neser pour li apre li osi vin en bon sitwayen. E ler in ariv dan lemonn travay, li osi i a leve i a debourye.

Nou kree loportinite lanplwa pour li osi kapab kontribye dan sa pei, pour ki lezot osi i a kapab zouir parey li. E li osi i a ganny menm benefis ek sipor neser.

Si en dimoun in travay, in kontribye dan sa pei, i merit zouir son pansyon a en laz ki rezonnab. Se sa ki nou prensip nou sa parti nou'n krwar ladan.

Be se pour sa rezon nou lager pour lazistis sosyal. E nou ankouraze ki dan sa dernyen eleksyon nou antre dan en langazman en kontra sosyal avek pep Seselwa. Aköz nou anvi ansanm nou konstrir e batir en meyer Sesel ansanm, kot personn pa ganny kit deryer.

E letan nou pe koz ankor lo responsabilite, i pa zis nou pe dir avek travayer. Me anplwayer. Si letan nou pe anploy en dimoun, nou pou esper lafen lannen pour nou *appraise* li pour nou kapab decide si nou pou donn li en benefis?

Be i bezwen annan en striktir byen formel lafason ki mannyer nou *appraise* nou travayer. Nou bezwen kapab gid zot poudir, be regarde, la mon vwar ou annan tro bokou *sick leave*, nou bezwen regarde ki ou problemm. Aköz ki ou annan *sick leave*? Ki *issue*, ou annan en kondisyon lasante?

Si fodre rod gidans, *this is* – si vreman nou anvi okip nou travayer, nou anvi nou travayer kontinyelman delivre, i bezwen en striktir ansanm pour nou

kapab war poudir i annan sa linite pour nou fer keksoz bouze pour en lorganizasyon ki nou tou nou benefisye. Depi son anplwayer ek son anplwaye.

Si i annan – nou war poudir i pa pe perform dan son travay, nou kriy li boner. Nou pa bezwen esper lafen lannen pou *appraise* li. Nou bezwen vwar kote nou kapab ed li boner.

Ed kanmarad pour ki enn, i kapab konsantre dan son travay. Adres son problem. Me an menm tan, i delivre parey i merite dan son lorganizasyon travay. Se sa ki nou pe ankouraze.

Me non, pa ganny baze - tou sa pou ganny baze lo lafen lannen pour ou deside si ou pou donn li en trezyenm mwan. Sa i ava baze lo lezot benefis lo lezot loportinite ki ou lorganizasyon ou santi ou anvi donn ou travayer ki in donn tou.

Me en travayer si ou'n war li in travay, in kontribye dan ou lorganizasyon en lannen antye pour en serten kantite letan, ou pa pou donn li son benefis an plen?

Se pour sa rezon ki nou dir i bezwen – sa Lalwa i bezwen amande pou permet ki travayer Seselwa i zourir son trezyenm mwan saler an plen.

E ankor ledikasyon ki nou bezwen fer pour nou bann travayer, Seselwa la deor espesyalman, bann konsey ki nou donn bann paran tousel. Nou konnen lavi pa fasil. Ou'n travay en lannen antye, ou merit ou trezyenm mwan plen.

Byensir, ek sityasyon lavi nou kontinyelman mazin nou priorite. Nou priorite ki nou anvi pour nou ek nou lakour ek nou fanmir.

Wi festivite pe vini. Pa vedir festivite pe vini, ler nou pou ganny nou trezyenm mwan saler nou depans li an plen diverti kontan.

Non, konman en sitwayen, konman en paran responsab, konman en travayer ki ou'n travay mon krwar ou merit zourir ou benefis dan en fason ki byen ki ou konnen poudir ou dirab i tenir ou. Akoz nou konnen lavi pa'n fasil pour ou dan sa dernyen 5an.

Nou lo sa kote latab nou pou siport sa Lalwa Trezyenm Mwan Amannman pou asire ki nou ganny li an plen, akoz nou konnen poudir in annan *unfairness* dan sa bann evalyasyon performans.

Performans wi. Tou travayer parey Onorab Lemiel in dir, zot bezwen ganny evalye dan travay pour ki nou asire ki zot delivre, zot perform byen. E

ki byensir bann ki pe fer pli byen i ganny loportinite pour li ganny son promosyon, ganny son benefis nesaser.

E bann ki war poudir i annan en pti pe *slack* i bezwen - en pti pe defayans, i bezwen aranz li pour li kapab fer sir i osi delivre.

Akoz mon konnen i annan travayer ki pe ekout mwan. I annan ki'n anvoy mwan mesaz letan zot ti konnen trezyenm mwan pe al ganny amande pe vin devan Lasanble Lalwa.

Zot ti menm dir poudir i annan serten lorganizasyon ki, espesyalman Gouvernman kot travayer ki'n delivre zot ti pe byen ganny serten zot reminerasyon letan ti pe fer *appraisal*.

Me parkont, i annan zot ti dir pa pou kapab. Menm si in delivre in travay, zot ti ganny dir poudir pa kapab donn li sa kantite poursantaz ki pe rode ki i vwar i merite, aköz i annan en *cap* ki dir i bezwen ganny respekte. Me parkont, i annan lezot lorganizasyon ki zot, zot ti pe donner menm pli o.

So pour mwan mon santi poudir sa bann dimoun i annan tou rezon, byen *voice out* zot bann konsern avek nou. E byensir, in tonm dan zorey ki'n anvi tande. E sa ti zorey bann Manm Parti *United Seychelles*.

Akoz ler nou ti pas kot zot nou ti ekout zot, nou ti konpran zot konsern. Nou ti ekout zot byen, nou ti konpran zot bann difikilte ki zot pe pas atraver dan serten zot bann lorganizasyon travay e zot ti dir poudir zot anvi sa i ganny adrese.

E byensir, Prezidan Herminie avek son lekip in fer sir poudir sa ozordi i vin devan Lasanble. E byensir i a responsabilite sakenn de nou pour nou aport nou soutyen lo sa amannman Lalwa.

E mwan lo mon kote, definitivman travayer Seselwa ki'n travay en lannen antye ki'n merit son trezyenm mwan saler, definitivman mon zwenn avek mon lekip pour mwan siport sa amannman Lalwa. Mersi Madanm Speaker.

(APPLAUSE)

MADAM SPEAKER

Onorab Egbert Aglae.

HON EGBERT AGLAE

Mersi Madanm Speaker. Mon a dir bonzour Minis ek ou *panel*. Lalwa lamannman ki devan nou i pa en nouvo size ki nou'n deza diskite isi dan sa Lasanble.

Mon'n ekout byen bann entervenans sorti lo kote Lopoziyon e mon santi ki i

annan serten mank konprenezon, dan en sans. E osi i annan ki letan Minis in fer son delivre lo sa Lalwa, i paret i annan pa'n ekout byen osi.

Letan zot ti anmenn lamannman, sa ti Gouvernman LDS, pou amann Lalwa Trezyenm Mwan pou fer li vin 50poursan mandatwar e 50poursan baze lo *appraisal* performans, plizyer Seselwa travayer la deor ki swa i dan servis piblik ouswa dan sekter prive, pa ti santi zot konfortab avek sa.

Malgre ti napa dan en fason protestasyon, Seselwa ti bezwen viv ek sa ziska ozordi la. *Ok.* E nou sa letan nou ti dan Lopozisyon minoriter, nou ti kont sa fason fer ek sa lamannman ki ti ganny met devan aköz nou ti santi poudir i pa zistifyab. E taler mon pou dir aköz i pa zistifyab.

Me napa enn lo lot kote latab ki ti oze debout kont sa desizyon ki zot Gouvernman ti dir ti fer pou dir; non, gete, nou krwar poudir trezyenm mwan i merit ganny donnen *full*, me avek bann lezot sofgard ki zot ti kapab anmennen. Menm dan Polisi. Menm dan regilasyon. Pa ti fer sa zot. Zot ti zis lev lanmen agree poudir nou le li koumsa. Zot dakor ek li koumsa, san mazine ki zot dayer, atraver ou

Madanm Speaker, zot in koz for.

Onorab Georges in koz lo defann travayer Seselwa. Lager pour Seselwa. Kan i ti le kontr sa ki zot ti pe fer par sa lamannman aköz zot ti pe tir en bout dipen dan sa pake dipen ki Seselwa ti pe gannyen.

E se la osi kot in annan bann, mon kapab dir bann alegasyon kot serten pa ti pe ganny renimere fer li letan zot ti pe fer sa bann *appraisal*.

Now, si nou koz lo zistifikasyon *appraisal*. Letan nou ti pe antre dan *performance-based budgeting* e *Chief Secretary* ti vin la dan sa Lasanble pou eksplik nou ki mannyer sa pou marse e ki mannyer zot kapab *tie-in* avek sa *end of year thirteenth month salary*.

Me en keksoz ki petet Onorab Georges ti devret pe demande, atraver ou Madanm Speaker, se eski in annan en evalyasyon konplet pou regard sa rezilta 50poursan mandatwar e 50poursan performans.

Eski atraver sa lamannman Lalwa ki zot ti anmennen ti annan en os dan performans travayer kot i konsern *delivery*, ki swa dan servis piblik, ki swa dan servis

prive? Me selman mwan mon konsernen avek servis piblik.

Eski Gouvernman ti vin pli performan? Be pa sa ki nou'n war. Nou pa'n war, aköz ti ankor annan. E atraver ou Madanm Speaker, Prezidan menm in mont la dan diskour ki i ti fer dan sa Lasanble, i dir i fatigue. Pe trenn lipye. Pe isi, pe laba. Lo size travayer sa.

Alors, sa mezir ki i ti pran pou donn 50poursan mandatwar e 50poursan performans, pa'n efektiv. Pa'n amelyor servis.

Sa ki nou ti devret pe vwar se eski letan *Chief Secretary* ti vin la anndan dan Lasanble pou *set* bann kondisyon, bann *terms and condition* baze lo *performance-based*, petet en rol ki nou Manm Parlman nou ti devret pe fer se sa *oversight* pou vwar eski sa ki ti'n ganny enskri, malgre pa ti ankor fini fer tou, ti pe marse?

Premyerman, tou departman dan servis piblik, sa i pou ganny fer atraver zot bann *line managers*, zot bann *supervisors*, sipoze konmansman *calendar year* annan en konversasyon ek tou son travayer pou *set the goals and* bann target bann obzektif.

Eski tou ti fer sa pour zot ariv lo sa performans a lafen lannen pou regarde si vre zot in

onor sa ki zot ti ganny dir depi komansman lannen? Napa en evalyasyon ki'n fer si sa ti ganny fer.

E plizyer landrwa e letan ou'n koz ek travayer. Apre nou dir nou blanm travayer ki i pa'n performan. Konversasyon pa ti ganny fer e ti napa sa *oversight* osi pou vwar aköz tel ou tel departman pe perform *below standard*. Apre nou le blanm travayer.

Me se latet ki bezwen konmans enplimant bann mezir *oversight* pou vwar ki keksoz i bouze dapre lobzektif son departman bann *set targets goal and objectives*. Be nou pa'n war sa arive.

E Minis kan ou la, la atraver ou Madanm Speaker, sa i en pwen ki bezwen ganny adrese dan tou departman servis piblik.

Wi nou pe dakor, nou pou lev lanmen nou pou donn *full* trezyenm mwan saler. Me i bezwen annan en lankadrem serye pou fer ki travayer premyerman i konn son fonksyon ki i bezwen pe fer e ki konversasyon performans i konmans koze depi lafen lannen, parey anba sa *performance* – E la nou a konnen si vre travayer i kapab delivre e i *entitled* son *full month*.

E pour mwan, ler en travayer pa performan, menm si i dan sekter – parey dan sekter prive tou. E mon'n tann lot kote lata b i koz lo la. Be eski ou pou gard li dan lanplwa? Ou pou kontinyen kit li dan lanplwa? Sa i en keston nou mon bezwen demande. Akoz si mwan mon annan en biznes mwan, mon pe anploy 10 travayer ki mon bezwen pey li son trezyenm mwan saler, e ladan i annan 2 ki diferan repriz mon kriye mon koz avek i kontinyen pa pe performen, i kontinyen, eski mon pou gard li dan lanplwa?

E si demen i ganny peye son trezyenm mwan, eski mon pou blanm li? Be mon bezwen blanm mwan. Be i aplikab dan servis piblik osi. Si ou pa pe donn li travay pour li fer, ou pa pe oriyant li, parfwa ou tande poudir; be mon'n vini 8er - 4er, mon asize, mon pa ganny travay pour mwan fer.

I lafot lekel, sa travayer? Non. Responsabilite i bezwen en serk kot i anglob depi sa ki pe *supervise* li, son direkter, son CEO, son *line managers*. I sa mayon, zot tou zot bezwen responsab pour sa.

E Minis, ou'n *rightly said* ki performans *appraisal* i pou reste, malgre i pa pou *tie-in*, i pa *binding* avek kondisyon pour

trezyenm mwan. Akoz i annan osi bann lezot lavansman dan lanplwa ouswa dan karyer en dimoun. Bann lezot *incentive* osi ki atase avek en *appraisal system*. I pa zis saler.

I kapab promosyon. I kapab osi en louvertir pou aprofondi ou karyer lo en lot nivo. I kapab ou ganny en *course*. Tousala i baze lo ou performans dan ou travay. So, mon napa problemm avek kit sa performans.

En lot pwen ki mon santi mon anvi touse se letan Onorab Georges in dir poudir sa ti zot pti baba e ki nou ti vol son nide, dapre zot.

Me sa ki mon konnen poudir ti annan serten dokiman ki ti ganny *leaked* a sa moman letan ki ti dan biro Gouvernman. E sa ti ganny met an piblik e sa ti ganny *leaked*. Mon pa pou al an detay lo la, me selman nou konnen poudir sa ti arive e mon rapel sa ase byen.

Now, ou pti baba ki ou'n dir ou'n fer ne, dan pe sonny li ou deside ou dan son parkour nesans, ou sanz kondisyon. *Ok*, ou sanz kondisyon, ou vini ou dir be la 50poursan, mon pou donn ou 50poursan, mon met li koumsa, pou sonny en pti baba. Rod son manze.

Apre ou dir li poudir, be ou lot 50poursan pour ou kapab

ganny larestan ou bann manze la, i mannyer ou pou konport ou. Fodre ou pa gele. Fodre ou pa – non.

E ki zot ti pe al fer? Minis ti vin la anndan 2026. Pour 2026 zot ti pe al fer trezyenm mwan vin *fully fledged* anba performans. Ti dir la anndan sa Lasanble. Mwan mon ekout byen letan bann lanons i ganny fer la anndan mwan.

Be ki zot ti pe al fer savedir? Kwa ki ti pou arive? Pti baba aprezan li i ti pou bezwen al rod son prop manze pour li manze. I pa garanti i ti pou ganny manze.

Se sa problem ki annan ant diferans ek zot filozofi lo kote *LDS* e filozofi *US* ki nou, nou santi ki dan en lannen *on average per month* eksepte Fevriye, ou riske perdi ou 2 zour ki ou pa ganny peye. 2 zour. E letan ou azout sa i tonm apepre 28 a 30 zour. E se sa sistenm ki lentrodiksyon trezyenm mwan saler.

E i annan plizyer pei, *ok*, plizyer pei ki adopte en sistenm, malgre i pa dan zot Lalwa i annan, me par natir i dir ou koumsa ki zot *13th months pay* i *typically non-performance based*. Napa performans ki atase avek. I vin konman ou drwa, parey ou ganny 12 mwan

saler e la ou ganny en 13 mwan. Sa.

En lot pwen ki mon santi mon pou bezwen touse kot ti kree konfizyon lo size trezyenm mwan se sa zafer bonous lafen lannen osi. Minis nou bezwen eklersi sa byen kler. Akoz ti annan ki ti pe donn bonous parey bann parastatal, paraetatik, ki letan ou ti ganny ou trezyenm mwan zot pa ti donn ou bonous. Ti arete.

Ti napa naryen pou fer avek trezyenm mwan saler akoz trezyenm mwan i en mwan ki ou perdi dan 12 mwan dan en lannen. So, en bann zistwar ti ganny evante, zis parey bann preteks *COVID* ki ti ganny servi.

Wi nou ti dan lirezans lasante sa letan. Dan lirezans ekonomik. Me parfwa ou war poudir sa bann preteks ti ganny abize par Ladministrasyon *LDS* pou anmenn sa bann mezir, pou fer sa bann koupir lo reminerasyon travayer Seselwa. Ki menm apre nou'n pas *COVID*, sa bann keksoz pa retournen. Parey *long service allowance*.

So, Seselwa nou bezwen ouver nou lizye letan i annan bann sityasyon parey ki letan bann mezir i ganny pran pour en koz nasyonal, me letan ou sorti dan sa lirezans, mon *believe* sa keksoz i bezwen

retournen parey i ti ete. Pa servi sa preteks pou dir parey nou dir an Angle, “*good riddance*”. I pa byen. I pa normal.

So, letan nou pe koz lo sa size bonous, mon retournen, kot i annan ti dir poudir be vi ki nou pe donn trezyenm mwan, ou pa pou gannnen bonous prezan.

Sa li menm li ti demoraliz plizyer travayer. Akoz i santi poudir in travay dan en lannen e bonous i dapre reveni ki sa antite i fer. Sirtou si nou pe koz paraetatik ki apre i ganny en poursantaz i ganny *shared* antre sa bann travayer. E sa ti – So, sa nou bezwen fer sir i ganny eklersi.

Lot pwèn ki mon anvi touse se ler en travayer i siny son Lagreman, in aksepte pour li vin travay dan sa departman, dan sa antite, i bezwen – parey nou dir i annan en *job description* ki i gannnen. I bezwen azour ek son *job descriptions*. Ok.

Akoz ler i al fer *interview* i ganny dir son lekspektasyon. E parfwa menm ou ganny demande, ki ou *salary expectation*? Ok ?

Be letan tou sa bann konversasyon in ganny fer tou lede parti in agree pour li *enrol* sa travayer, ou bezwen prezan annan bann lankadremman pou

fer ki i performen. Souvandfwa mon krwar sa ki i manke.

E letan mon pe dir sa ki i manke, ou osi bezwen donn li zouti pour li travay avek. Ou pa donn li zouti pou travay avek, me selman ou le i delivre lo tel, tel, pli o oter.

Letan sa travayer i vin devan avek son *line managers*, sa ki ansarz li i dir; be, mon pa pou kapab delivre aköz i annan sa kalite mankman. E ou, ou dir li poudir nou pa pou kapab. Swa nou napa, ouswa ou pa al rode. Be ou ekspekte li performan? Non. I pou travay aköz sa ki ou'n donn li pou travay avek.

So sa osi i bezwen annan en refleksyon pou vwar letan nou pe koz performans, eski – la servis piblik tou sa bann antite – byensir ou pa pou kapab ganny tou sa ki ou demande.

Be eski *the basic for your performance* pou delivre lo ou lobzektif ki nou ganny *set* dan en lannen, i la? Eski kondisyon lanvironnman i la dan sa landrwa travay? Be sa osi nou bezwen regarde.

So, Madanm Speaker i kler ki Minis in dir ki *foreigners* ou *foreign workers* pa pou gannnen trezyenm mwan saler. Si ou en *trainee* ou pa pou gannnen en trezyenm mwan

saler. E si ou lo probasyon byensir ou pa gannnen trezyenm mwan saler.

E nide *pro-rata system* ki la i osi ede pour ki i arive parfwa i annan bann mouvman dan travay. E sa endividi i a santi li osi poudir, be, malgre mon pa'n fer sa *full* konplet, mon ti pe ede dan en lorganizasyon. Petet mon pe al dan en *greener pasture*. Ouswa mon annan en problem lasante, mon'n bezwen arete. Bann diferan legzanp. I a kapab osi ganny son bout larzan ki in travay.

So mwan mon, mon dakor ki trezyenm mwan i en keksoz ki i merite, me selman nou bezwen met bann lankadrem sipervizyon. *Now*, an terminen lo size sekter prive. E Minis ou'n anonse ki pou annan R5milyon ki pou ganny met devan pou asiste. E la mon annan sa pou dir lo la.

Mon ti a swete ki sa legzersis, ouswa sa komite ki pou ganny *set up*. Ou'n nonm 2 departman Minis ki pou travay lo sa. Byensir Finans pou *onboard*, e Departman Lanplwa pou *onboard*, pour nou *be careful* lo bann soumisyon ki vin devan zot. *Ok*.

Nou'n pas dan leksperyans *FA4JR* dan lepase, kot en kantite kritik. E petet, mon kapab dir sa ki pa ti merite

ti gannnen. Nou'n aprann par serten sa bann keksoz. Nou bezwen fran.

E la nou ti a kontan ki sa enn fwa ki letan nou pe fer sa legzersis pou donnen. Mon pa konnen si 5milyon pou ase mwan, aköz mon pa konnen ki kantite sa bann antite ki pou vin devan.

E dayer – e dayer, tou antite i sipoze konnen li son *calendar year* i sipoze *factor in* trezyenm mwan saler li, dan son Bidze. So, i pou napa en lekiskiz. Me selman i arive parfwa kot sirtou *private sector* ki ou pou rankontre serten difikilte finansyel.

Me selman dan *public sector* sa pa sipoze arive, aköz ou sipoze ou'n *factor in* sa ou, depi letan pou'n soumet ou Bidze *the year before*. *Ok*.

So, la lo kote sekter prive sa *due diligence process* mon swete i ganny fer dan en fason vreman transparan, e ki nou Lasanble osi nou ava kapab kestyonnen letan sa i ava ganny fer.

Deadline pou fer bann soumisyon anba trezyenm mwan saler regilasyon i - pou peye i 31 Zanvyè lannen ki pe vini, i ava ganny fer. E la osi nou ava konnen ki kantite ki'n vini ki'n vin demann lasistans

avek Gouvernman pou fer son bann peyman.

E i ava annan bann zistifikasyon ki osi nou ava petet dan en fason koman Manm Parlman – Akoz letan nou pou vin *vote* lo Bidze, nou pou kestyonnen sa boner lannen prosen pou konnen ki kantite larzan ki'n ganny depanse.

So, avek sa Madanm Speaker, mon pou – mwan mon pou siport sa lankadremman trezyenmman saler dan son totalite pou pey *full*.

Me osi mon konsyan ki bann mezir performans i bezwen en pti pe plis *stringent* pou vwar ki travayer i *well delivered* e get tou son bann konteks, depi sa departman an zeneral ouswa antite, si bann sipervizyon pe ganny fer ase byen. Si travayer pe ganny donnen son travay pou fer e zouti pour li travay avek osi. So, mersi.

(APPLAUSE)

MADAM SPEAKER

Mersi Onorab. Nou ava aprezan pran en *break* ziska 2er apre midi kot nou ava rebran nou *Sitting*.

(BREAK)

MADAM SPEAKER

Bon, nou ava rebran nou biznes pou ozordi. Nou ankor annan bann entervenans, Onorab Valdana Sultan.

HON VALDANA SULTAN

Mersi Madanm Speaker. Bonn apre midi Madanm Speaker, bonn apre midi Minis avek ou delegasyon. Madanm Speaker, sa Lalwa devan nou ozordi i enn ki son lanons in anmenn bokou lazwa pou bokou dimoun avan ki nou'n mazin son bann lenplikasyon.

Me avan mon al dan detay lo la, permet mwan Madanm Speaker, pou mwan fer mon pozisyon tre kler lo sa size. Mon pa kont drwa travayer me drwa i bezwen balans avek responsabilite ek merit. Mon repete, mon pa kont drwa travayer me drwa travayer i bezwen balans avek responsabilite ek merit.

Madanm Speaker, mon pou troun en pti kou lo en parti ladres Prezidan Herminie ki i ti fer devan nou Lasanble Vandredi le 14 Novanm avan zot gran *rally* laviktwar ki ti montre zot vre lafors. I ti dir e mon *quote*, “Ozordi mon vin devan zot pou donn zot lespwar pou rekonnet zot devouman e lev zot moral e ankouraz en

servis piblik baze lo merit stabilite ek lazistis” *Unquote*.

Madanm Speaker, letan Prezidan ti pe koz lo la, letan i ti fer sa mansyon i ti pe adres en pe konsernan trezyenm mwan saler.

Mon sa ki mon pe demann mon lekor ozordi, eski ler en travayer ki devoue ki donn tou, ki fer sir i la pou travay toulezour, i pa mank travay pou en senp pti wenk, en senp ti wak, parey nou dir an Kreol e li i toultan i la pe devoue li pe donn tou menm, ler i obzerv son koleg ki absant travay bokou ki pa prodiktiv, mank devouman, mank motivasyon e li i war li a lafen lannen pe ganny menm reminerasyon ki li eski sa i elev son moral? Eski sa i baze lo merit? Eski i annan lazistis? Sirman non.

Madanm Speaker, i vre ki en pti larzan an plis sirtou lo komansman lannen en moman kot tou fanmir in selebre, in fer en pe depans an plis pou bann moman festivite e menm osi pou prepar pou nouvo lannen lekol bann zanfann sa pti larzan i vin en vre soulazman. Mon toutafe dakor ki travayer i ganny tou zot larzan, me i ganny sa larzan a mon avis, i ganny sa larzan me fodre ki i vin avek merit.

Nou bezwen admet ki pa tou travayer piblik la deor ki vreman dakor avek sa trezyenm mwan vin en drwa. Bokou in menm komans dir ki la li osi i pou koman konnen kot dokter i ete, li osi i a ganny son konze i a pran son konze. Akoz nou tou nou konnen en ta landrwa travay i annan travayer ki ganny konze me i pa pran akoz i dir mon ava ale kantmenm mon a tir la, met la me selman mon a travay, mon pa a prodiktiv parey toulezour me selman mon a la.

Nou tou nou konnen i annan sa bann kalite travayer devoue dan lanplwa. E la i pou mazine poudir i be plito mon pran mon konze ki mon al ranplas mon kanmarad e apre lafen mon ale mon travay apre mon kanmarad lafen lannen i ganny menm trezyenm mwan saler avek mwan !

Wi, nou tou nou bezwen larzan, me bann travayer devoue bann travayer debouryer pa ti zanmen konplent sa fason ki trezyenm mwan saler ti pe ganny peye. Akoz zot ti konnen ki zot, zot in travay, zot in donn tou e alor napa en rezon pou zot enkyet.

Madanm Speaker, sa trezyenm mwan ki ti atase avek performans ti ankouraz travayer pou reste prodiktiv.

Mon priye ki sa amannman pa anmenn nou servis piblik dan en dekadans kot tou dimoun i komans fer paryaz mank travay akòz in travay plis ki son koleg e i ganny en rekonpans.

Madanm Speaker, taler atraver ou, Onorab Trevor Louise in dir ki travayer i bezwen konnen ki zot bezwen pran zot responsabilite. Amwen li in konpran sa, bravo Onorab lo ou fason panse. Me Madanm Speaker, en keksoz ki Onorab in dir ki mon pa dakor avek se ki in demann bann travayer pou omwen fer *the bare minimum* li ekspekte de zot.

Madanm Speaker, seryezman Onorab pe demann travayer pou fer *the bare minimum*? Letan ki nou, nou pe pres plis prodiktivite, zot pe krwar dan *bare minimum* i ase? Mon a kit sa la pou en pwen refleksyon.

Madanm Speaker, fodre pa ki US i osi bliye ki an Novanm 2009 anba Ladministrasyon Prezidan Michel zot ti lans en kanpany 'Leve Debourye' ki ti ganny dirize par Minis McSuzy Mondon e la nou a rapel byen nou santez tre popiler Mis Antoinette Dodin ti sant sa sanson 'Leve Debourye'.

Madanm Speaker, akòz zot ti bezwen lans en tel

kanpany? Mon mazine sirman i akòz zot ti vwar nesosite pou motiv travayer pou pran responsabilite e ankouraz plis prodiktivite ki swa dan servis piblik, sekter prive oubyen menm si ou ti *self employed*.

Zot ti menm al pli lwen, pou ou ver en konpleks mikro antrepriz an Zen 2015, si nou mazin byen sa ti ganny atase avek en program reform ekonomik nasyonal. Zot ti apel sa batiman Providence 'Leve Debouye'.

Madanm Speaker, trezyenm mwan saler ki i atase avek performans i pa ti zis ankouraz prodiktivite me i ti osi en platform pou bann travayer-bann anplwayer plito, pli byen *monitor*, sirvey bann travayer idantifye abilite pou prodiksyon dan (*technical issues*-) e menm idantifye bann mank plis lankadreman.

Taler atraver ou Madanm Speaker, i annan Onorab Vidot ki'n mansyonn (*technical issues*), eski sa bann dimoun ti ganny vremen sivre, eski zot ti annan sa (*technical issues*), nou ti esper lafen lannen pou mon kapab ziz en dimoun? Me mon rapel byen, Madanm Speaker, ler mwan mon ti dan lekol koman en *Deputy Headteacher* e menm *headteacher* e bann

(*technical issues*) en group dimoun pou li al (*technical issues*) ti en keksoz lafen lannen me i ti kontinyen (*technical issues*) dapre zot target.

Sa ki pa ti arive zwenn son target, si ou ti pe akonpanyen li tou dilon ti pou napa en rezon pou li pa vreman zwenn son target. E bann ki pa ti zwenn son target i pa ti ganny pouse parey nou pe ganny dir, zot ti ganny met lo en *performance improvement plan* e bokou travayer ti travay pou li pa arive lo la.

Madanm Speaker, la ki senpleman en drwa eski sa pa pou redwir konpetisyon dan kalite travayer? Eski i modernizasyon oubyen regresyon? Mon'n osi tann serten Manm lo kot kote latab dir ki Prezidan Herminie i delivre lo son promes.

Alor, eski bann travayer STC ek PUC pe espekte ganny zot bonous parey i ti dir dan enn bann *rally* an plis in osi dir ki kontan pa kontan fodre ki Seselwa i ganny *backpay* zot trezyenm mwan ki zot pa ti gannyen an 2020 ek 2021. Petet Minis i a kapab dir nou eski zot pe dir nou ki la zot ladministrasyon pe al fer sa posib?

Petet zot a dir mwan ki Prezidan in osi dir ki sistenm performans dan Servis Piblik pou kontinyen aköz i en zouti enportan pou mezir travay endividyel asire ki lobzektif lorganizasyon i ganny realize pou donn bonous si posib, me Madanm Speaker, konbyen servis piblik i donn bonous? kan eski bann travayer tel ki bann ansennyen bann *nurse* pou ganny bonous? Mon a les zot dir nou aköz nou tou nou konnen ki i pa posib pou tou servis piblik donn bonous.

Madanm Speaker, sa trezyenm mwan koman en drwa i kapab osi anmenn bann lenpak negativ lo bann pti biznes. Menm i Prezidan in prononse ki son administrasyon pe met de kote R5milyon pou soutenir bann pti biznes pou ki sa pa vin en fardo pou zot, me posibilite i reste ki serten bann pti biznes ki deza pe *struggle* zot kapab fer zot travayer *redundant* pou koup zot depans e petet i annan ki pou bezwen servi.

En lot refleksyon ki mon'n fer ler Prezidan in anons sa zafer 5milyon se eski sa pa pou vin en nespes FA4JR? Lekel sa dimoun ki ou'n dir li i annan larzan pou donner i poudir ou non mersi mon annan ase? Sirman laplipar biznes pou fer

laplikasyon pou ganny sa lasistans.

Se la ki sa 5 milyon i riske pa ase, i riske pa ase parey Onorab Aglae in mansyonnen pli boner lo size *FA4JR*, ki endirekteman in dir no ki anba son ladministrasyon avan *FA4JR* in petet mal ganny zere.

Madanm Speaker, Prezidan in osi anonse ki apre ki i ti'n fini promet bann pti biznes sa 5 milyon pou la pou ed zot, ki pou annan striktir pou evalye ki mannyer sa bann biznes pou ganny asiste.

Nou a espere pou nou war kriter ki Gouvernman pou vin avek e nou a gete alor lekel sa bann pti biznes ki pou ganny asiste aköz sa kriter nou -a ankor war li la, koriz mwan si mon al aköz pa bliye sa peyman i lanmenm la pros li. E si nou pe al dan *backpay* petet sa pou vin en lot deba.

Me avan mon terminen Madanm Speaker, mon zis refer mon pozisyon ker lo sa size ki mwan mon pa kont drwa travayer, me drwa i bezwen balans avek responsabilite ek merit. Avek sa Madanm Speaker, mon a dir ou mersi.

(APPLAUSE)

MADAM SPEAKER

Mersi Onorab. Onorab Sandy Arissol.

HON SANDY ARISSOL

Mersi Madanm Speaker. Bonn apre midi Minis avek ou lekip.

Bonn apre midi mon bann Manm koleg Onorab e tou dimoun ki a lekout espesyalman bann travayer Seselwa. Madanm Speaker, mon ti a kontan letan mon komanse, ti a kontan felisit tou bann travayer i pe ekout nou e tou bann travayer ki kontinyen travay pou amelyor lekonomi nou pei.

Ki leve tou le gran maten, zot pran zot bis, zot vin travay e zot kontinyen donn tou zisteman parey bann travayer etranze ki travay dan nou pei ki ed nou avek nou lekonomi an vi parfwa nou ganny problemm mende, me bann etranze zot la pou donn sa sipor.

E letan mon pe felisit bann travayer, mon bezwen osi mazin nou bann frer ek ser ki tou resaman zot in perdi zot plas travay dan sa 100 zour ki ankor egziste. Nou bann travayer pou napa en trezyenm mwan saler, zot pou napa en saler e zot pou napa en Nwel parey nou dir letan nou osi dan Lasanble Nasyonal nou pe koz lo trezyenm mwan saler zisteman, pou en lot group Seselwa ki

bann travayer Seselwa ki nou pe koz lo la.

Alor, letan nou pe zisteman koz lo saler, trezyenm mwan saler koz lo travayer, mon mazin osi nou bann frer ek ser ki'n perdi zot plas travay dan sa 100 zour ki mon pa'n tann Minister Lanplwa dir naryen lo la.

Me letan osi i annan bann apwentman ki'n ganny fer dan sa peryod 100 zour, bann lapwentman kot nou kapab tir bann dimoun en pe partou, partou met zot dan bann pozisyon kle, dan nouvo ladministrasyon san okenn sa bann pozisyon i ganny *advertise* sa osi mon pa'n tann Minister Lanplwa fer okenn deklarasyon dir okenn keksoz oubyen sir en lakor, avek Lalwa Lanplwa ki nou annan Sesel, tousala i fer mwan mazine dan sa 100 zour ki'n arive dan nou pei.

Mon anvi komanse par dir mon rapel parey Onorab Valdana in dir, ti annan sa kanpanny 'Leve Debourye' ki nou bann Manm Lasanble nou ti ganny sans asiste ki ti fer dan *STC Conference Room* mon'n byen rapel, e sete McSuzy Mondon sa letan ki ti Minis Lanplwa.

Ti annan en kanpanny 'Leve Debourye' parske mon

mazine ladministrasyon sa letan ti pe vwar serten difikilte avek travayer, trenn lipye, napa prodiktivite, ti napa pozitivite e nou ti annan en problem. Alor, en pti ekstre ki Minis McSuzy Mondon ti dir sa letan Novanm le 12 Novanm 2009; -

"Seselwa, tou travay i enportan, se selman atraver travay dir" McSuzy Mondon i dir; - "se selman atraver travay dir ki nou pou ganny nou saler, nou valer e nou dinyite 'Leve Debourye' i en loportinite pou nou re evalye nou mantalite anver travay e osi en Lepep pou nou pran responsabilite anver nou bezwen e bezwen nou fanmir.

Alor, sa ki kapab travay i bezwen leve e al travay. Nou program reform ekonomik pou reisir ankor plis si nou pran ban loportinite ki sanzman pe anmennen, annou servi fasilite ki program 'Leve Debourye' pe met a nou dispozisyon".

Sa sete en pri ekstre ki Minis Lanplwa sa letan ti dir Madanm Speaker, parske nou annan en problem. Nou bezwen e osi avoue letan nou annan bann group travayer ki debourye Sesel, nou annan osi bann travayer ki pa neseserman donn 100poursan i egziste sa anba nou ladministrasyon, anba zot

ladministrasyon, an lot
ladministrasyon pou vi ki nou
pou fer fas avek.

E pa bliye dan Bidze
Siplemanter ti annan sa ki nou
apel larzan ki ti'n ganny fer
retourn en par bann Minister,
parske ti annan en mankman
recruitment par bann Minister.
E sa mankman *recruitment* i
retourn ankor lo sa kanpanny
'Leve Debourye' parske a sa
moman zot ti santi poudir
Seselwa pa pe vin devan pou zot
apply, rod en plas travay.

E dan sa enn sa Lasanble
Madanm Speaker, nou ti ganny
dir poudir nou annan anviron
8mil Seselwa ki pe fer bann
dyob enformel. Ki savedir bann
dyob enformel? I pa dan en
lanplwa permanan ; senpleman
i pa pe kontribye dan fon
sekirite- i pa pe kontribye pou li
ganny en pansyon letan i alaz, i
pa pe pey taks, li menm i
koman en endividi ki ed nou
pou fer tou lezot demars.

Tousala nou ganny dir
dan sa Lasanble Nasyonal. Me
letan nou get nou popilasyon
ozordi, avek bann etranze ki
antre pou ed nou ou donn nou
en koudmen, sa i montre poudir
Sesel i pa en zafer ki fek arive
ama en pe letan i la.

E sa ladministrasyon i la i
ava enportan letan nou get son
Bidze lannen prosen pou nou

vwar ki kantite *recruitment* in
kapab fer pandan letan ki i ava
la, swa ki pou'n kapab *recruit*,
swa i pa pou'n kapab *recruit*,
parske sa i en sirk ki fer letour
e nou pou zwenn nou pou ale
nou pou kit li la, e nou vin
zwenn li la.

Alor, mon'n komans
koumsa parske mon krwar i
enportan poudir bann Seselwa
ki pe ekoute laba deor letan pou
zot dir zot vin vizit zot bann
dimoun dan kanpanny bann
dimoun in dir ek zot sa, me i
annan keksoz osi bann
kanpanny en dimoun i dir avek
nou.

Ou konnen sa ki
dekourazan parfwa se letan ou
annan en group dimoun dan
travay, ki li i donn tou i pa
zanmen asiste tou lanterman ki
annan, zanmen son zanzan i
malad en kou, toultan li i
boner ; souvandfwa li i ariv
avan son bourzwa dan term
Kreol ki nou servi, e toultan i pe
met en pti zefor an plis pou li
travay.

E li sa travayer li i war
poudir Sandy Arissol obor li tou
le Lendi i bezwen raport kot
Dokter pou li ganny en papye
konze; i vwar poudir Sandy se li
menm li ki al plis lanterman
dan lasemenn. I vwar li poudir
Sandy ki son zanzan i malad

plis pandan en mwan, i trouve li, i trouve sa.

E sa i bann keksoz ki egziste partou dan nou Minister, dan bann Minister e Sesel. I annan en group dimoun ki leve e i travay dir, me osi nou bezwen annan sa balans kot ou annan en group dimoun ki pa neseserman donn 100poursan, nou tou nou konnen sa, se pour sa rezon ti annan sa kanpanny 'Leve Debourye' annan plis responsabilite annan, delivre plis e motive. Sa se laliny ki Onorab Trevor Louise in koz lo al ki mon dakor, mon dakor mwan.

Se pour sa rezon Madanm Speaker, mon osi mon ti dir mon parti sa lekip paret *LGB* in-Onorab Bernard Georges in dir koman *LOTO* sa letan pou nou entrodwir trezyenm mwan saler. E mon rapel letan nou ti entrodwir trezyenm mwan saler ti annan en leokri par parti mazoriter sa letan e mon rapel sete Jean-Paul Adam ki ti Minis Finans ki ti dir ki ti annan en dokiman ki'n perdi lo son latav se sa dokiman trezyenm mwan saler ki zot ti pe travay lo la.

Kot ti pou annan en lenvestigasyon pou konnen ki'n arive e ziska nou pe koze ozordi le 9 Desanm 2025, zanmen nou'n ganny en lenvestigasyon lekel ki ti pran sa dokiman,

lekel ki ti *leak* zot dokiman oubyen si zanmen ti annan en dokiman.

Be mwan Sandy John Arissol mon ti form parti sa lekip ki ti zisteman ki ti an faver ki nou bann travayer i ganny en trezyenm mwan saler, nou ti vote e letan mon tann *US* pe dir ki sa i en drwa zot, zot in annan en mazorite depi 1993 me zanmen zot in anmenn en tel Mosyon dan Lasanble Nasyonal pour ki Seselwa i ganny en trezyenm mwan saler.

Me ozordi, nou vwar zot vin avek sa, parey Onorab Georges in dir, konmsi se Dr Patrick Herminie ki Prezidan ozordi, li ki'n envant trezyenm mwan saler Sesel. Non Madanm Speaker, pa li ki'n envante zot senpleman sa ki zot pe fer la, zot pe fer li vi en *easy way* pour ki tou travayer i ganny en trezyenm mwan saler, ki mwan mon 100poursan siporte tou travayer i ganny en trezyenm mwan saler.

Dakor avek sa se pour sa rezon mon ti anmenn sa- mon ti siport sa Lalwa, me i reste pou nou kapab reasir nou bann Minister, reasir nou bann travayer ki travay byen pour ki letan tou dimoun i vin otomatik napa labi. Ki labi mon pe koz lo la?

Letan en- tou Seselwa in ganny dir poudir son trezyenm mwan pou otomatik, eski prezan ou ki deside pou dir li kan i pou al lanterman son vwazen? Ou ki pou deside ou ki ou dir li kan i pou anmenn son zanf an kou lopital? Ou ki pou deside oubyen ou ki poudir li kan i pou sov en pti kou *Dubai* 4 zour i ale Zedi swar pou li troun Dimans apre i mank avyon i vin Lendi oubyen Mardi bomaten ?

E son trezyenm mwan i garanti li, alor ki ou pou kapab dir li ou? Dr Patrick Herminie in reasir li dan sa kanpanny 100zour son trezyenm mwan i la, trenn ou lipye, lev ou lipye kit ou lipye menm landrwa, me selman son trezyenm mwan i reste. Sa ki nou bezwen *be careful* avek, se sa ki i konsern mwan parske nou pe koz prodiktivite.

Si Seselwa Minis ozordi i kapab reasir nou poudir avek sa kanpanny, avek sa ki zot in propoze Seselwa pou delivre sirtou dan nou Minister, dan bann Minister mon napa okenn difikilte avek sa. Me selman parey letan mon'n komanse mon'n dir, ti annan en program parske firanmezir toulezour nou ganny sa bann difikilte avek bann travayer an relasyon kantmenm i annan en

pti group zot nou bezwen pran kont.

Parske prezan letan ou get sa pli gro group ki li i pe vin granmaten, i pe debourye, i pe donn tou, ki li i pou fer prezan koman imen? Ki li i pou fer koman en imen ki get sa enn o bor li ki zanmen i la? Parey Onorab Valdana i la, li osi i pou war en kou kote klinik i ete, i pou konnen kote ban klinik i ete.

Nou annan en sityasyon dan nou pei ki pa pou neseserman korek pou nou, koman en pti pei ki bezwen tou mendev neseler i pa pou neseserman korek. Parske sa i pou fer ozordi ki dimoun pa pe travay avek en bi pou dir mon anvi ganny en pti keksoz an plis alor mon bezwen debourye.

Se pour sa rezon letan nou anvoy nou zanf an lekòl toutan nou ankouraz nou zanf an ou bezwen aprann lir, aprann konte, aprann ekrir, met tou *study* tou le swar. Parske sa i pou fer ki letan ou fer ou *assessment* ki vin koman en pti *appraisal* ler ou fer ou legzanmen i permet ki letan ou sorti dan *S1(2)* lannen prosenn ou mont dan *S2(1)*.

Parske ou'n fer pli byen. Sa i fer ki letan ou fini lekòl, ou ganny ou en zoli sertifika, i permet ou pou ou kapab ganny

en bon lanplwa, pou ou ganny en bon saler pou ou kapab ed ou fanmir ki'n donn ou tou sa letan ziska la. Se pour sa rezon nou dir sa nou zanfan, parske nou ti anvi ki nou travayer Seselwa i pe travay avek en bi pou donn tou parske mon anvi *achieve* en keksoz a lafen lannen.

Be letan nou'n tann koz lo an relasyon avek *COVID*, ti kennsel 2an, 20 ek 21 wi si mon pa tronpe 20 ek 21 be i annan en keksoz ki'n ganny dir poudir nou Lasanble nou ti ganny tou sa ki pou nou. Pa korek, Lasanble koman en lenstitisyon letan nou ti dan peryod *COVID* i an en kantite keksoz ki ti koupe kot Lasanble zis parey dan tou bann Minister Gouvernman.

E ozordi ler nou pe koze la kot Lasanble i annan keksoz ki'n koupe ki zanmen nou'n regannyen kot Lasanble. Parske pei ti pe fer fas avek en difikilte ki nou pa ti anvi sa sete *COVID* Madanm Speaker.

Se pour sa rezon Gouvernman ti entrodwir *FA4JR* sa letan, parske pa zis Gouvernman ki ti dan difikilte me bann biznes ti pe pas atraver difikilte pou zot pey zot travayer, pey zot *rent*, annan keksoz depans. Se pour sa rezon Gouvernman ti entrodwir *FA4JR* pou zot kapab asiste

bann biznes zis parey Gouvernman ti annan serten depans ki pa ti kapab fer.

Me selman sa letan Gouvernman ti asire ki omwen sa travayer ti antre dan lakour avek en saler. Sa ki ti arive. Nou bezwen osi kapab rekonnet sa Madanm Speaker.

Me mon kontan letan zot in koz an relasyon avek 2020 ek 2021. E la mwan ozordi mon anvi fer en *plea* avek Minis, mon anvi fer en lapel e mon anvi demann Minis en keksoz ki pou reprezant Gouvernman dan Lasanble Nasyonal. E dan sa 100zour mon ti a kontan ki la ki 21, 20 ek 21 in ganny prononse dan Lasanble Nasyonal kot bann travayer zot ti mank zot trezyenm mwan saler.

Be la mon anvi la demann avek Gouvernman pou mon donn en *backpay* tou travayer ki pa ti ganny zot trezyenm mwan saler 2020 ek 2021, sa i ava tonm dan zot 100zour parske sa se Prezidan Herminie ki'n dir sa pa mwan ki'n dir.

Ler zot pe koz son promes 100zour sa i en *statement* ki li i fer dan son promes 100zour, pou nou *backpay* bann travayer ki pa ti ganny sot trezyenm mwan saler 20/21. Alors i en promes 100zour ki zot pe delivre, alor mon anvi ki dan sa promes 100zour si zot senser

annou donn en *backpay* tou bann travayer ki pa ti ganny zot trezyenm mwan 2021/2021.

Mon ti a kontan zot peye sa larzan, parske la zot in komans byen avek bann Arab, en group dimoun ki zot pa ti pou bwar en labyer, zot pa ti pu bwar en *champagne* avek, be la nou war zot pe asiz avek atab byen paltole, byen kravate. Larzan palto in donner. Si i annan larzan palto mon mazine i bezwen annan larzan la pou nou kapab donner *backpay* tou ban travayer 2020/2021 ki pa ti -ganny trezyenm mwan saler.

Zis parey la nou vwar poudir nou 50milyon zisteman la, i ava enportan pou nou Vis-Prezidan ki isi dan sa Lasanble Nasyonal i ti dir ek nou i ti pe al rod nou \$50milyon, la an vi ki in ganny pozisyon Vis-Prezidan Larepublik Sesel, i ava enportan pou li onor son komitman e rod nou 50milyon. Sa i ava fer ki nou a kapab donn en *backpay* tou travayer ki ti mank zot larzan 2020/2021...

(APPLAUSE)

HON SANDY ARISSOL

zisteman, parske nou ti dan en kriz ekonomik, la zot in vin o pouvwar napa leskiz nou, nou pa ti fer, nou pa'n marse dan

distrik, nou pa'n ekout dimoun, nou'n kalkil zis nou lekor. La zot, zot in vin sa sover sa pep, zot in ekout dimoun dan kanpanny, zot in ganny eleksyon atraver tou sa 100zour, atraver tou bann promes 100zour.

La mwan mon pe demann enn lo lapar tou bann travayer ki pe ekoute pour ki zot ganny en *backpay* pou 2020/2021 kalkil li byen konbyen zot kapab gannye pour ki zot ava kapab obor zot promes 100zour.

E lo la, mon ti a kontan ki asire ki Minis pou Lanplwa i kapab asir nou osi ki tou bann travayer *PUC* parey Onorab Valdana in dir, ek tou bann travayer *STC* ki zot bonous i garanti sa lannen zot osi avan lannen fini, pour ki lannen prosen nou pa kapab ganny en *PNQ* ki ava pe rod bonous, travayer *STC* ki ava pe rod bonous, travayer *PUC*.

Gouvernman in sanze, tou keksoz i *ok*, tou keksoz pou mars byen dan nou pei e pa bliye bann trwazyenm-az pou ganny zot 800 zot osi lannen prosen e pa bliy bann *carers*. Ler mon ti mansyonn bann *carers* tou dimoun ti pe tipin mwan lot kote latab. Pa bliy bann *carers* osi pou nou asire an vi ki zot in ganny larzan la.

Larzan nou pou annan, tou keksoz pou *ok* pou nou kapab asire ki sa promes 100 zour Mr Patrick Herminie koman Prezidan i ava kapab *fulfil* e pour ki Seselwa i ava viv byen e pou zot viv an pe san- aköz nou, nou ti pini zot a nou pa ti donn zot an 2020 ek 2021.

Madanm Speaker, i annan bann pti biznes ; letan nou'n koz an relasyon avek 5milyon, mon pe zis demande kekfw Minis dan son *summing up* i a kapab eksplik nou en pti pe ki manner i pou marse an relasyon avek bann biznes ki pou ganny difikilte zisteman pou zot pey zot trezyenm mwan *in full* la parey i pe demande.

Eski sa pa pou fer ki prezan bann biznes pa pou servi sa koman en leskiz, parske i pa pou anvi donn sa travayer ki pe trenn, trenn lipye en pti gin dan son lakonpannyen sa trezyenm mwan, alor i pou pli fasil pou li fer li arete san pey li. Sa i enn, e pran en etranze.

Dezyenmman an relasyon avek *claim*; eski parey Onorab Valdana in dir, i pa pou fer ki i pou vin en sityasyon *FA4JR*, parske okenn pti biznes ki pou tande, ki pou okouran poudir Gouvernman pe donn en pti lasistans, alor otomatikman i pou vini i ou dir ek ou get sa

Minis, oubyen Minister Lanplwa mon napa mon, mwan sa mon bezwen ed mon, donn mwan en lasistans e sa i pou vin koman en lot *FA4JR*.

Si Minis i kapab donn nou en pti pe gidans ki fason zot krwar poudir sa travay pou ganny fer pour ki i asire ki tou bann biznes zot ava kapab ganny sa lasistans nesaser ki zot bezwen.

Lot pti leklersisman ki mon ti a kontan avek Minis se atraver - se bann travayer etranze dan Gouvernman, parske Lalwa ki devan nou li, i pe koz zis lo travayer Seselwa. Me selman dan *memo* ki zot in fer zot sirkiler ki zot in fer resorti zot pe koz; -

"The thirteenth month salary applies to both Seychellois and non-Seychellois employees, whether on a contract or on a continuous employment or a fixed term contracts excluding those on service agreements or expatriate contracts."

Kekfw Minis dan ou *summing up* ou ava donn en pti leksplikasyon an relasyon avek sa 2 konponan travayer Seselwa ki dan *Bill* ozordi ki nou pe gete, avek memo, avek sirkiler ki zot in fer resorti. Trwazyenmman se an relasyon avek *fine* R20mil ki Onorab

John Hoareau in koz lo la. Parske letan mon pe get *fine* ki zot in entrodwir, si lakonpannyen Sandy Arissol pa'n pey en travayer son trezyenm mwan saler, i annan en *fine* R20mil ki i pou peye.

Eski pa i pli fasil pou en lakonpannyen ki annan 50 travayer i pa pey personn trezyenm mwan saler li, tou le an i dir ek Gouvernman la R20mil, parske kout mwan pli meyer marse pou mon pey ou R20mil, ki al fer depans trezyenm mwan saler pou 50 travayer ki pou kout mwan konbyen 1.5milyon, 1.6milyon? Eski sa pa pou ankouraz sa avek sa *fine*?

Oubyen sa *fine* ti devret pe dir avek li, mon pe *fine* ou 20mil avek en peryod letan ki ou bezwen pey sa travayer son larzan sansan la si ou pa pey li, nou pou ogmant ou *fine* oubyen pou annan lezot keksoz ki vin avek. Konmsi letan mon pe get *fine* R20mil, lafason ki mon'n get li si en lakonpannyen i annan sepa tan travayer, i riske vini servi sa koman en leskiz mon pey ou, ou *fine* R20mil, parske Lalwa i dir sa e mwan mon pa enterese pou pey sa travayer.

So, mon pe anmenn sa 2 pwen parske pou nou asire ki nou bann travayer Seselwa kot

zot été, zot osi zot ganny proteze dan zot lanplwa an relasyon avek Lalwa ki nou pe fer, e pou nou asire ki prodiktivite delivre e kontinyen dan landrwa travay kot nou, nou pe ale.

Madanm Speaker, trezyenm mwan saler pou tou travayer *full* dakor, larzan dan pos Seselwa *full* dakor, me selman i bezwen reste parske apre i pou retourn kot nou ankor, se nou menm koman politisyen parey in ganny dir ler nou pe pas devan laport dimoun oubyen zot menm ki pou *text* nou letan nou pe asize la;-

“mon larzan pa ankor antre”, “la sa enn in gannnen mwan mon pa ankor gannnen”, “la mon pe ganny dir fodre mon kite aköz tro bokou travayer”. Se nou menm politisyen ki pou gannnen sa.

Zis parey letan en travayer son larzan in antre an retar, premye dimoun ki i *call* li, i pa *call* son *HR* oubyen son *financial controller* li, i *call* nou koman bann politisyen, Onorab be get mon larzan sa mwan pa ankor antre la, i bezwen annan en problem lab. Aköz i pe mazine i bezwen anmenn son saler dan lakour e tou son bann benefis.

Alor Madanm Speaker, mon krwar lo sa bann pwen ki

mon'n fer resorti avek tou bann pwen ki nou bann Manm lo sa kote latib in fer resorti, nou reste siport tou nou bann travayer Seselwa.

E se pour sa rezon ki nou ti anmenn sa *Bill Trezyenm Mwan Saler*, nou siporte ki nou, nou travayer Seselwa zot kontinyen ganny tou zot benefis parey zot devret gannye, an menm tan nou siport tou travay ki pe ganny fer pou protez zot anba Lalwa parey sa detruwa pti legzanp ki Minis ava eksplik nou taler.

E osi Madanm Speaker, nou anvi ki nou bann travayer Seselwa zot kontinyen delivre pou asir servis pou zot dimoun zot anmenn pou nou asir produktivite pou nou kapab kontinite e pour ki nou bann Minister partou zot rann sa bon servis parey nou, nou'n toultan anvi e parey sa kanpanny 'Leve Debouye' ki mon'n dir ek zot ti egziste letan zot ladministrasyon ti la, avek bi senpleman pou ankouraz tou travay pou nou reste lo menm nivo e donn tou sa ki nou kapab an relasyon avek travay e servis pou nou pei.

Madanm Speaker, mon ava remersye ou e mon a remersye zot pou zot lekout. Mersi bokou.

(APPLAUSE)

MADAM SPEAKER

Mersi. Onorab Claudette Louise.

HON CLAUDETTE LOUISE

Mersi Madanm Speaker. Bonn apre midi Madanm Speaker, tou koleg Onorab, Minis avek ou delegasyon e tou dimoun a lekout.

Premyerman mon ti a kontan felisit Minister Lanplwa atraver Gouvernman *US* pou vin avek sa lamannman *Bill Lanplwa* a sa moman ki enportan e ki travayer in byen akeyir. An retiran kondisyon *appraisal* i pou rezourd bokou lenzistis ki petet serten travayer ti pe sibir, ki nou petet ki pas dan sa soulye nou pa pe keksoz koz bokou lo la.

Mazorite travayer Seselwa i senserman debourye vre e i fer zot mye balans zot Bidze e elev zot sityasyon finansyel. Zot rod lezot sours reveni pou konpliment zot saler me i annan osi ki pa neserman kapab aköz lezot komitman ou kondisyon lasante. Avek en trezyenm mwan saler plen, sa i pou en lavantaz i pou elev moral, soulaz zot ver bann depans lafanmir, lakour, kou lavi e permet zot zer zot bann plan e ekspektasyon.

Me mon annan en mesaz tre for ver sa *Bill*, se ki mon pe demande ki kouraz ek komitman bann travayer i ganny rekonnet e valorize, travayer i kontinyelman met zefor dan zot travay, non pa abize, kale ou trenn lipye parey nou'n tann koz lo la me avek responsabilite.

Bon performans e prodiktivite pou anmenn sikse zot lorganizasyon e satisfaksyon personnel. Anplwayer, tret zot travayer byen, e ki lanvironnman travay i bon e konvenab, provizyon pou zouti e materyo apropiye e adekwa i ava ankouraz travayer pou delivre plis ver kalite e kantite dan zot latas toulezour.

Travayer a reste plis lannen servis e sa i ava anmenn satisfaksyon dan tou lede kote. Mon fyer note ki sa i enn parmi lakonplisman promes 100zour Gouvernman *US* e mon aport mon sipor a sa *Bill*. Mersi Madanm Speaker.

(APPLAUSE)

MADAM SPEAKER

Mersi. Onorab Woodcock.

HON WAVEL WOODCOCK

Mersi Madanm Speaker. Bonzour Minis avek ou

delegasyon, tou Manm e tou dimoun a lekout.

Madanm Speaker, Lartik 35 nou Konstitisyon i koz lo *right to work*, drwa pou travay pou tou nou sitwayen, pou tou nou Seselwa. Leta i rekonnet drwa tou sitwayen pou travay dan bann kondisyon zis e favorab, mon poz sa la, mon ava retourn lo la pli tar.

United Seychelles
Madanm Speaker, ti napa zanmen okenn lentansyon pou anmenn trezyenm mwan saler. *Origin* trezyenm mwan saler nou konn tre kler lekel bann dimoun ki'n lite, ki'n lager e mon ti annan sa privez e mon ti la dan Sizyenm Lasanble ler nou ti anmenn Mosyon pou demann Gouvernman sa letan pou etabli trezyenm mwan saler.

E annefe ti enn nou promes eleksyon 2016 pou etabli trezyenm mwan saler dan nou pei. Sa bann letan zot ti donn toudsort kalite leskiz aköz ki zot pa ti pou etabli trezyenm mwan saler. Me avek presyon ki nou Lasanble sa letan ki ti mazorite *LDS*, *from* 2016 *onwards* nou ti met presyon lo sa letan Ladministrasyon Parti Lepep ki ti la anba Prezidan Faure e aköz nou ti mazorite nou ti kapab pouse e met presyon pour ki en

tel Lalwa i vin devan nou Lasanble Nasyonal e se nou an gran mazorite akòz *obviously* nou ti bezwen en mazorite *LDS* pou pas sa Lalwa Trezyenm Mwan Saler ki nou Lasanble ti pase- ti pase pour ki nou frer ekser Lepep Seselwa ki benefisye.

E anba Ladministrasyon *LDS*, nou'n toultan *advocate* e nou toultan baz trezyenm mwan saler dapre performans, lo baz performans pou ankouraz *service delivery*, pou ankouraz prodiktivite parey bann lezot Manm ki'n pran laparol avan mon, in koz plis an detay lo la.

50poursan *compulsory* e sa lot 50 poursan ti pou baze e in toultan baze lo performans e i annan bokou travayer Madanm Speaker, *even though* ki 50poursan ti *compulsory* e sa lot poursan ti- sa lot 50poursan ti baze lo performans, en kantite travayer ki'n travay e ki merite zot ti ganny zot *full*, zot *full* 100poursan.

E i annan bokou largiman lo sa size, kantite largiman lo si nou merit donn 100poursan *or* si nou merit donn 50poursan *compulsory* e sa lot 50poursan baze lo performans. E sa deba in deroule dan piblik parmi plizyer nou popilasyon travayer dan tou lede sekter, sekter prive

e dan sekter piblik osi e Gouvernman.

Kot menm bann anplwayer in fer resorti zot bann konsern ki zot in annan regardan trezyenm mwan saler an plen, akòz i annan largiman ki plizyer bann anplwayer in fer resorti konmkwa ki ler ou pou get kalite travayer i annan diferan kalite travayer, i annan bann ki serye, ki responsab, ki pran zot responsabilite, ki zot *deliver* lo tou nivo.

Me an menm tan ou'n toultan annan bann ki petet i en pti pe pli retisan ki zot annan *issue* avek ki pa pe neseserman *deliver* lo sa nivo, lo sa *level* ki zot anvi sa travayer i *deliver*, parey bann Manm in koz lo la boner, Onorab Arissol, bann ki tou le Lendi bomaten pe pran konze, bann ki a pe perform o nivo, ki byen boner zot pe kit travay zot pe ale ki zot pa pe delivre lo sa oter. E sa in aparan dan sekter piblik dan sekter prive.

E menm bann travayer ki nou'n koz avek en kantite sa ban travayer ki nou'n an konversasyon avek i dir ou koumsa poudir be get sa, mwan mon en travayer serye e responsab, tou le Lendi bomaten mon ariv travay byen boner, mon travay ziska ler kantite erdtan ki mon sipoze

travay e menm parfwa mon *deliver* bokou -plis ki sa mwan mon pe performen, mon pe vin travay e zanmen mon pe pran konze Dokter.

Me i annan serten travayer ki mon bann koleg ki zot, zot pa pe *deliver* parey, zot pa pe travay, zot pa pe travay zot pa pe performen, tanzantan zot pe mank travay e zot pa pe *deliver* lo sa nivo ki mwan mon pe delivre.

Yet, at the end of the year zot pe ganny menm trezyenm mwan saler ki mon, zot pe ganny mezire lo menm, zot pe ganny mezire avek menm mezir ki mon pe ganny mezire menm si mwan sa dimoun mwan mon responsab mon pe travay mon pe *deliver* e sa lot li i pe kale e mwan mon pe menm pe fer son louvraz e odela mon travay ki mwan mon sipoze fer.

So, sa i bann largiman ki plizyer nou zabitan deor, parey mon'n dir dan sekter piblik, dan sekter prive in diskite in met devan. Be an menm tan nou, Ladministrasyon *LDS* nou ti anvi ankouraz prodiktivite.

Me i malere mon'n tann en Manm lot kote latab atraver ou Madanm Speaker, ki'n dir poudir annefe in dir bann travayer *do the bare minimum*. Sa Onorab Louise ki'n dir sa, me annefe nou koman Manm

Lasanble nou pa kapab pe demann travayer *to do the bare minimum*, nou bezwen pe ankouraz tou dimoun pou nou delivre ti *the best of our capacity*.

Ou konnen, pou nou delivre, pou nou deservi sa pep dan ban responsabilite ki nou'n gannyen. Minis, in koz lo delivre lo en kontra sosyal, zot pe delivre koman en parti *United Seychelles* zot pe delivre lo en kontra sosyal.

E parey mon'n mansyonn lartik pli boner, Lartik 35 nou Konstitisyon i koz lo drwa pou travay, *right to work*. Leta i rekonnet drwa tou sitwayen pou travay dan bann kondisyon zis travay, dan bann kondisyon zis, travay dan bann kondisyon favorab. Drwa tou sitwayen pou travay.

Selman sa ki malere bokou nou bann frer ek ser pe ganny koudpye ozordi par Ladministrasyon *United Seychelles*. Zot pe ganny met deor, ki *obviously* zot pa pou gannyen zot trezyenm mwan saler *in full*. Baze lo merit *or not* zot in ganny met deor e definitivman zot pa pou benefisye parey zot in benefisye avek zot trezyenm mwan saler *in full*.

Sa se en lenzistis ki pe ganny fer anver plizyer nou

bann koleg, anver plizyer bann swa profesyonnel ozordi dan nou pei Sesel. Eski ti dan zot kontra sosyal pou pous nou bann travayer profesyonnel? Pou fer *musical chair* avek zot, zwe avek zot, zwe avek zot bouze manze?

Setyenm Lasanble mon ti dir e ozordi in ganny prouve vre, ki i annan- ti annan en lalis ki *US* Prezidan Herminie, *United Seychelles* in travay lo la e zot ankor pe travay lo la kot bann dimoun en lalis ban dimoun ki zot pou pouse dan diferan lo diferan nivo dan diferan pozisyon ler zot vin o pouvwar e la realite nou pe war la realite ozordi. *CEO*, *PS*, Direkter byento *DAs* e lezot pozisyon ankor.

Bann dimoun ki pa ek zot, en bann deza i pe koze deor la en kantite bann siporter bann aktivis pe koze, ki byento zot pe al pran tel pozisyon, dan tel Minister, tel landrwa *Mayor*, lot, lot menm bann pozisyon ki deza annan dimoun aktyel ki pe travay dan sa bann pozisyon deza i annan zot bann siporter ki deor pe koze e nou pe tande ki i pe dir zot pe al pran tel pozisyon.

Savedir i kler poudir i annan ankor bokou nou bann frer ek ser Sesel dan Gouvernman ki pe al ganny met

deor. Nwel pe vini, zot pe met nou bann frer deor. Mon kestyon e kestyon ki en kantite Lepep Seselwa pe demande la deor, eski zot annan leker? Eski zot in mazin fanmir sa bann dimoun?

Onorab Lepathy in koz lo Gouvernman *US*, Gouvernman *US* pou donn travayer *excavator*, dan plas pyos pou travay lo laferm. Me mannier mon pe gete zot pe aras depi pyos ek *excavators* travayer Madanm Speaker, sa ki pe arive ozordi dan nou pei Sesel.

Semenn pase nou ti anmenn en *PNQ*, *LGB* pou defann drwa travayer e malerezman en Lasanble mazorite *US* pa ti aksepte sa *PNQ*. Nou ti pe senpleman defann drwa bann travayer ki pe ganny pouse ki pe soufer ozordi dan nou pei Sesel.

SPPF/US i annan en kantite, non-selman nou pe sey defann nou bann drwa nou ban frer ek ser ki pe ganny pouse met deor Sesel malapropo, me osi nou pe defann drwa bann ki ti kapab ganny sa loportinite pou zot ranpli sa bann *post*, ganny sa bann louvraz, *apply* pou sa bann pozisyon, bann lezot nou bann frer ek ser ki kalifye deor.

E bokou bann nouvo lapwentman, bann nouvo *post*

ki pe ganny donnen ozordi pa ni pe ganny *advertise*, Lalwa Lanplwa pa pe ganny swiv ozordi pou plizyer sa bann apwentman ozordi sa bann pozisyon ozordi sa petet Minis i kapab donn nou en pti kontrandi lo la.

SPPF/US mon bann frer ek ser Lepep Seselwa ki pe ekoute deor in toultan annan en stratezi ki zot in adopte. Ler zot anvi en dimoun i ale, swa zot pous sa dimoun direkteman, ouswa zot *demote* sa dimoun, swa en lot keksoz ki zot fer ankor, zot transfer li dan en pozisyon bokou, bokou pli ba.

Parey zot tir en dimoun *PS* dan en Minister ou anvoy li *Deputy Headteacher* dan en lot Minister. Zot tir en dimoun Direkter zot anvoy li en pozisyon bokou, bokou pli ba. En dimoun i travay i ariv lo en nivo apre zot ka son lipye Madanm Speaker, sa se pirman malis.

Lo size trezyenm mwan, *pro rata*, i annan bann Manm ki'n koz lo trezyenm mwan *pro rata*, bann travayer ki'n fer mwens ki lan, i pa nouvo Madanm Speaker. *US* pe donn lenpresyon sa i en keksoz ki zot fek entrodwir, me se *LDS* ki ti anmenn sa.

E si *LDS* ki ti anmenn sa Madanm Speaker, i pa en

keksoz nouvo ki, ozordi ou pe donn lenpresyon pa zot ki'n anmenn sa in deza egziste, in deza vin an fors anba Ladministrasyon *LDS*. Se *LDS* Madanm Speaker.

En lot Manm in dir koumsa poudir se nou ki ti koup trezyenm mwan saler. Ou konnen koman en Gouvernman nou ti azir dan en fason konsyansye, dan en fason responsab. Mon krwar zot krwar poudir Lepep Seselwa in bliye sityasyon kriz ekonomik ki nou pei ti ladan an 2020, 2021 e 2022 nou'n- *well*, lafen 2021, 2022 ki nou'n vremen komans refer koman en pei gras a bon desizyon nou Gouvernman.

Zot bliye poudir be ki mannyer zot ti pe espekte travayer- zot ti pe espekte anplwayer pey trezyenm mwan saler 2020, 2021 Madanm Speaker, kan nou ti dan en kriz ekonomik, avyon pa ti pe vini, reveni pa pe antre dan pei. Zot ti anvi nou tir dile avek park madanm Clerk- Madanm Speaker? Eski sa ki zot ti anvi?

Zot konn tre byen aköz sa bann desizyon a sa moman ti bezwen ganny fer aköz si nou pa ti fer li nou ti pe al detri, nou ti pe la detri nou lekonomi, nou ti pe al detri lamazorite en kantite biznes ki ti deor sa bann letan ti nesaser sa bann letan

pou nou pran sa bann tel desizyon e apre nou ti *reinstate* trezyenm mwan saler, Madanm Speaker, an mezir ki pei in refer nou ti *reinstate* trezyenm mwan saler.

En lot keksoz ki Onorab Vidot in dir se ki *LDS* nou pa'n demann- nou pa'n donn benefis travayer. Konmsi pandan sa 5an ki nou'n la *LDS* pa'n donn okenn benefis travayer.

Be sa i pa vre Madanm Speaker, i mansonz, akoz mwan mon rapel ankor enn fwa dan sizyenm Lasanble mon rapel tre byen kot Prezidan Faure dan en letan kot Sesel ti'n fer byen, 2019 kot nou ti ganny *record arrival* dan nou pei Sesel Ladministrasyon Parti Lepep, *US* ozordi zot ti anvi donn selman 5poursan logmantasyon lo saler debaz.

E sa sete avan *COVID* i tape 5poursan lekonomi, i ti pe fer vreman byen ti napa okenn kriz ekonomik e nou, nou ti fer lotreman. *In fact* nou pa ti kontan, nou ti dir be 5poursan i tro pti git lo saler debaz pou nou donn sa pep, fodre zot donn plis.

E nou ler nou'n antre dan Gouvernman, apre ki nou'n ed sa pei re debout lo son lipye, refer ekonomikman an 2023 nou ti donn 10 poursan logmantasyon tou travayer dan

sekte piblik dan Gouvernman nou ti ogmant- nou ti pran *allowances* azout ansanm avek zot saler debaz e nou ti donn 10poursan logmantasyon.

E resaman ankor nou fek donn, avan 2025 nou ti donn ankor 7poursan ki fer 17poursan logmantasyon menm apre ki 2an nou'n fer fas avek en kriz ekonomik, nou'n kapab donn en logmantasyon sa kantite ki zanmen *United Seychelles*/Parti Lepep/ *SPPF* in kapab fer Madanm Speaker.

E Onorab Audrey atraver ou i annan sa lodas dir ki nou pa'n zanmen pas okenn benefis lo travayer Madanm Speaker, ki sa i vreman fo. *US* i annan en mazorite, zot lamannman pou pase. Me mwan mon sagren e bokou Seselwa e nou lot kote latab nou sagren ki zot pa pe defann - *United Seychelles* pa, akoz nou bann- zot bann sanpyon pou travayer. Selman zot pa pe defann kours travayer ki pe ganny viktimize ozordi.

E ozordi i annan bokou lensertitid la deor e lafreyer akoz zot pa fye sa Gouvernman zot per e bokou bann travayer dan sekte piblik i per pangar zot ganny targete, zot pa konnen ki zot pozisyon i garanti akoz levidans in montre poudir a nenport ki ler zot kapab zis

pous en dimoun, fer sa ki zot oule.

US pe zis pous dimoun malapropo. 'Ek nou pa ek nou' in retourn ankor dan nou pei, e nou dan LDS nou anvoy en *warning* pou zot, nou pa- nou pou lager kont sa lenzistis ki pe arive. E petet Minis i kapab pronons son lekor lo sa size dan son larepons koman Minis Lanplwa lo sa ki pe arive dan nou pei ki alarman, e ki pe kre bokou lensertitid e lafreyer parmi nou popilasyon.

En keksoz ki mon krwar nou merit diskontinyen aköz en promes ki nou koman LDS nou'n fer e zot koman *United Seychelles* zot in fer tel promes ki menm zot pou anmenn en Lalwa kont 'ek nou pa ek nou' me selman nou war poudir bokou nou bann frer ek ser travayer Sesel dan sekter piblik pe ganny viktimize pe pas dan en pake martir e pe ganny oprese.

Avek sa 2 mo Madanm Speaker, mon ava fini ekout bann larestan enterven an e nou av espere ki zot annan pou dir e apre larepons Minis nou ava pran en desizyon. Mersi bokou Mr- Madanm Speaker.

MADAM SPEAKER

Mersi.

HON JOHAN LOZE

(Off-Mic)

MADAM SPEAKER

Which order?

HON JOHAN LOZE

Madanm Speaker, mon oule zis koriz en mis apreansyon ki'n ganny kree devan Lasanble Nasyonal.

Letan logmantasyon 5poursan ti vin devan Lasanble Nasyonal, LDS ti napa en largiman konmkwa 5 poursan pa ase donn plis, zot ti annan en largiman kler e i lo verbatim Lasanble.

Pran sa sonm partaz egalman avek tou dimoun, *as a quantum* mon krwar zot ti tonm lo R350 par person. Pa ti zanmen egziste poudir pa se donn plis en mansonz, mon ti zis oule koriz en mizapreansyon annou pas li anba *Order 8* Madanm Speaker. Mersi.

MADAM SPEAKER

Ok, mon a zis remind Members ki letan nou pe lev en *point of order*, annou dir klerman anba *which order* ki nou pe lev sa e apre sirtou bann keksoz ki par egzant si nou kapab apre pli tar dan entervansyon fer monte, nou kapab espere. Onorab Tirant.

HON COLIN TIRANT

Bonn apre midi Madanm Speaker, bonn apre midi Minis ek ou delegasyon. Bonn apre midi bann Manm koleg Onorab e en bonn apre midi bann zabitan Glacis.

Madanm Speaker, avan ki mon komans mon deliberasyon mon oule dir ki mon pa kont trezyenm mwan saler, aköz i ti touzour en bon linisyativ anmennen par mon Gouvernman LDS. Aköz se nou ki ti konsewar sa pti baba an 2016, e parkont si ou baba pa kapab bwat en dile ki i pa tro, tro kontan an 2020 nou ti vini nou ti dir, nou fer en lamannman e nou ti sanz sa.

Me mon annan mon rezervasyon e tou keksoz i vin avek son merit. Madanm Speaker, mon pa pou konfiz bann travayer la deor an servan bann gro, gro term Lalwa aköz parkont bann travayer zot oule konn zis en keksoz. Eski mon pou ganny en trezyenm mwan saler e konbyen mon koleg ki pe travay obor mon pe gannnen?

Mon a eksplike aköz, pandan sa dernyen 27an, mon ti annan mon apepre 30ekek travayer anba mwan ki mon ti pe war mon pe met en lizye lo la tou le Desanm pou mwan kapab fer en *appraisal*.

Me pandan sa dernyen 9an mon ti pe ganny bokou difikilte pou mon fer *appraisal*. Aköz mon dir zot sa? Ti annan bann travayer ki ti trenn lipye, pa ti oule vin travay, ti vin an retar, ti al kot Dokter, vin travay sou, e ler mon ti sey met en lord avek zot mon ti ganny dir mon pa krwar ki mon ete, mon otoriter.

Me zot pa pe realize poudir mon ti pe fer sa pou zot prop byennet. Me parkont, mon ti ganny gete koman en move dimoun. Me ki mon ti fer? Mwan koman sa *supervisor* ansarz mon ti *stand* for lo mon bann desizyon ki mon ti fer. Si ou pa merit en keksoz ou pa pou gannnen sa keksoz. Ou bezwen travay e montre nou poudir ou delivre pou ou ganny sa keksoz a lafen lannen.

Ou pa kapab zis pandan 12mwan ou donn latet fermal ou siperyer, ou pa donn ou bann koleg lenportans dan travay ou zis ignor zot e a lafen lannen ou war zot nou tou nou, nou pe ganny nou menm trezyenm mwan saler. Si nou lapey i parey nou tou nou pou ganny nou egzakteman parey.

Me pou mwan sa pa fer sans ditou, aköz mon dir zot sa? Ler ki sa bann dimoun i sorti dan mon biro, koman i met zot lipye an deor mon biro, zot

komans *call* kanmarad, konbyen in donn ou? Konbyen ou'n gannyen?

Me la, ki nou pe al war la? Koman zot- zot pa ni pou bezwen menm al dan en biro pou al fer *appraisal*, akòz zot in fini konnen poudir sa trezyenm mwan saler zot pe al gannyen. Me dir avek mwan, eski sa i fer lazistis? Eski i anmenn latransparans pou bann travayer? Mon poz sa la pou bann travayer ziz sa pou zot menm.

Madanm Speaker, mon pa pou fer long, mon ti a kontan demann Minis atraver ou, anba ki provizyon bidzeter sa sonm R5milyon ki pou ed sekter prive pey zot travayer sa trezyenm mwan pou sorti? An vi ki nou konnen ki ti napa sa sonm dan Bidze 2025.

Parey mon bann lezot koleg in dir, Mr Herminie dan son kanpanny politik i ti promet Lepep bokou keksoz, e mwan koman en ansyen travayer PUC, mon oule demann avek Ladministrasyon US kan eski sa bann travayer pou ganny zot *backpay* ki ti ganny dir depi 2020 ziska 2021 pou ganny peye?

E dir ek mwan kan ki PUC e STC pou ganny zot bonous e zot trezyenm mwan saler? Mersi Madanm Speaker.

(APPLAUSE)

MADAM SPEAKER

Onorab Gervais Henrie. Onorab Henrie.

HON GERVAIS HENRIE

Mersi Madanm Speaker. E mon ava dir bonn apre midi tou dimoun. Madanm Speaker, mon prezantasyon mon pou al direk lo serten pwen ki Minis in tous lo la dan son prezantasyon dan Lasanble Nasyonal lo merit zeneral sa *Bill* bomaten.

Premye pwen i konsern fon R5milyon. Mon panse ki s afon i dwatet ganny odite e rapor ganny soumet avek Lasanble Nasyonal avan prezantasyon Bidze 2026. Mon met sa koman en rekomandasyon devan mon bann koleg atraver Dirizan Lopozisyon ki lo Komite Lasanble Nasyonal lo Kont e Finans Piblik FPAC, pou fer le nesesser avek Biro Oditer Zeneral.

Zis parey i annan en Rapor Oditer Zeneral lo *COVID 19 Relief Fund Account*, pibliye lo *sit web* Minister Finans menm ler Gouvernman US in promet en lanket dan sa fon ankor. Lot pwen, i konsern kou trezyenm mwan pou lekonomi Sesel. Atraver target Minister

Finans avek lasistans *IMF*, e Labank Mondyal, pou mentenir laliny bidzeter pou *salaries and wages* lo 11poursan *GDP*, ki lenpak sa desizyon pou fer li 100poursan mandatwar pou annan?

Baze lo sif 2025, pou alokasyon *salaries and wages* dan servis piblik en sonm R3.7bilyon ti'n ganny bidzete. Sa i reflekte en logmantasyon R309milyon konpare avek sif 2024, propoze par ansyen ladministrasyon, pe ed Seselwa menm sa. Selman in pas dan sa Lasanble e bokou nou in bliye Madanm Speaker.

E sa logmantasyon ki ti fer, i ti fer sa target ariv 11.3poursan *GDP*, alor kekyon se ki mannyer 100poursan trezyenm mwan lapey pou enpakte sa target ankor ? Mon lot pwen Madanm Speaker, dan menm laliny, se tou Prozedlwa ki pas devan nou Lasanble Nasyonal i gard en lanprent finansyel - *a financial footprint*.

Mon pe lev sa la aköz nou pa kapab oubliye sa fame teori *triple lock* ki *US* in *copy and paste* avek nou *sister party* Langleter *Lib Dems* nou konnen poudir pansyon retret peye anba Bidze Lazans Proteksyon Sosyal *ASP* pou ogmante e i espekte ariv ziska R10mil disi lannen 2029.

Now, nou pa pou kapab permet saler debaz *minimum wage* reste pli ba ki pansyon retret, nou pa pou kapab. Eski i pou moralman byen pou les sa arive? Personnelman mon krwar nou pa kapab.

Alor, si non, ki mannyer *wage Bill* trezyenm mwan saler servis piblik pou arive ziska ler *US* i sorti o pouvwar an 2030?

Si pansyon i monte, saler debaz pou bezwen monte, trezyenm mwan i sanze *what is the wage Bill going to be by 2030?* I annan en diferans fondamantal dan fason nou dan *LDS* nou pe vwar size trezyenm mwan lapey konpare avek nou bann koleg lo nou kote gos, sorti dan parti *United Seychelles* ki en parti sosyalis e ki krwar dan politik popilis.

Nou, nou pa krwar ki trezyenm mwan lapey i en drwa, mon repete ki nou pa krwar i en drwa. Nou krwar ki i en *incentive* pou travayer, en *incentive*. Nou krwar ki i merit egziste pou ankouraz e promouvwar prodiktivite. Kwa ki nou war koman drwa travayer?

Sekirite dan landrwa travay, nou pe koz *safety* la ; proteksyon kont diskriminasyon baze lo bann karakteristik proteze ki nou'n diskite dan sa Lasanble,

proteksyon kont arselman, konze avek saler tel ki konze annyel, konze paternite, konze maternite, *compassionate leave, sick leave* enkli menm ler ou zanfan i malad.

Public holiday, laliberte pou form par en linyon travayer, tretman ki zis devan Lalwa e Tribinal Lanplwa. Se sa ki nou dan *LDS* nou vwar koman drwa pou travayer.

E nou pa tousel dan lemonn ki krwar e ki'n esey fer la lyezon ant trezyenm mwan lapey avek prodiktivite. Plizyer pei atraver ki lemonn pe fer sa e dan ka Sesel i pli enportan pou nou akòz nou'n vwar li koman enn bann pilye dan lakonplisman sistenm *performance based* dan servis piblik.

Nou krwar i en *incentive* akòz Madanm Speaker, souvandfwa nou dan Labank Santral dan *LDS* nou koz fer plis avek mwens, fer plis avek mwens. Nou war ki koman en *incentive* akòz i ede ogmant prodiktivite lokalman. I azout valer avek rekonpans travayer, par lefe ki souliny zot lakonplisman. E i fer travayer vin pli responsab i fer travayer vin pli performan.

E la permet mwan Madanm Speaker, pou dir avek Minis e keksoz, le 21 Oktob

2023, le 21 Oktob 2023 ti annan en *press conference* e dan sa *press conference* ki ti donnen par manmzel Veronique Bresson, Mr Steve Monnaie e Manmzel Suzanne Morel ti pe koz lo bann lazisteman oubyen bann lamannman ki pe vini dan sa size trezyenm mwan lapey.

E enn bann keksoz ki zot ti enplor avek sekter prive se pour servi *performance-based management system* pou pey trezyenm mwan lapey pou ede ogmant prodiktivite dan zot landrwa travay.

Now, si *the top 3 special advisor* enn *Principal Secretaries* ozordi pe ankouraz sekter prive 2an pase pou fer sa, *what has changed today?* Sa i bann teknisyen ki pe regard keksoz dan en fason syantifik, akademik baze lo *best international practice, why are we changing 2 years later?* Now,

Now, mwan mon konpran, mwan mon konpran, mon konpran baze lo en konsey ki ansyen Dirizan Lopozisyon e Vis-Prezidan ozordi in deza dir mwan, si sa laport ki la ti kapab koze ler nou, nou ti vin mazorite dan Lasanble an 2020 evidaman koman Gouvernman nou ti asiz dan en lot fason, li i ti asiz petet or laba kot Serzan i ete nou, nou ti isi anler.

E ler nou pe sorti i dir ek mon ou konnen bann *public servant* zot *will go with the flow*, so *I respect* zot desizyon ki si 2an pase sa bann teknisyen ki ti pe donn en konsey e ozordi zot sanze aköz parti ki o pouvwar i oule fer koumsa. Solman mon pa bliye poudir zot in donn sa konsey poudir i ankouraz prodiktivite e mon krwar sa i ranforsi largiman ki nou, nou pe fer lo sa kote latab aköz i ankouraz prodiktivite.

Madanm Speaker, alor aköz rezon nou pa krwar ki i en drwa parey *US*? Zot ti krwar i en drwa zot ti merit entrodwir sa depi an 1977 parey Onorab Georges in dir bomaten, aköz?

Enn bann premye etranze pou vizit Sesel e zwenn Prezidan Rene apre ki i ti'n vol pei dan lannwit atraver en koudeta serye le fame Mr Paul Bérenger, gran politisyen Morisyen. Be Mr Bérenger ti'n merit dir avek Mr Rene ki an 1975 bann travayer Morisyen pe ganny peye en trezyenm mwan lapey, 1975.

E nou Sesel nou entrodwir in 2016 *and we claim it's the right!* Be si zot ankör krwar ki i en drwa, mon rezwenn Onorab Arissol lo mon kote gos pey *backpay* trezyenm mwan lapey pou 2020 e 2021 parey dirizan zot parti in promet dan enn son rali politik pandan kanpanny

eleksyon prezidansyel 2025. E in dir i pou fer sa koman en promes 100 zour.

E la Madanm Speaker, mon rezwenn Onorab Georges lo sours propozisyon trezyenm wan lapey. An 2011, mon ti Moris *on the way to the United States* ansanm avek Anbasader Marie-Antoinette Rose pou al lo program *International Visitors' Leadership Programme*.

E ler mon ti Moris mon ti bezwen la laba pou fer bann zafer *visa* bann zafer koumsa e apre napa naryen pou fer, *we had a lot of time on our hands*. Prezidan Ramkalawan ki sa letan ti Dirizan Lopoizisyon, so *happen to be in Mauritius* ansanm avek enn son garson e avek defen enn nou bon zanmi Lewis Alexis son nanm devan *Dieu* e nou'n pas en kantite letan ansanm.

Nou'n lwe en loto, nou'n marse al vizit dan tou kwen Moris. *And he had this conversation with me, in 2011*. Mon rapel byen, i dir ek mwan poudir be sa- aköz li in fer en bout son letid Pret Moris li, so *he is very familiar with this concept*. I dir ek mwan poudir be sa pa ti mal nou entrodwir dan Sesel.

And true to his words parey Onorab Georges in dir, i en propozisyon ki Komite

Egzekitiv *Seychelles National Party* in diskite longman e lerla an Me 2015, *SNP* i anons sa nide ansanm - ekout mwan byen la - ansanm avek promes pou ogmant pasyon retret pou vin R5mil, e an eksplik an ki dan en lakour kot ki annan en koup de 5mil i fer 10mil. So, nou tand la kote sa R10mil pansyon i sorti.

Alor, *SNP* sa letan, an Me 2015 ti ganny *challenge* poudir be ki mannyer zot pou finans sa? I pa zis en promes eleksyon ki zot pe fer. Mr Ramkalawan i eksplike poudir i annan 3 keksoz ki nou pou fer, premyerman koleksyon strik lo tou taks ki dwatet ganny peye ek Gouvernman. E nou ziska ozordi nou koz lo *broaden the tax base*, e nou dir avek dimoun *your fare share*. Koleksyon i strik lo taks.

Dezyenm propozisyon ki i dir netway pei kont koripsyon, e *LDS*, nou koz fortman kont koripsyon. E trwazyenmman, i koz lo lentrodiksyon taks lo propriyete etranze isi Sesel. Ah, ki nou vwar? En pti moman nou vwar poudir Gouvernman Prezidan Michel deswit i anvoy Sekreter Prensipal pou Finans sa letan Mr Patrick Payet dan medya pou anonse ki en lanket pe al fer dan dokiman ki'n ganny *leak* kot *Liberty House*.

Mr Payet i dir ki lentrodiksyon trezyenm mwan lapey ti pe ganny diskite avek *IMF*, Labank Mondyal avek *ADB* e ki pa kapab sa bann lorganizasyon etranze ki *leak* sa dokiman. 10an pli tar, Madanm Speaker, tou Seselwa enkli mwan menm ankor pe esper rezilta sa lanket lo ki mannyer sa dokiman ti ganny *leak* 10an pli tar.

E ler *SNP* ti fer sa propozisyon an Me 2015, ti annan 2 pwen kler ki ti sorti. Premyerman, nou ti dir ki trezyenm mwan lapey pou selman aplik pou servis piblik pou komanse, selman servis piblik e ki nou napa pou fors sektor prive.

E dezyenmman, e sa i tre enportan e *this is why we still stand on that principle* nou ti dir ki i pou baze lo *satisfactory records of employment. Appraisal, satisfactory records of employment*. So, nou pa'n sanze nou pozisyon, aköz nou'n toulta vwar li pa en drwa, me plito koman en *incentive*.

Now, i annan en pwen ki'n ganny fer bomaten e i vre Madanm Speaker, ki i an Oktob 2023 dan sa menm sa *Press Conference* ki le 3 *top public servant* dan Minister Lanplwa ti donnen ti annan en lanons ki disi 2026 ki dir trezyenm mwan

lapey ti pou 100poursan baze lo *appraisal*.

Me, e la en gro me, pandan kanpany eleksyon prezidansyel 2025, Ladministrasyon LDS ti pronons son lekor ki sa sistenm *mix*, setadir ant mandatwar ek evalyasyon pou reste pou ankore en pe letan. E nou ti dir ki atraver nou kandida prezidansyel Mr Wavel Ramkalawan ki mandatwar pou vin 60poursan e *appraisal* pou vin 40poursan pou evalyasyon.

Alor, ler nou pe koz pa pran swen avek pti baba, non, tanzantan nou'n get sa pti baba nou'n regarde ki mannyer pou-i pe grandi mannyer i pou aziste. E zisteman enn bann konteks sete le fame *pro rata* ki nou ti dir ki menm si en dimoun i komans travay an Mars i pou ganny en bout i pa pou aköz i pa ti la an Zanye, so nou'n kontinyen pran swen avek sa pti baba Madanm Speaker.

Sa propozisyon, lamannman mon vwar li koman en lot mon pwen i pe al kont 2 prensip fondamantal ki nou koman bann Manm Parlman nou bezwen tre sansib avek. Premye pwen i en pwen konstitisyonnel e dezyenm i en prensip *ILO* ki tou bann pei enkli Sesel ki'n ratifye son bann

Konvansyon i prensip i dwatet ozordi pe swiv.

Annou regard premye pwen Konstitisyon Lartik 35 *subclause 35 (d)*. Ki dir nou, ler nou donn tou dimoun en trezyenm mwan, setadir la i pe koz dan konteks en rekonpans ki en travayer i gannyen, ler nou donn tou dimoun en trezyenm mwan saler i vedir ki prensip Konstitisyonnel pa pe ganny respekte ozordi.

Letan nou pe dir tou dimoun pou ganny parey Madanm Speaker, aköz? Aköz Konstitisyon i koz lo saler zis e egal pou travay valer egal san distenksyon e stabilite lanplwa. So, si en travayer pa pe travay, i pa pe travay egal li, mon bann koleg in donn plizyer legzanp, mon konnen sa bann zafer la mon, dimoun i al ennler nou fer letour distrik evidaman.

Bann travayer Seselwa in konplent l sa size trenn lipye dan landrwa travay. Zot dir nou zot bann koleg i kit travay 4er mwen en kar. Anfet koman manm Lasanble en zour zis kit Lasanble en pti pe dan 3er edmi, 3er mwen en kar al la lo sa *bus shelter* kot *playground*, sirtou bann *MNA* ki dan les ek sid Mahe *you'll be surprised* pou war zot *constituent* ki en *public servant* konbyen zot ki'n aliny sa *bus shelter* la pe pran

bis pou al dan lakour, en zimaz ki kapab enspir en sanson lo latmosfer dan Viktorya, mon mazin Ton Jo *son âme devan Dieu*.

E, zot koz ek nou lo bann ki la war Dokter tou le Lendi bomaten. Nou dan *LDS* nou debout lo kote bann travayer Seselwa ki travay dir, e nou denons sa kalite fason trenn lipye ouswa kale dan servis piblik.

Dezyenm konsep ki mon dir, mon war sa lamannman i al kont, se *International Labour Organisation* li i promouvwar diskriminasyon kont- ou pa annan drwa setadir, fer okenn diskriminasyon kont travayer etranze e dan konteks Sesel Madanm Speaker, se bann *expatriate* ki lo *GOP* e sa i atraver son bann prensip avek Konvansyon sirtou *C-97, Migration for employment* ek *C-11, Discrimination in employment*.

Atraver ou Madanm Speaker, Minis Alexander i bezwen konn byen sa. In asiste plizyer bann miting anyel *ILO, Genève* ant Mars 2012 ziska Zilyet 2017 koman Minis partikilyerman ler i ti Minis Lanplwa apre nou konnen i ti al Minis Lazenés.

Alor, avan i ale, mon ti ava kontan demann Minis, e mon

krwar i oblize pronons son lekor avek nou lo aköz ki Gouvernman atraver sirkiler ki in ganny mansyonnen in dir ki i pou pey bann travayer etranze ki dan servis piblik, me li les bann ki dan sekter prive anpandan.

Si sa i leka, kot bann *expatriate* ki dan servis piblik nou ava klarifye sa, pou gannnen me bann ki dan prive pa pou gannnen, i ava ganny vwar koman en vyolasyon bann drwa imen fondamantal e i pou kre en group vilnerab dan nou sosyete ki pou dezormen fer fas avek en diskriminasyon legal.

Sa se en Lalwa - si nou les li koumsa - i pou en Lalwa ki pou promouvwar labi e fer distenksyon avek Seselwa ant Seselwa avek etranze dan en sekter e se en sekter lanplwa. An gro, nou pou annan nou en Lalwa *almost* rasis e zenofob, e nou koman Lasanble nou pa i kapab les sa arive, nou bezwen alor demann klarite lo la.

An konklizyon Madanm Speaker, mon pou regard briyevman *legacy* 4 Prezidan. Annou komans avek Prezidan James Michel. Dan son letan ki li in Prezidan 2004 ziska 2016, in met lenportans lo reste sansib e la i pe koz pou bann *public servant* sa in met en kantite lenportans lo reste

sansib avek bezwen piblik. I dir zot tret sitwayen koman konsonmater.

Mon rapel en fame *quote* ki i ti dir en fwa,” pa bezwen regard dimoun koman en limero lo en *file*”, sa in reste ek mon ziska ozordi. *And I agree with him on that.* E i ti dir servi *feedback* pou amelyore, e tou le-z-an letan i ti anvoy mesaz pou *Public Service Day* lanfaz lo *efficiency and incentive* avek lefikasite dan servis piblik.

Prezidan Danny Faure dan son diskour isi menm, devan Lasanble Nasyonal an 2017, i ti dir “Sesel i pli gran ki nou tou, nou bezwen ogmant nou prodiktivite nasyonal, ranforsi disiplin dan tou laspe nou lavi e pran nou responsabilite serye sirtou vizavi nou fanmir”. I ti dir a i enportan pou bann zanfan ki pe grandi, bann ki pe travay e nou bann aze ki bezwen viv dan dinyite. Ankor i pe souliny sa kestyon pou dimoun sirtou travayer pran responsabilite.

Prezidan Ramkalawan li in konsantre en kantite. Nou pa pou kapab *deny* sa lo moderniz servis piblik e nou'n menm dan proze Bidze letan bann dimoun Minister Finans avek servis piblik i vin isi, zot in dir nou poudir avan sa bann pilye pou *performance based* pa tou ki ti'n

ganny met an plas e letan nou ladministrasyon in vini in dir non, nou bezwen met tou le 4 akoz ou pa kapab met 3 pilye ouswa 2 pilye sa zafer la pou kabannen.

Alor li in met en kantite lanfaz lo moderniz servis piblik atraver servis nimerik, efikasite avek aksesibilite e in servi ban term devan sa Lasanble, trenn lipye, tir lanmen lo fren armen, nou rapel sa.

E finalman Prezidan Patrick Herminie, fek vini konbyen zour i annan dan lofis? 40zour, 45zour mon pa'n konte. Swa i pou adapte progre ki'n ganny fer ziska Prezidan Michel, Prezidan Faure, Prezidan Ramkalawan e i pou anmenn Sesel ankor pli lwen, ouswa pou servi mo ki Minis Cosgrow ti kontan servi er i ti Onorab Cosgrow “nou pou regrese”.

Mannyer mon vwar mon, *US* i oule retourn keksoz parey i ti ete avan 2019. An dot mo larg dilo. Travayer pou ganny menm rekonpans irespektiv nivo performans kontrerman avek nou lapros pou donn trezyenm mwan lapey koman en *incentive* ki annan mal avek nou lapros? Ler nou dir annou fer plis avek mwens e nou dir annou travay dir.

Me, Madanm Speaker, mon kapab konpran, pou en group *MNA*, ki'n *walk out* dan Lasanble Nasyonal 22 fwa ant 2020 a 2025 mon pa espekte *anything less* pou zot konpran poudir *incentive* nou pou bezwen donnen pou fer en dimoun travay plis e donn pei plis ankor. Mersi Madanm Speaker.

(APPLAUSE)

MADAM SPEAKER

Mersi Onorab. An prenon kont kontrent letan, mon pa pou aksepte ankor okenn lezot entervenan.

Nou ava pran en *break* ziska 4er e letan nou retournen Minis i ava fer son *summary*, son *right of reply*. Mersi.

(BREAK)

MADAM SPEAKER

Bon. Mon ava demann Minis pou fer son *summing up* apre bann entervansyon.

MINISTER **IDITH**
ALEXANDER

Mersi Madanm Speaker. Mon'n ekout atantivman bann deliberasyon ki'n ganny fer depi

bomaten, par *Leader* Lopoziyon e *Leader of Government Business* e 16 Onorab.

Deliberasyon in *long*, e pou mwan sa in montre lenportans sa size. E osi koman ki zot bann Onorab zot vwar sa size. Zot lenterpretasyon e persepsyon. Sa in sorti kler dan lenterpretasyon e persepsyon in diferan.

E mwan mon pou fer mon mye pou reponn tou kestyon. Klarifikasyon ki zot in demande. E osi donn lenformasyon ki korek, kredib, *accurate*. Mon pa pou al enn par enn, me mon pou sey group bann size ki parey ansanm.

Premye lo lamannman Lanplwa. *Leader of Government Business* ek Onorab Gill in eksplik sa byen, kwa ki pe sorti sa konponan evalyasyon performans. E lezot in donn en *brief* lo trezyenm mwan lapey, lenformasyon donnen korek.

Trezyenm mwan ti ganny sispann, savedir pa ti donnen 2020 ek 2021. Parey zot in eksplike wi an 2022, trezyenm mwan saler ti ganny amande. E sa ti vin baze lo performans i bon eksplike e fer konpran.

Ler lorganizasyon an 2022 ti ganny dir trezyenm mwan lapey pou baze lo performans, pa tou ki ti pare. Menm parey

zot in dir travayer pa ti konfortab, anplwayer osi pa ti konfortab. Onorab Georges in byen dir bomaten, sa 2 group i mars ansanm.

Travayer zot la dan zot lorganizasyon, zot konnen ki zot anplwayer pe fer zot ti war e sa ki ti fer zot pa konfortab. E lorganizasyon ki napa sistenm ki ti napa sa sistenm sa *Performance Appraisal* an plas ti ganny demande pou al kot *Guy Morel Institute*.

E zot ti ganny demande pou al laba pou zot kapab swiv en kour pou donn zot sa formasyon. E ler zot ti fini swiv zot kour laba, sa kour pa ti *long*. E zot ti prezan apre al rod en konsiltan ki prezan ki pou kapab met sa an plas pou zot.

Ou kapab mazine, ou demann zot pou baze lo performans i annan trezyenm mwan lapey pou peye. I annan lorganizasyon wi ti devlope sa sistenm. E i annan non, zot ti prefere donn travayer 100 pousan.

Sa ki mon pe dir zot la sa ti realite ki ti pase ler ti anons sa. Savedir met sa ki mon'n donn zot sa senaryo dan latet. Minister Lanplwa wi ti ganny *call*. Apre sa la, Minister Lanplwa ti ganny *call* 509 *call* ki zot ti gannyen pou kapab

eksplike kwa sa performans mannyer pou fer.

Minister Lanplwa ti ganny li 108 kliyan. Savedir sa ki ti antre piblik zis vini antre dan biro pe rod lenformasyon. Minister Lanplwa ti resevwar li 65 konplent. Pou sa, Minister ti bezwen pou *attend* tousala.

Sa bann lenformasyon ki mon pe donner i lenformasyon reel. I sa 3 zofisye ki zot dir mwan ki ti dir i *PS Monnaie* ki ti *DG Monnaie* sa letan. *PS Bresson* avek *DG* ki ti *Ms Morel*. E zot ti bezwen travay pou zot kapab *attend* tousala. I pa ti fasil zot dir mwan.

I annan ti reziste. Ler reziste savedir pa ti oule ekoute. Zot ti annan 14 let *enforcement* ki zot ti bezwen fer resorti. 11 zot ti bezwen *register grievance*. Ki sa bann statistik ki mon pe donn zot, si ou asize ou analiz sa i kler ki personn pa ti ankor pare pou dil avek sa. Ni Gouvernman sa letan, ni anplwayer, ni travayer.

Madanm Speaker, sa ki mon'n koz lo la sa i lafason ki ladministrasyon avan ti pe travay zot ti fonksyonnen. Sa deba bomaten i kler. *Leader* Lopozisyon li menm in dir ki sa i annan 2 filozofi.

Leader Lopozisyon in fer resorti klerman reste akote ki mon'n konpran ki zot pou zot

trezyenm mwan i merit baze lo performans. Lo sa kote i vin en lot ideoloji ki nou, nou pe dir i *right* parey mon'n eksplike bomaten.

I enportan parey mon'n dir, nou pe delivre sa konfyans ki Lepep Seselwa in fer dan nou. Mon pa pe fer politik, me i realite. Nou pe enplimant manifesto *US*. E sa ki mon'n anmennen bomaten i tonm dan sa 100 zour.

Mon'n ekout atantivman *Leader* Lopozisyon ler in koze bomaten. Mon repete mon pa pe fer politik, me i listwar. I annan pwen ki ou pou dir, mon poudir mon dakor avek ou. Me mon pou dir ou aköz mon dakor avek ou.

Ou'n dir poudir nou'n fer politik ek sa trezyenm mwan. *US* ki la i son non ki ti *SPUP*. E nou tou nou konnen ki listwar *SPUP* i tou kou lager fortman pou travayer. E sanmenm parti ki ozordi in vin devan avek sa trezyenm mwan saler ki montre ankor son komitman ek langazman pou travayer Seselwa.

Madanm Speaker, sa topik trezyenm mwan pa nouvo pou mwan. Zot in byen dir ki mon ti Minis Lanplwa an 2012. An 2015, mon rapel sa tre byen ansanm ki sa letan ki ti *PS*

Bresson nou ti komanse pou diskite lo trezyenm mwan.

Sa letan i ti anba direktiv Vis-Prezidan sa letan ki ti Mr Danny Faure. Ler nou ti komanse pou diskite, nou ti zwenn avek *SCCI* sa letan sa i zis mon pe met lo rikord pou eksplik byen nou listwar.

Parey mon'n dir mon pa pe vin fer politik, me i enportan ki mon eksplik sa serten pwen mon'n eklersi. La mon pou bouz lo bann pwen teknik. Tou Onorab in koz fortman lo *performance appraisal*, i bon. savedir, mon war ki lenportans zot pe atase avek.

Parey mon'n eksplike bomaten mon pa pe dir pou tir *performance appraisal*. Bokou sa ki zot in mansyonnen i bann problem bann *HR issues*. Sanmenm ki nou pe dir i enportan pou annan en *performance appraisal*.

Performance appraisal, ou servi li ou kapab servi li dan pou 3 ou pou idantifye ou bann *needs*, ou pou donn en *salary increment* oubyen pou en promosyon.

E pou mwan nou pou ankouraze ki zot servi sa *performance appraisal*, i pou fer ki savedir si en dimoun i ganny en promosyon, si i pou ganny en *salary increment* i pou annan

en sistenm ki savedir ki nou war i zis e fer e transparan.

Zot in mont lo *SITZ*, wi Lalwa Lanplwa pa kouver *SITZ*. En lorganizasyon ki tonm anba *SITZ* sa i tonm anba *FSA*. E nou'n travay tre pros avek *FSA*. Konsernan pou trezyenm mwan saler, nou tou nou konnen sa pli gran lafors travayer ki tonm anba *SITZ* i *IOT*.

E Gouvernman in fini donn son parol son konfirmasyon ki tou travayer Seselwa kot *IOT* pe ganny zot trezyenm mwan. Statistik ki mon annan *as of today*, nou annan nou 488 travayer Seselwa ki tonm anba *SITZ*.

Mon krwar la zot tou la bomaten mon'n tann zot dir zot konte byen. Dan sa 453 ladan in fini konfirman mon'n ganny laparol avek lorganizasyon zot pe al ganny zot pe trezyenm mwan. 453 lo 488 fer sa Maths i tonm 92.8. E si nou *round* li to *the nearest whole number*, i tonm 93 poursan.

E wi i annan 7 poursan. Sa 7 poursan i pe reprezant 35 travayer, e nou pe koz lo 12 lorganizasyon. E pou sa mon ava profite ki nou a demann sa bann lorganizasyon osi pou seye pou konsidere pou donn zot sa bann travayer sa trezyenm mwan saler.

Lo konsernan Konvansyon *ILO*, bokou in ganny dir. In ganny dir me selman i *interpretation*, enterpretasyon i pa dan sa konteks. Ler i pe dir *equality*, i pe mean ki menm travayer i pe ganny menm lapey.

Ler nou siny Konvansyon en pei avek bann lorganizasyon enternasyonal, i pa vedir ki par ler nou bezwen kopi li parey. Me i annan bann gran laliny ki swiv. I vin parey dan konteks *minimum wage* ler nou ti entrodwir.

Mon pou koz dan sa konteks egalite ki dir lo saler. Isi Sesel lo konsernan saler, i en Lalwa. Mon krwar zot out zot konnen i vin en *wage grid*. *PSD* li ki annan sa manda ler i get sa *wage grid* lo kote pou sektor piblik. Tou saler i ganny *pitch*, savedir ler ou pou pran en *cadre*.

Fer krwar annou dir la nou pe koz lo *HR*. Savedir tou lorganizasyon si ou en *HR officer*, kot ou pe travay i *across* lorganizasyon. Si ou en *HR Officer*, ou pe gannyen sa lapey. Lo kote sektor prive, li i en lot.

Sektor prive, nou servi sa *minimum wage*, e ki nou annan formil ki kont par erdtan. Me mon ava agree avek zot, ki kekfwa lo konsernan pou sektor prive ki nou merit amelyore. Me

mon pe donn zot mon langazman ki i annan provizyon ki pe deza ganny konsidere. E sa i ava ganny fer ler nou pou get revizyon Lalwa Lanplwa dan son totalite.

Zot in mont lo sektor piblik pe donn travayer etranze trezyenm mwan saler. Bomaten mon'n eksplik sa byen. Mon'n dir poudir wi, Lalwa Lanplwa i pe donn sa *minimum*. Me nou ankouraz anplwayer pou li kapab donnen.

Dan sa konteks sektor piblik i en anplwayer. E sektor piblik li in fer son Polisi kot in dir ki i pe donnen travayer etranze. Me sa bann travayer etranze i enportan pou eksplike, i bann ki lo en kontra lokal, savedir zot kondisyon lo sa kontra i parey menm kondisyon avek en travayer Seselwa.

Prezan kekfwa zot ava demann mwan lekel ki ganny sa bann kontra lokal. I en etranze ki'n marye avek en Seselwa. I en etranze ki'n ganny *permanent residency*, me i pa en Seselwa.

E nou annan osi etranze ki'n vin travay Sesel, e ki'n deside son msye, son madanm in akonpanny li. E zot ganny sa kontra lokal. I zis selman sa bann etranze dan sa konteks ki pe ganny sa trezyenm mwan.

Zot in mont en pti pe i annan en pti pe konfizyon ki'n vini konsernan sa lamannman 20 mil ki nou'n dir ki si zot pa peye bann konsekans. R20 mil i pa pou sa lorganizasyon, i pou sa travayer. Savedir sak travayer sa ki mon'n *state* sa 20mil i maksimonm.

Me sa i pou a diskresyon *Employment Tribunal* ler case a vin devan li ki mannyer i pou pase. Me sa ki enportan ou pou bezwen pey sa travayer sa trezyenm mwan, e la ou a ganny ou fine ki *whatever* ki mon'n *state maximum* i 20 thousand. I pa savedir pa lorganizasyon i pou par travayer.

I annan en lot pwen ankor ki'n monte konsernan *bonus vs* trezyenm mwan. Pou sa mwan mon pou ankouraze pou bann lorganizasyon parey nou'n dir pou zot kontinyen get dan *welfare* zot travayer.

E dan lot kote sa bann travayer osi fodre ki zot vwar poudir zot anplwayer pe met bann *incentives*. Savedir kontinyen travay, donn tou sa ki zot annan pou zot lorganizasyon kontinyen progrese. E ki zot sa travayer zot a kontinyen osi benefisyé.

En lot pwen ki'n demande, kote ler nou'n koz lo sa 5milyon ki pou donn pti biznes. Minister Finans in konfirman ki sa 5

milyon pou sorti anba sa laliny Bidze Progranm Sosyal. I enportan osi ki ler mon'n fer resorti poudir sa i en drwa travayer.

E ler mon fer resorti ki sa i en drwa travayer, i annan ki pe fer resorti *as if I am wrong* oubyen i pa kler. Me si i deza dan Lalwa i vini zot *right*. Zot in fini *acquired right by law*. So, i enportan ki Lepep Seselwa i konpran sa.

Zot in menm demann mwan en pti kestyon lo *succession plan*. Lo konsernan pou mon Minister. Vi ki la ler Minister in re... mon krwar zot in war Minister I apel *Employment and Human Resource Planning*. *Human Resource Planning* li savedir sa bout la ou bezwen planifye pou kapab dir ki kalite travayer ki Sesel I pou bezwen.

E ladan i zwe en gran rol kote la I pou vin I sa *succession plan*. E mon pou donn plis lenformasyon, mon antisipe pouf e en *press conference*. E pou zis lenformasyon I nepli mannyer mon'n donn li son lanpler osi I pa pou en *unit*. E sa I pou ganny gete koman en seksyon dan Minister.

Madanm Speaker, mon pa pou repet plis mon pou termin lo la kot mon pour pet sa ki mon ti dir dan mon konklizyon

bomaten. Mon pou terminen pou repete ki apartir lannen 2025, pou napa evalyasyon performans lo lapey trezyenm mwan.

E sa lamannman Lalwa Lanplwa ki mon pe prezant devan zot, se pou re entrodwir trezyenm mwan lapey sa okenn dediksyon baze lo performans. Sa I prensip ki nou ladministrasyon pou swiv pou nou demontre nou komitman e langazman anver nou pep.

Alor, mon repete lo lapar travayer Seselwa mon pe demann tou Onorab pou vot an faver sa Prozedlwa ki mon pe prezant avek zot. Mersi.

(APPLAUSE)

MADAM SPEAKER

Mersi Minis. Bon in ariv letan prezan pou nou pran en vot, lo prensip ek merit *Bill*. Tou bann Manm ki an faver? Mersi. Okenn *Members* ki kont?

Alors, vot lo merit *Bill* in ganny pase avek 18 ki'n vot pour, avek 14 ki'n *abstain*. Mon ava demann Clerk pou aprezan lir *Long Title of the Bill* silvouple.

MADAM CLERK

Mersi Madanm Speaker. A *Bill* for an Act to amend the *Employment Act* (Cap. 69). Mersi Madanm Speaker.

MADAM SPEAKER

Mersi. Nou ava aprezan al dan *Committee Stage*. Parey nou'n vwar I annan bann proposed *amendments* ki'n ganny sirkile sorti kot *Bills Committee*. Sorry, sorti kot *Scrutiny of Bills Committee*.

E mon konpran ki Vice-Chair pou fer en prezantasyon Onorab Gill.

HON CHURCHILL GILL

Mersi Madanm Chair. E bonn apre midi tou prezan. Madanm Chair, mon a komanse par fer sorti ki dapre *Standing Order 66* sa lamannman *Employment (Amendment) Bill, 2025*, in swiv tou prosedir ki I devret.

Notis ti vin kot Lasanble anvoye par Minister Lanplwa an menm tan sa *Bill* ti ganny gazete. As far ki son lobzektif I konsernen, tou keksoz in ganny vwar koman annord. E i *constitutionally sound*, nou pa'n vwar okenn problem avek.

E aprezan mon a bouz lo bann lamannman ki'n ganny diskite, apre mon ava bouz lo sa ki'n ganny donner *72 hours*. *72 hours yes that is what I meant*.

Premye lamannman anba *Short Title clause 2(a)*, la lamannman I konm swivan; *in subsection 1, repeal the words" and section 46(d)."*

Dezyenm lamannman pou bouz *instead of (a)* pou fer koreksyon pou met *(b)* vi ki anler anba *Short Title 2*, sa premye lamannman I lo *2(a)*. So, sa lot lamannman se *(b)* sanz *(a)* fer vin *(b)*.

E trwazyenm lamannman sanz *(c)*, sanz *(b)* pou vin *(c)*. E lot lamannman *repeal of section 46(d)(3)* *section 4(d)* sa lamannman se "*of the principal Act*" ki ganny azoute la.

E an menm tan mon oule fer sorti madanm Speaker, sa i setou lamannman ki nou ti'n gannyen. E an menm tan mon oule fer sorti ki menm si in annan bokou deklarasyon ki'n ganny fer par lot kote latapab konsernan pey *back pay* depi 2020/2021. Sa napa okenn lamannman ki'n ganny anvoye....

MADAM SPEAKER

Onorab, mon pou bezwen aret ou la, aköz la nou pe *deal* avek bann *amendments lo clause*. Pa lo merit, pa lo prensip.

HON CHURCHILL GILL

Ok. So, se tou lamannman ki nou'n gannyen napa ankor okenn lamannman ki'n vin devan swa *Bills Committee* oubyen *the House*. Mersi.

MADAM SPEAKER

Mersi. Eski nou annan okenn...? Onorab Georges.

HON BERNARD GEROGES

Mersi Madanm Chair. Madanm Chair wi, nou konpran bann lamannman ki'n ganny propoze par Onorab Gill. Mon ti ava zis - *I do not want to give and take*. Me selman mon anvi zis propoz en lamannman to son lamannman in *clause 2 (a) the new insertion in subsection (1) repeal the word "and subsection 4(d)"* napa okenn problem avek lentansyon.

Me mon krwar I ti devret lir *"in subsection 1, by repealing the words and section (d)"* pou vin parey *the next amendment by repealing*. Mon panse se koumsa ki nou devret mete.

So, if that is agreeable e ou donn mwan permisyon pou fer en amendment to the amendment, I would like to move this amendment ki pa sanz the nature of the main amendment. Mersi.

MADAM SPEAKER

Onorab Gill.

HON CHURCHILL GILL

Mersi Madanm Chair. Madanm Chair, se egzakteman sa ki mon'n lir. E lo sa ki Onorab pe propoze mon a les *panel* deside lo la. Mersi.

MADAM SPEAKER

Ok. Zis en pti pou mwan regarde si nou tou nou pe ganny en konpran. Parey Onorab Georges pe dir kot sa nouvo *subsection (a) clause I* vin in *subsection 1 by repealing the words and section 46 (d)*. Akoz sa *tracked changes* I pa met *"and repealing"*. Sa ki mwan mon pe vwar, I pa met *"by repealing"* sorry. Savedir nou fer sir i vin *"by repealing the words and sections 46(d)." Nou pe note? Yes.*

HON CHURCHILL GILL

Ya, the legal team is noting.

MADAM SPEAKER

Alright. Okenn lezot lamannman oubyen lezot lamannman lo lamannman? Non? Alors, savedir la nou pe pran sa *clause*. Nou ava pran en vot lo *clause* lo tou sa bann lamannman. *That basically the amendment (b) ki i annan sa nouvo subsection (a) in subsection i "by repealing the words and section 46(d)." "*

E ki I annan *re numbering* ki prezan I vin *"b"* dan plas *"a"* e *"c"* dan plas *"b"*. e dan *clause 3* pou vin *inserting the words "of the principal Act"* apre *section 46 (d)*. Nou ava pran en vot lo la silvouple.

Tou Manm ki agree avek bann lamannman ki nou pe...? Okenn ki kont bann lamannman? Alors, lo lamannman ki'n ganny *tabled*. Nou annan nou 18 ki'n vot pour avek 14 ki'n *abstain*. Alors, sa bann lamannman as *tabled* i *carry*.

E aprezan nou a pran ankor sim on konpran byen ankor en vot lo *that of the clauses* ki'n ganny propoze in the amendment Bill forms part of the Employment Act. Nou ava pran en vot lo la.

Bann ki *for the amendment to the Bill*? Okenn Manm ki kont? Mersi Clerk. E alors sa vot lo *the Bill itself* ki i ganny *the clauses are contained in the Act*, nou annan nou 18 ki'n vot pour, avek 14 ki'n *abstain*.

Savedir nou pou prezan sorti dan *Committee Stage*. E nou *reconvene Assembly*. Mersi. Nou ava prezan ganny en Mosyon pou *Third Reading please*? Onorab Lemiel.

HON SYLVANNE LEMIEL

Mersi Madanm Speaker. Madanm Speaker, anba seksyon 76(1) mon ti ava demande ki sa *Bill* i ganny lir pou en Trwazyenm Fwa as *amended*. Mersi.

MADAM SPEAKER

Okenn ki segonn Mosyon? Onorab Gill.

HON CHURCHILL GILL

Mersi Madanm Speaker. *Motion seconded*.

MADAM SPEAKER

Mersi nou ava aprezan pran en vot *on the Third Reading of Bill as amended*. Bann Members ki vot *for the amendment*? Mersi. Okenn Members ki vot kont? Alors, nou annan nou 17 vot pour avek 15 ki'n *abstain*. E alors sa *Bill as amended* in ganny aprouve. Clerk ou kapab lir *Short Title*... Onorab Gill?

HON CHURCHILL GILL

I annan en pti koreksyon lo lakantite akoz ti annan 18 me selman vot in dir 17.

MADAM SPEAKER

I pa'n vote Onorab. I pa'n ganny konte koman - so... Si Clerk i kapab *read Short Title* silvouple?

MADAM CLERK

Mersi Madanm Speaker. *This Act may be cited as the Employment (Amendment) Act, 2025*. Mersi Madanm Speaker.

MADAM SPEAKER

Mersi. Alors, nou'n ariv a lafen nou *Order Paper* pou ozordi lo azanda. Mon a remersye tou Manm. Mon ava remersye Minis avek son bann zofisye. E alors, nou pou *adjourn* ziska demen bomaten 9er.

(ADJOURNMENT)